

東鹿五志合集

0062

吳州胡

蔡題



嘉慶東鹿縣志卷八

翰林院編修沈樂善

戶部主事裴顯相全輯

東鹿縣知縣李符清

人物第八

讀二十三史凡卓卓可紀者率特列於篇或勳業爛然或文章外見或持身名教或役志沉淪其實既分其名各著即專志一隅如常璩之漢中梓潼諸志士大夫與南惠同編亦第概之以士女惟各省通志及府州縣志皆有人物之統稱案吳志顧雍傳云才照人物晉書劉毅傳云門地人物文學皆當世第一是則人物者為一地之特出而眾望攸歸者也邑介燕趙之間太行巨其西滹水繞其南北拱神京東眺瀛海靈秀所鍾自宜偉人間出儼行相望是以唐有張公興宋有董公元享勁節孤忠至今凜凜猶有生氣明以來如王賈諸公事業功名彪炳旂常勒銘鐘鼎皆足深人仰止茲俱載正史本傳凡舊志所嘗



立傳者以次採錄至孝義列女悉屬潛德幽光端足重也志人物

忠烈

唐張興者束鹿人長七尺一飯至斗米肉十斤悍趨而辯爲饒陽裨將祿山反攻饒陽興開張禍福譬曉敵人而嬰城彌年衆心遂固滄趙已陷史思明引衆傳城興擐甲持陌刀重五十斤乘城賊將入興一舉刀輒數人死賊皆氣懾城破思明縛之馬前好謂曰將軍壯士能屈節當受高爵對曰昔嚴顏一巴郡將猶不降張飛我大郡將安能委身逆虜今日幸得死然願以一言爲誠思明曰云何興曰天子遇祿山如父子今乃反大丈夫不能爲國掃除反爲其下何哉思明曰將軍不觀天道耶吾上起兵二十萬直趣洛陽天下大定以偏師叩函谷守將面縛唐亡固矣興曰桀紂秦隋窮人力舉四海與爲怨故商周漢唐因得代之而有神器皇帝無違德祿山非數帝賢是苟延歲月終即禽耳思明怒鋸解之且死罵曰吾能哀疆死兵敗賊衆軍中凜然爲改容

宋董元亨深州束鹿人累官至國子博士通判貝州王則據城叛是日冬至元亨方與州

將張得一朝謁天慶觀夜漏未盡變起倉猝衆莫知所爲元亨促馬馳還坐廳事賊黨十餘人擐甲露刃排闥而入左右皆奔潰賊脅元亨曰大王遣我來索軍資庫鑰元亨據案叱之曰大王誰也妖賊乃敢弄兵乎我有死耳鑰不可得也賊將郝用繼來索愈急曰庫帑今日大王所用也可不上鑰乎元亨厲聲張目罵賊用遂殺之賊爭入携鑰而去事聞仁宗曰守法之臣也贈太常少卿錄其子孫三人賊平獲郝用斬以祭元亨

錄宋史

明

周國垣河南嵩縣守備流賊破城招降不屈賊以銅棍擊之數十死

李萃秀字振揚幼聰慧讀書輒能解悟弱冠補博士明天啓丁卯薦賢書時當崇禎之季民窮帑虛巨室中飽朝廷憂之增餉不足爲預征預征不足爲捐助縉紳勳戚輕社稷重身家攫其金不肯出兵科曹良直南巡過束鹿萃秀輸米若干石充餉曹曰爾窮孝廉也如此也耶倘盡如君不致一人憂社稷矣旌其門壬午筮任山東昌邑縣甫三月我朝大兵略地至山左城破死之次子諸生宏禎亦從死中丞御史臺疏請卹依保定縣例贈山

東按察司僉事廕一子入監讀書

國朝

趙自光官漕運千總同守備寶繼昌屢立戰功順治四年隨征閩寇力戰死之奉旨賜銀卹其家

仕蹟

北齊

孟業字敬業鉅鹿安國人家本寒微少爲州史性廉謹同寮諸人侵盜官絹分三十疋與之拒而不受魏彭城王韶授定州除典籤長史劉仁之謂業曰我處其外君居其內同心戮力庶有濟乎未幾仁之徵入爲中書令臨路啟韶云殿下左右可信任者惟有孟業願專任之餘人不可信也又與業別執手曰今我出都君便失援恐君在後不自保全惟正與直顧君自勉業唯有一馬因瘦而死韶以業家貧令州府官人同食馬肉欲令厚饋業固辭不敢韶乃戲業曰卿邀名人也對曰業以微細伏事節下旣不能裨益寧可損敗清

風後高祖書與韶云典籤姓孟者極能用心何不置之目前韶高祖之壻也仁之後爲兖州臨別謂吏部崔曰暹貴州人士唯有孟業銓舉之次不可忘也暹問業曰君往在定州有何政績使劉西兗如此欽歎答曰稟性愚直唯知自修無他長也天保初清河王岳拜司州牧聞業名行復召爲法曹業形貌短小及謁見岳心鄙其眇小笑而不言後尋業斷決之處乃謂業曰卿斷決之明可謂有過軀貌之用尋遷東郡守以寬惠著其年麥一莖五穗其餘三穗四穗共一莖合郡人以爲政化所感尋以病卒

錄北齊書

元

耿福字伯禧素爲邑之著姓福生而敦厚性沈鷺居平不苟笑不輕言膂力過人善於騎射如輜略諸書無不肄習皆通大義然器量醇謹故人不能測其淺深也太祖兵入中原攝縣政保庇一方及穆呼哩至縣遂以其衆降以功拜鎮國上將軍安定州節度使行元帥府事佩金虎符後加輔國上將軍以疾卒

耿孝祖襲束鹿縣軍民長以孫貴贈嘉識大夫禮部尚書上輕車都尉高陽郡侯

耿繼元字順臣以質子襲東鹿縣尹官制行遷尹行唐固安錦州判官葛城大同河間三縣尹同知絳州事階忠顯校尉所至以廉直剛敏稱以子貴累贈中奉大夫河南江北等處行中書省參知政事護軍封高陽郡公

耿煥以國子伴讀貢刑部掾歷司農中書初授戶部主事由員外郎郎中至尙書歷戶禮刑工四部由都事爲郎中在中書左右司由僉憲憲副爲使遷河南山東江西浙江四道監察御史六登中外臺爲執政在江西浙江行省中書都省累二十三遷爲左丞俱有能績

知 穆元字子初初從事翰苑考滿授承事郎胸山縣尹兼管諸軍勸農事轉承直郎冀寧同

李謙世祖時爲陽穀縣尹才能敏捷敦教化重農桑斷獄明允民有以罪被收者隸殺之誣以自刺謙驗其無血疑之乃取二鷄殺其一流血其一撲殺復刺之無血隸遂伏時有嘉禾一莖數穗民謂德政所致去後立石頌之

明

王驥字尙德東鹿人長身偉幹便騎射剛毅有膽曉暢戎略中永樂四年進士爲兵科給事中使山西奏免鹽池逋課二十餘萬尋遷山西按察司副使洪熙元年入爲順天府尹宣德初擢兵部右侍郎代顧佐署都察院久之署兵部尙書九年命爲真正統元年奉詔議邊事越五日未奏帝怒執驥與侍郎鄭壜下之獄尋得釋阿台朶兒只伯數寇甘涼邊將屢失利侍郎柴車徐晞都御史曹翼相繼經理邊務未能制二年五月命驥往許便宜行事驥疾驅至軍大會諸將問往時追敵魚兒海子先退敗軍者誰僉曰都指揮安敬驥先承密旨戮敬遂縛敬斬轅門并宣敕責都督蔣貴諸將皆股慄驥乃大閱將士分兵畫地使各自防禦邊境肅然閱軍甘涼汰三之一定更番法兵得休息而轉輸亦省俄阿台復入寇帝以任禮爲平羌將軍蔣貴趙安爲副驥督軍三年春偕諸將出塞以貴爲前鋒而自與任禮帥大軍後繼與貴約曰不捷無相見也貴擊敵石城敵走兀魯乃貴帥輕騎二千五百人出鎮夷間道兼行三日夜及之擒左丞脫羅斬首三百餘獲金銀印各一駝

馬兵甲千計驥與禮自梧桐林至亦集乃擒樞密同知僉院十五人萬戶二人降其部落窮進至黑泉而趙安等出昌寧至刁力溝亦擒右丞達魯花赤三十人分道夾擊轉戰千餘里朶兒只伯遠遁論功貴禮皆封伯而驥兼大理卿支二俸尋召還理部事久之麓川之役起麓川宣慰使思任發叛數敗王師黔國公沐晟討之不利道卒以沐昂代昂條上攻取策徵兵十二萬人中官王振方用事喜功名以驥可屬思大舉驥亦欲自效六年正月遂拜蔣貴平蠻將軍李安劉聚爲副而驥總督軍務大發東南諸道兵十五萬討之刑部侍郎何文淵侍講劉球先後疏諫不納瀕行賜驥貴金兜牟細鎧蟒繡緋衣朱弓矢驥請得以便宜從事馳傳至雲南部署諸將遣叅將再保由東路趨孟定大軍由中路至騰衝分道夾擊是年十一月與貴以二萬人趨上江圍其寨五日不下會大風縱火焚柵拔之斬首五萬餘級進自夾象石渡下江通高黎貢山道閏月至騰衝長驅抵杉木籠山賊高據險築七壘相救驥遣叅將宮聚副將劉聚分左右翼緣嶺上而自將中軍奮擊之賊大潰乘勝至馬鞍山踰月抵賊巢山陡絕深塹環之東南面江壁立不可上驥遣前軍覘

賊敗其伏兵賊更自間道立柵馬鞍山出大軍後驥戒軍中無動而令都指揮方瑛以六千人突賊寨斬首數百復誘敗其象陣會東路軍再保等已合木邦車里大侯諸土軍破烏木弄戛邦諸寨遣別將守西峨渡防賊軼刻期與大軍會驥乃督諸將環攻其七門積薪縱火風大作賊焚死無算溺江死者數萬人思任發攜二子走孟養獲其虎符金牌宣慰司印及所掠騰衝諸衛所印章三十有奇犁其巢穴留兵守之而還明年四月遣偏師討維摩土司韋郎羅郎羅走安南俘其妻子傳檄安南縛之以獻五月師還帝遣戶部侍郎王質齋羊酒迎勞賜宴奉天門封推誠宣力武臣特進榮祿大夫上柱國靖遠伯歲祿千二百石世襲指揮同知賜貂蟬冠玉帶貴進侯劉聚等遷賞有差從征少卿李蕢郎中侯璉楊寧皆擢侍郎士卒賜予加等府庫爲竭思任發之竄緬甸也其子思機發復帥餘衆居者藍乞入朝謝罪廷議因而撫之王振不可是年八月復命驥總督雲南軍務帥參將再保毛福壽以往未至而思機發遣弟招寨入貢緬甸亦奏獲思任發要麓川地朝廷不納其貢且敕驥圖緬甸驥因請濟師八年五月復命蔣貴爲平蠻將軍調土兵五萬往

發卒轉餉五十萬人驥初檄緬甸送思任發緬人陽聽命持兩端是年冬大軍逼緬甸緬人以樓船載思任發覘官軍而潛以他舟載之歸驥知緬人資木邦水利爲唇齒且慮思機發將以獻其父故仇之故終不肯獻思任發驥乃趨者藍破思機發巢得其妻子部落而思機發獨脫去明年召還加祿三百石命與都御史陳鑑巡延綏寧夏甘肅諸邊初寧夏備邊軍半歲一更後邊事亟三年乃更軍士日久疲罷又益選軍餘防冬家有五六人在邊者軍用重困驥請歲一更當代者以十月至而代者留至來年正月乃遣歸邊備足而軍不勞帝善其議行之諸邊當是時緬人已以思任發來獻而思機發竊駐孟養地屢遣使入貢謝罪中外咸願罷兵振意終未慊要思機發躬入朝謝沐斌帥師至金沙江招之不至諭孟養執之以獻亦不聽命於是振怒欲盡滅其種類十三年春復命驥總督軍務宮聚爲平蠻將軍帥師十五萬人往明年造舟浮金沙江蠻人柵西岸拒守官軍聯舟爲浮橋以濟拔其柵進破鬼哭山連下十餘寨墜溺死者無算而思機發終脫去不可得是時官軍踰孟養至孟邨海地在金沙江西去麓川千里自古兵力所不至諸蠻見大軍

皆震怖而大軍遠涉驥慮餽餉不繼亟謀引還時思機發雖遁匿而思任發少子思陸復擁衆據孟養驥度賊終不可滅乃與思陸約立石表誓金沙江上曰石爛江枯爾乃得渡遂班師驥凡三征麓川卒不得思機發議者咎驥等老師費財以一隅騷動天下而會川衛訓導詹英抗疏劾之大略謂驥等多役民夫舁綵繪散諸土司以邀厚利擅用腐刑詭言進御實充私役師行無紀十五萬人一日起行互相蹂踐每軍負米六斗跋涉山谷自縊者多抵金沙江傍徨不敢渡既渡不敢攻攻而失都指揮路宣翟亨等俟賊解多捕魚戶爲俘以地分木邦緬甸掩敗爲功此何異李宓之敗而楊國忠以捷聞也奏下法司王振左右之得不問而命英從驥軍自效英知往且獲罪匿不去當是時湖廣貴州諸苗所在蜂起圍平越及諸城堡貴州東路閉驥至武昌詔還軍討苗會英宗北狩羣臣劾王振並及驥以驥方在軍且倚之平苗置弗問命佩平蠻將軍印充總兵官侍郎侯璉總督軍務已而苗益熾衆至十餘萬平越被圍半歲巡按御史黃鎬死守糧盡掘草根食之而驥頓軍辰沅不進景泰元年鎬草疏置竹筒中募人自間道出聞於朝更命保定伯梁瑄爲

平蠻將軍益兵二萬人侯璉自雲南督之前疾戰大破賊盡解諸城圍而驥亦俘割平王
蟲富等以獻驥還命總督南京樞務其冬乞世券與之南畿軍素偷惰驥至以所馭軍法
教之于謙弗重也朝廷以其舊臣寵禮之三年四月賜敕解任奉朝請驥年七十餘躍馬
食肉盛聲伎如故久之石亨徐有貞等奉英宗復辟驥與謀賞稍後上章自訟言臣子祥
入南城爲諸將所擠墮地幾死今論功不及疑有蔽之者帝乃官祥指揮僉事而命驥仍
兵部尙書理都事加號奉天翊衛推誠宣力守正文臣光祿大夫餘如故數月請老又三
年乃卒年八十三贈靖遠侯諡忠毅傳子瑋及孫添添尙嘉善長公主再傳至孫瑾嘉靖
初提督三千營協守南京還掌左府久之佩征蠻將軍印鎮兩廣廣東新寧新興思平間
多高山叢箐亡命者輒入諸徭中吏不得問衆至萬餘人流劫高要陽江諸縣官軍討之
輒失利三十五年春瑾與巡撫都御史談愷檄諸路土兵誅其魁陳以明悉平諸巢捷聞
加太子太保而扶藜葵梅諸山崗馮天恩等據險爲寇者亦數十年瑾復督軍分道進勦
破巢二百餘復以功廕一子錦衣百戶言官劾其暴橫召還爵傳至明亡乃絕

田綱永樂戊子舉人拜禮科給事中儀度端肅立朝侃侃陞湖廣參政

甄諱永樂戊戌進士選翰林庶吉士授檢討遷兵部主事以事謫甘州判官尋陞壽州知州鳳陽府知府沉靜文雅以正自持不能隨世以就功名

王文榜名強字千之號簡齋永樂辛丑進士授監察御史宣德中欽改今名擢陝西按察使正德四年陞都察院右副都御史巡撫寧夏兼理軍務五年入爲大理寺卿未幾陞都察院右都御史理院事尋加太子太保景泰五年改吏部尙書翰林院大學士典機務五年加少保兼東閣大學士修寰宇通志爲總裁書成加謹身殿大學士後贈太保諡忠愍事蹟詳明史列傳

耿九疇字禹範盧氏人永樂末進士宣德六年授禮科給事中議論持大禮有清望正統初大臣言兩淮鹽政久壞宜得重名檢者治之於是推擇爲鹽運司同知痛革宿弊條奏便宜五事著爲令母喪去官場民數千人詣闕乞留十年正月起爲都轉運使節儉無他好公退焚香讀書廉名益振婦孺皆知其名以事見誣逮下吏已得白卽留爲刑部右侍

郎屢辨疑獄無所撓屈禮部侍郎章瑾下獄九疇及江淵等議貶其官瑾壻給事中王汝霖銜之與同官葉盛張固林聰等論刑部不公九疇淵遂劾盛等且言汝霖父永和死土木嬉笑自如不宜居職時景帝新立急於用人置汝霖等不問瑾如奏鳳陽歲凶盜且起勅往巡視招撫奏留英武飛熊諸衛軍耕守招來流民七萬戶境內以安兩淮自九疇去鹽政復弛景泰元年仍命兼理尋敕錄諸府重囚多所平反十月命兼撫江北諸府三年三月代陳鑑鎮陝西都指揮楊得青等私役操卒九疇劾之詔按治且命諸邊如得青者具劾以聞邊將請增臨洮諸衛戍九疇言邊城士卒非乏將帥能嚴紀律賞罰明信則人自奮不然徒冗食耳乃不增戍邊民春夏出作田秋冬輒徙入塞九疇言邊將所以禦寇衛民也今使民避寇失業安用將帥因禁民入徙有被寇者治守帥罪四年布政使許資言侍郎出鎮與巡按御史不相統事多拘滯請改授憲職便乃轉右副都御史大臣鎮守巡撫皆授都御史自九疇始有旨市羊角爲燈九疇引宋蘇軾諫神宗買浙燈事事乃寢災異求言請帝延儒碩公賞劄擇守令簡將帥優詔報焉天順初議事京師帝顧侍臣

曰九疇廉正人也留爲右都御史罪人繫都察院獄者不給米九疇爲言乃日給一升遂爲令已上書陳崇廉恥清刑獄勸農桑節軍賞重臺憲五事帝皆嘉納是年六月御史張鵬等劾石亨曹吉祥亨等謂九疇實使之遂并下獄謫江西布政使尋調四川明年禮部缺尙書帝問李賢賢曰老成清介無如九疇乃召還既至憐其老改南京刑部尙書四年卒諡清惠子裕自有傳

錄明史

案清惠公之父爲盧氏廣文始占籍焉故其束鹿之本籍亦不可略也

耿裕字好問刑部尙書九疇子也景泰五年進士改庶吉士授戶科給事中改工科天順初以九疇爲右都御史改裕檢討九疇坐劾石亨貶裕亦謫泗州判官終父喪補定州成化初召復檢討歷國子司業祭酒侯伯年幼者皆肄業監中裕采古諸侯貴戚言行可法者爲書授之帝聞而稱善歷吏部左右侍郎坐尙書尹旻累停俸者再已代旻爲尙書大學士萬安與裕不協而李孜省私其同鄉李裕欲使代裕相與謀中之坐以事調侍郎黎淳南京而奪裕俸言官復交劾宥之裕入謝既出帝怒曰吾再寬裕罪當再謝今一謝以

奪俸故意鞅鞅耶孜省等因而傾之遂調南京禮部而以李裕代踰年孝宗嗣位轉南京兵部叅贊機務宏治改元召拜禮部尙書時公私靡侈耗費日廣裕隨事就正因災異條上時事及申理言官先後陳言甚衆大要歸於節儉給事中鄭宗仁疏節光祿供應裕等請納其奏巡視光祿御史田齋以供費不足累行戶請借太倉銀償之裕等言疑有侵盜弊請敕所司禁防帝皆從之南京守備中官請增奉先殿日供品物裕等不可帝方踐阼斥番僧還本土止留乳奴班丹等十五人其後多潛匿京師轉相招引齋醮復興言官以爲言裕等因力請驅斥帝乃留百八十二人餘悉逐之禮部公廨火裕及侍郎倪岳周經等請罪被劾下獄已釋之停其俸初撒馬兒罕及土魯番皆貢獅子甘肅鎮守太監傅憲先圖形以進巡按御史陳瑤請却之裕等乞從瑤請而治憲違詔罪帝不從後番使再至留京師頗有宣召裕等言番人之道因朝貢許其自新彼復潛稱可汗興兵犯順陛下優假其使適遇倔強之時彼將謂天朝畏之益長桀驁且獅子野獸無足珍異帝即遣其使還尋代王恕爲吏部尙書加太子太保御用監匠人李綸等以內降得官裕言先有詔文

官不由臣部推舉傳乞除授者叅送法司按治今除用綸等不信前詔不可給事中呂獻等皆論奏裕亦再疏爭終不聽裕爲人垣衷諒直諳習朝章秉銓數年無愛憎亦不徇毀譽銓政稱平自奉澹泊兩世貴盛而家業蕭然父子並以名德稱九年正月卒年六十七

贈太保謚文恪

錄明史

賈俊字廷杰東鹿人以鄉舉入國學天順中選授御史歷巡浙江山西陝西河南南畿所至有聲成化十三年自山東副使超拜右僉都御史巡撫寧夏在鎮七年軍民樂業召爲工部右侍郎二十一年奉敕振饑河南尋轉左數月拜尙書時專重進士舉人無至六卿者俊獨以重望得之及孝宗踐阼尙書王恕李敏周洪謨余子俊何喬新都御史馬文升皆一時民譽俊參其間亦稱職諸王府第塋墓悉官予直而儀仗時繕修內官監欲頻興大工俊言王府既有祿米莊田請給半直儀仗非甚敝不得煩有司公家所宜營惟倉庫城池餘皆停罷帝報可宏治四年中官奏修沙河橋請發京軍二萬五千及長陵五衛軍助役內府寶鈔司乞增工匠浙江及蘇松諸府方罹水災而織造錦綺至數萬匹俊皆執

奏竝得寢工部政務與內府監局相表裏而內官監專董工役職尤相關俊不爲所撓工役大省太廟後殿成加太子少保足疾致仕詔許乘傳歸給夫廩如制踰年卒俊廉慎居工部八年望孚朝野

錄明史

王宗彝字表倫號守拙別號留耕太保文季子欽賜舉人成化丙戌進士授戶部主事陞郎中擢都察院右僉都御史巡撫遼東左遷四川布政司參議松茂運道轉河南布政司參政尋轉本司右布政遷都察院右副都御史巡撫陝西轉兵部右侍郎尋轉左經略邊務陞都察院右都御史掌院事晉南京禮部尙書卒諡安簡事蹟詳明史附傳

賈道字會稽正德甲戌進士授山東益都知縣陞戶部主事監河西務稅講明道學爲士林矜式居官峻潔卒之曰無以爲殮時論高之

賈衡字守準號平軒又號鹿巖山人父運正德戊辰進士官陝西按察司副使衡生卽穎秀博覽羣書於詩賦傳記諸體無不諳正德辛卯舉賢書嘉靖丁未成進士除授刑部廣東司主事廣東司事多與錦衣衛關涉有囚徒法應論死錦衣陸炳者勢烜赫屬大司寇

從未減衡執不可大理駁獄覆審衡堅持前議大司寇怒調他司釋之由是權貴側目以憂去甲寅補禮部儀制司會京師疫上親製藥方命禮官療之衡分療東南二城全活獨多丙辰禮部會試衡司提調侍郎吳山知貢舉御史徐紳吳遵監試吳山素暴橫與監試爭坐衡正言調停深啣之轉營繕司員外郎舊例瓊林宴坐次營繕司先期繪圖呈首相時嚴嵩父子當國世蕃見圖怒曰吾坐何側衡曰有父翁在蕃曰此朝廷大典寧序家庭耶衡曰爭父坐似非人子禮爭殿上似非人臣禮願執事熟察之世蕃裂眦以視衆咸危衡衡坦如也陞僉事分巡河北時宗室強暴盜賊竊發衡申法紀練民壯設鄉兵政事一新又捕校從夏應時擒巨寇馮黃拿問不職知縣杜廷宣嚴禁鄭世子爲李秀才申冤稱河南治行第一卒爲嚴世蕃吳山所媒孽落職歸

李性字存夫號循齋幼負才砥礪名檢嘉靖壬午舉於鄉除海豐知縣地瀕海鹵薄榛莽民多逃亡性招徠復業賦乃足額調繁淄川邑素獷悍好訟難治性廉謹剛直刁悍斂跡由東昌司馬擢南京工部員外部有造甲鑄錢事例與宦豎關涉多掣肘智巧爭避之性

毅然有爲皆中機宜宦豎初惡之後亦安然無所忤督儀真閩慎興革時啟閉監蕪湖稅
洗相沿陋習商旅便之有厄之者遂降職出貳陝西寧州性拂衣歸方性之由山東之工
部也海豐淄川如失父母去後德之思之兩邑父老自裹餼糧歲時起居其家間關至止
絡繹不絕如此者殆數年云

喬英字伯藏號南莊先山西浮山人明永樂占籍東鹿爲瓦窰頭村人英穎異不羈不事
家人生產補弟子員有文名督學御史王浚川奇之嘉靖壬午領鄉薦明年癸未第進士
初授行人兩使藩府于常例金力却之時稱其廉遷南京浙江道監察御史論時政得失
辨奸邪審用舍明黜陟正紀綱選將練兵節財汰冗疏凡十數上上皆嘉納巡按上江計
擒妖人虞順勦巨寇朱漢等江防肅清有張承祖張道相者訟數年不決英一訊得其情
會王晉溪某進位冢宰輿論不協英抗疏劾之言過激上怒繫下錦衣衛獄鞫上旋悟詔
復其官權辛歛避陞陝西布政司參議分守涼州邊事孔棘官儲告匱英區畫兵餉捷上
璽書金帛勞之陞陝西按察司副使素與御史唐某忤唐誣劾事白唐坐貶英復任分巡

西寧爲參將崔騏申冤復遊擊金鑑職振揚風紀邊陲賴之遷陝西苑馬寺卿解綬歸卒于家

張其命先世洪洞人明永樂時徙居東鹿之圈頭村家素豐稱大族高祖贊仗義好施雖以農業傳賢士大夫重之門多長者車轍父正名隸博士舉四子其命居長初名基命避諱更今名幼穎異補弟子員有聲負奇多傲骨風節巖峻人畏之喜讀書午夜不倦先世田舍盡畀諸弟已不與以遠大自期每聞人苦艱大事輒笑無負荷才舉萬歷丁酉孝廉無異爲諸生時絕干謁常曰貧視其所守安得撓吏治而利人錙銖耶屢困公車會以才貌選乙榜授官父強之出除湯陰令爲河南治行第一有進士某者爲同官以科目矜多猜忌其命不能脂韋從俗每相忤中丞御史又偏愛其命才疏薦膺上考由是某疑其命陰相讐深銜之當是時重科目惟進士得與行取既而某授監察御史其命以憂去服闋某抑之左遷陝西按察司知事嘗爲秦王草文王知文奇之以示制府制府劉某惜之曰以若人而屈此官耶是函牛之鼎以烹雞也特疏薦宰文縣文古陰平地東連漢中西接

隴右以蜀爲襟喉界外布西羌部落設禦防兵稱巖邑時苦旱捕租無寧晷又奸宄霸市多跳梁民不堪命有司依違於吏兵之間卒掣肘其命簡重有威下車登堂舉袂慷慨吏胥抱牘辟易莫敢仰視悉與更始首重文學除士子二百餘年徭役之累吏治一新未幾攝階州事甫七日有汪千戶者勒餉激變三路士卒引西羌諸番擁城下譁聲如雷勢鼎沸城內錯愕周張咸束手其命曰變起倉卒無可禦惟有說而解之守士官各惶惶然目相視乃自請行羣皆以爲不可其命挺身出訣其僕從曰此出濟則國家之福也否則以身徇爲我歸謝家人大丈夫官絕域爲朝廷扞衛馬革裹尸分耳毋以我爲念隨啟門單騎趨江潏士卒望之氣奪退江以南其命開陳利害士卒傾聽無敢譁者卽縛汪千戶至軍朴之士卒卸甲胄叩馬呼天圍以解越五日黠者造蜚語軍疑又譁復單騎馳出遇中東兩路軍復諭之聽命如昨獨西路十二寨暴橫夾江而陳其命直入壘門暴者跪受命圍又解階州安秦中皆賴以安大吏奇之調繁陞安定由是其命名播三秦云銜之者又抑之左遷河南幕撫軍惜之如陝西按察時陞湖廣永州推官銜之者終不釋未任又左

遷衡府長史以憂去築別墅曰小東山將終老焉天啟初用人望復職授龍安府推官膺特薦哈州知州無於卒何官子繩文蚤卒繩康時稱爲長者俱諸生孫士晉諸生能文章世其家學焉

李鳳翔字漢儀萬歷丁酉舉人南京戶部主事性廉介先知山東荏平縣辨周朴冤獄時稱神君有辨冤招參先於世

馮冕字季服號元容先世洪洞人七世祖德昭遷東鹿冕生而穎異從高陽孫文正公學爲高弟子以里選入成均聲籍甚丙午舉孝廉除河南內鄉令內鄉與秦楚接壤礦洞幾千餘里大盜竊發冕計捕之居兩月皆鳥獸散邑有老高堰水田甚饒積久成汙官民交病冤相形勢穿舊渠稱上上田民呼曰馮公堰又置社學九十七區邑傳通鄆襄爲北入孔道應役者多偏枯傾家冕均之三十四堡百姓爲之立石世守當明神廟時尙科目冕以孝廉筮仕稱治行第一諸長吏大奇之曰此固孫太師高弟也尋卒於官子九人季子瑾孝廉浙江按察使廉介有父風餘俱以文學稱

李鳴珂字趨宸員外郎性之元孫也生而穎異年十五應童試時經略熊廷弼司李保定同郡守校閱試卷奇其文拔冠二十城以國士遇之萬歷己酉領鄉薦癸丑以額限置副榜無極縣教諭陞國子監學錄歷禮部司務遷戶部員外郎權舟清源稅課舊例稅課溢額皆充監官私橐時餘萬金掾吏以白鳴珂叱之曰奉使權舟以裕國耳寧家私耶盡解充帑晉本部郎中陞陝西鞏昌府知府丁艱服闋補山東萊州府知府銳意釐剔百務振舉懇荒地七千畝又搜括民屯六千餘金節省召買四千金皆關白臺司無私裝性喜延攬所拔皆一時知名士如掖縣李森光膠州張懋燔法若真皆出其門掇巍科立顯名焉當明啟禎時承平日久武備盡弛鳴珂繕城垣實倉廩儲軍需日不暇給未幾登州失守圍萊七閱月不下乃德其縑繆之力云守萊三年陞山東鹽運司運使時山左鹽課缺額鳴珂調劑足之商竈不困出俸薪公費千三百金助餉擢山西冀南道右參政當鳴珂之報最也內外大臣署上考會南北臺官水火南臺官竟撫蜚語中傷之鐫級改授拂衣歸崇祀萊州府名宦子六人長世洽進士山東督糧道參議稱名宦

耿啟字汝東號瞳初事繼母以孝聞性廉介貲產讓於弟淡泊自甘己酉舉孝廉內辰第
進士宰安邑時安邑志書殘缺啟博采編訂成書舊有育才館廢啟復之令諸生肄業秦
豫人士爭赴之文風蔚起戊午分校鄉試所拔皆知名士丁憂服闋補山東嘉祥令治如
安邑歷戶部工部員外郎差葺御垣經費各以千金計啟止三百上嘉悅又司節慎庫數
月出納百萬餘金絕乾沒出守鞏昌府治狀嚴毅苞苴不行時流賊猖獗所在蹂躪啟守
鞏有法賊不敢窺遷寧夏道副使忤上官意鐫級歸里築室城南隅素善琴居恆鳴琴自
娛蕭然終老次子邁亦善琴知名三子遷四子遡孫襄褒俱博士以文學世其家

張鵬翀字襟溟號凌虛先世長垣人明永樂時遷東鹿之月營村籍焉世以殖學隱德甲
閩黨父歆舉丈夫子六人傾其腴產延名儒教之皆鵠起膠庠中鵬翀居季更矯矯天啟
辛酉督學左光斗拔冠曹偶領畿薦壬戌與黃道周倪元璐同出於左諭德韓曰纘門三
人相友善艱大相勗弗以撫仕期也捧檄令確山確冲疲役有馬戶夫頭值者家立傾鵬
翀用額設工食募應不以病里甲民德之確南至信陽去百八十里中途無稅駕所鵬翀

自明港驛設皇華行者稱便又獨俸粥荒活周澤等千餘家時璫燄張甚節斧皆私人鵬
狎齟齬之遂中乙丑計典得銕格改應天學博轉國子監學正丁卯晉民部以憂去服闋
補原部司津遼及中原練餉時中原多故驟添督撫強鎮標兵數十萬度支維艱鵬狎左
支右詘中外無庚譁舊例以所任繁劇期歲得瓜代躡遷大司徒畢自嚴愛其才復任之
再歲晉寇南向入懷衛神州孔棘司徒侯恂訟言於朝寇踰太行如饑虎出柙非大創之
不得靖然難其人以我所知未有如張鵬狎者爰副豫憲備兵睢陳間中州二百餘年不
見兵革出蒐軍實鏽鐵枯杆兒戲具耳鵬狎併步爲騎彎弓挾矢而以神機諸器爲佐嚴
汰中下馴募補材勇無拘額得勁卒六千人自傾家產獨俸金贍之時爲崇禎癸酉自是
日與寇相搏甲戌八月賊譙屯兩河幾三十萬大小七十二營入睢陳抄掠凡百至皆失
利去當流賊之屯兩河也譁兵附之聲勢乃大每寇一地皆土賊嚮導始躡入蔡溝有鄭
貴邱二毛平頭槩有郭三海西平有侯鷺鷺嘯聚數萬與賊結連官兵數戰數敗績鵬狎
擢介冑叠戰擒之當提兵下西平軍饑浹旬不食啜野菜以飽有覓得麪餅進者鵬狎却

之曰忍民兵枵獨果腹乎由是三軍感激泣下爭用命諸賊悉平汝穎間得稍隙丙子正月賊犯永城鵬翀偕副將祖大樂禦之鏖戰自辰至酉斬賊渠混天王奪驢馬軍器無算隔旬再至復破之賊精銳幾盡餘衆奔宿州鵬翀卒有紅旗軍千人皆選銳賊望旗驚竄曰張長頭兵來矣謂其好赴鬪也越三年不敢犯其境項蔡接壤名古曆即古互鄉地沮洳不毛萑苻爲窟有郭三純者三海弟也與蔡溝平頭相犄角鵬翀勦之宥其脅從改鄉名曰潔已創與言書院延師儒訓迪群竇刀買犢獷悍不法者一日革心甲戌以後豫中荒盜頻仍褫逮無虛日官其上者皆不樂就寮采半虛鵬翀兼攝臬守學驛縮五篆神智愈剛明有官太史者多珍行鵬翀拔其羽周府鎮撫曰牲牢其民鵬翀破柱得法治之以故薦墨媿媿推節鉞者再時朝廷之上以門戶黜陟鵬翀與黃道周倪元璐善異已者多指目之六載不遷官終以奸人齟齬置之宣府口北之極邊地顯謂借才實遷之也鵬翀官睢陳心力俱困賴時嘔血移節赴口北道亡於封邱之郵署焉鵬翀性孝友生平無私蓄兄弟六人雖分居猶合爨也居恒好與人鬪聖奧旁及書繪無不工云

國朝

馮聖兆字魯望號溇洲前明丙子孝廉筮仕判山西潞安府多惠政潞人德之甲申流寇陷潞安太守委城走潞人爭蔽聖兆得不死賊退羣請聖兆視郡事與民爲守備王師破賊賊走山西復攻潞公登陴厲衆士卒氣百倍圍十餘日不下迨王師徇晉問全城者誰之功衆以聖兆對由是委攝兵備王師入關糧餉無缺秦楚底定論功晉僉都御史巡撫宣大順治六年姜瓖反大同宣府總兵官某素善瓖張逆勢以恐其軍軍大譁聖兆從容諭之曰頃密檄至大兵已次居庸瓖不日成禽何能爲若輩慮餉不給當竭帑以濟乃饑敢再譁者從軍法某氣懾疑阻不時發聖兆卽夜遣中軍調其精銳三千人防河以軍令促之行遲明始移某孤軍不敢動異謀遂寢已而王師討瓖一切糧芻火藥皆聖兆預爲備捷聞賜貂裘一襲晉右副都御史嗣宣大巡撫缺裁軍民涕泣送者數萬人甲午復補延綏巡撫陳請終養詔許之母卒賜祭葬聖兆居喪哀毀骨立乞休卒於家

張鼎彝字清臣號東巖康熙乙未進士授選汝寧府司李將渡河指水誓曰今而後有異

初心者不復渡此及抵任案無留刑無濫在任五年生全人性命不可勝紀癸卯擢行人司行人奉命東至山左西入巴蜀南抵百粵諸所經過聞有不便於民者必白之當路力請釐剔壬子推擇爲吏部歷封功選三司皆以能顯聲郎署閒癸丑分校禮闈所得皆一時名士丁巳陞順天府丞未幾丁內艱服闋補奉天丞維時學校之積弊實深冒名尤甚爰悉爲除之又鄉薦歲額止三人甲子秋試特疏請廣中額一名召還時士子遮道涕泣送之官至左通政

張翰揚字翼冲號耐菴少以孝聞性嗜讀書冬寒弗間遇盛夏夕不焚膏搆香火默識每至夜分乙酉領鄉薦己丑捷南宮除貴筑令邑附會垣車書旁午冗如蝟集任事不遑安寢起五漏者兩月餘而案無留牘焉方其始選也貴筑遠濱南徼又古夜郎地苗民雜處頑梗難治僉以掣肘爲之虞孰知不事鞭朴以德化之而百務俱理地缺鹽借食四川價素騰踴翰揚許納草束易鹽斤苗民使之懽忻頌禱衆口成碑先是省垣關稅經理不得其人非虧額則濫徵撫軍毛公舉以委之翰揚隨時收解數年之積弊悉除繇是辦事樸

誠之望徧黔中矣歲癸卯甲辰兩校秋闈所得士不愧知人之目入簾時有以言餽之者
答云我儒素起家讀書得第不敢爲苟且事其人慚而謝曰吾固素知公茲愈信名實之
相符且以下子孫之必熾矣在任四年惠政浹洽推吏部主事未赴任卒於黔子洽聞字
集思候選州同知卓犖不羣讀書皆通大意弱冠時未得在籍應試即隨父任之黔貴筑
本繁劇公務之外凡可任勞者無不迎機立辦維時黔之上游莫不曰貴筑有子方欲交
章薦引俾接門楣祇以仕進無心悉爲婉謝當翰揚之卒也行李一肩程途萬里洽聞扶
櫬遄歸喪葬無不如禮治家嚴於課子和以接人年愈高而德彌劭鄉里奉爲喬嶽孫鍾
秀卽洽聞之子也壬申舉人初任新樂縣教諭歷任山西汾西太平等縣善政繩貴筑陸
太原府同知遞署寧武蒲州二府晉省倚以爲重焉終養後遂不復出時年已七十有六
猶矍鑠云

郭正誼字欽舒號鹿峰由優貢選四川長寧令長寧地勢窪下但知藝稻正誼教以種麥
一歲兩穫戶益充足又以邑處山僻人不知學設義館數十區捐俸延師寧人始尙文雅

在任數年刑無濫用百姓懷之稱循吏焉卒於官

王紹剛字性常由附監生授襄城教諭陞福建南平知縣代前令補額者數千金在任數載勤於撫字處膏不潤焉及歸籍後值新河土寇之亂東邑男女被擄者剛悉爲捐金贖回令室家完聚蓋其厚德之足稱又不徒政聲之弗泯矣

裴瀾乙丑明通進士官江南泗州州同知先是丞倅交代率相習爲具文瀾抵任諸事必嚴考較曰此朝廷職守之所繫一事游移則事事鮮據矣勤慎効職故雖曰佐郡無曠官之誚亦無越俎之謀去之日百姓德之不減甘棠之愛焉

孝子

元

穆茂中里廂人性篤孝友讀書治田父卒哀毀盡禮每日拜於墓所食粥三年不御菜茹
董至正間授永平屯田總管府陰陽教授

明

王瓚字宗器在城社人父文智歿時瓚年十七悲號氣絕三年斷葷酒母張疾嘗藥每夜拜禱祈以身代母尋愈年九十始卒瓚六十三哀毀逾孺慕

華玉三邱社人早年父故事母至孝母八十歲卒廬墓三年

賈倫字秉彝邑學生四歲喪父養母至孝母歿廬墓三年以歲貢授武鄉縣訓導稱爲孝順先生

賈衢縣學生性狷介母病卒哀毀骨立廬墓逾年遭大水聯木爲筏不得食者三日或勸之歸對曰豈以患難易吾心哉竟終之

王復宏舊城人事父母承顏順志宗族鄉黨稱之萬歷年間知縣袁夢庚旌其門曰孝思不匱

劉可成石碑村人國學生少孤事孀母唯謹萬歷年間知縣涂一榛旌之曰孝行可風

李守榮南小陳村人竭力事親終身不衰以孝聞萬歷四十八年知縣王永壽表其門曰孝行

尙鉞城西田家莊人事繼母王氏如生母縣丞梁範旌之曰孝行流芳

國朝

張大吉縣諸生月兒營人賊劫於家執父張邦輔拷索傾囊未厭將殺之大吉挺身下樓與賊鬪父子皆遇害

強瓊妻新莊人五歲喪父嫡母趙氏撫之成人娶妻李勤織紡以奉甘旨趙得痿疾臥牀二年餘瓊夫婦口啖母執穢污及卒有田六畝質之營葬里人稱焉

喬柱明一間房村人諸生喬嶽子事繼母如生勞而不怨父患癱凡飲食起居柱明皆與共終身不倦父九十五歲雖病不衰人謂孝養之善云

張宏志縣諸生谷馬營人以孝聞里人舉於官知縣劉崑旌其門曰曾王媲美

尙之桓縣諸生城西田家莊人十一歲喪母事繼母張承顏順志待異母弟曲盡友道母語人不呼名但曰我家孝順兒

馬獻瑞辛集人性至孝年六十歲依依膝下如小兒鄉人聞之官署縣事通判金士駿表

其門曰孝可維風

路開泰東狼穴村人順治年間開泰父天運遠出不歸開泰鬻產裹糧尋覓足跡幾遍天下經十餘年之久始與父遇奉之以歸與母完聚後父母相繼卒厚其殯葬家落至衣食不充殊宴然

李棟小士莊人候選州同知孝出天性自弱齡時卽解色養母張氏臥病九年晨昏奉侍歷久無倦其父家法素嚴或遇撻責怡然領受事無鉅細必稟命而後行宗族鄉黨無間言焉康熙三十五年學憲給匾以旌其門

馮志中在城人太學生孝友端方乾隆九年闈屬公舉知縣李成蹊詳請登彰善坊

田宗參太學生有至性方垂髫時百意娛親搔背摩跗依依膝下每父他出近必迎與偕來或少遠待至更深弗倦茶水需用諸務事畢而後即安父病延醫侍藥衣不解帶者數月餘及父歿哀毀骨立幾不欲生衣衾含斂之具纖悉必周廬墓期年遇母違和召之始回事寡母先意承顏事必稟命視父生前尤加謹焉乾隆二十六年學憲旌其門曰至性

純篤

張琳張古莊人邑庠生至性過人九歲時父患目疾久而失明琳日夜泣禱疾稍差里人稱爲孝感壯年尤加敬謹就養無方親歿哀毀禮葬後廬墓三年朝夕哭奠以奉祭掃迄今墓側遺址猶存

劉輝東莊村人貢生天性篤摯幼年失父事母李氏晨昏無失節事必稟命而行及卒哀毀骨立幾至滅性殯於內庭廬於中門外三年不入私室葬後祭掃必親過墓輒下車雖匆遽未嘗偶忘也生平守正鄉人多薰其德而善良焉

李闕位伯村人武庠生至性純孝父病四年日夜不離於側父沒後三年不入室鄉里重之

謝開先字玉子中康熙丁酉經魁學品醇粹鄉里重之太守倪舉開先廉潔孝友開先流涕辭曰非不愛此名也第顧名思義心甚不安我寒素無所資以與世爭不可以名廉有父不得養不可以爲孝奈何被以無實之名哉太守不能奪先是開先襁抱時父即遠出

後開先稍有知識向母詢父輒涕泣不食由是到處踪跡跋涉數千里比及相遇而父已爲方外遊年八十矣開先號痛請歸蓋其父亦高士也當太守勸駕時開先父尙未歸故云後開先筮仕山西平順令兩校鄉闈稱得士而爲治一以實行爲本云
謝二麻事母至孝賣水以供養每飯必在母左右視食之多寡爲喜憂及母歿日夜仰天流涕寢食俱廢人勸之不能解終以哀毀而死

義行

明

張瓚字大器號南林新圈頭鎮人家素封富而好施值歲大侵出粟賑饑周婚喪無算有大賈舍其家死暗遺重貲後賈人子至悉還其金且性好客多與賢士大夫遊論斷古今成敗多中肯綮時重之太守屠東洲嘗以詩贈有春蘭秋菊香盈砌潯水恒山秀在門之句蓋謂其子孫之盛也

陳積善大士莊人性慈祥施藥餌每三冬施饘粥貧人來依者常至百餘人至二十餘年

卒乃已

張自誠舊城人捐穀濟貧造橋梁凡有益人者皆樂爲之萬歷年間知縣表其門曰尙義
范世官新城人萬歷二十四年三月內捨地二士畝爲塚一在東關一在西關又因瘟疫
流行人死者衆捨棺三年

馮伯高舊壘頭村人時施貧人棺每冬施粥三月皮衣三十領如此者二十餘年既沒乃
已

劉自成木邱村人輕財重義造橋梁設義渡捐錢粟賙貧凡利人事皆爲之不倦尤善排
解鄉人賴之

尙之樸西田家莊人性友愛家僅中人產喜濟貧施藥歷十餘年不倦

趙進宅南四塚村人捐金百餘兩於本縣城隍廟建造門殿三間照壁一座舉耆老與鄉
飲禮知縣沈元忠楊子廷相繼給匾

王鶴鳴在城人邑庠生崇禎甲申流寇猖獗荇乘機竊發捐助兵餉邑恃以無恐時里

中多亡命陰伺邑之大戶謀吞噬之鳴獨摘其渠魁控諸上憲咸代爲危之及置衆惡於法人始服其膽識生平濟困扶危里有緩急以所餘周之有古人麥舟之風

張吉福房家莊人性倜儻有幹濟才當明崇禎年間連遭荒旱官比正供日事扑責人皆逃散福詣本縣暨諸上臺力陳苦狀撫軍憐之入告奉旨自十三年至十五年錢糧槩行豁免逃亡復業全活多家至今共頌之

李瑄字至尺邑庠生天性慷慨講任卹明末盜賊蜂起村落率不安瑄設法防禦附近十餘莊賊不入境至今人猶德之焉

國朝

賀炳石家莊人太學生性慷慨尙義每冬月施衣服數年不倦鄰里無號寒同鄉有貧婦夫久出不歸無以度曰欲改適炳詭寫書信封銀五兩使人遺之言是其夫所寄婦因不嫁後其夫歸家室完聚感德終身其生平大致類如此

韓夢熊雙柳樹人太學生性慷慨里有張秋子母死無殮具代置棺木陳光宗貧不能娶

代爲完婚俾立家室又喜成就人材儒童陳乏糊口助薪米以勸讀後入泮他如排難解紛和睦鄉曲尤遠近所首推云

賈燦賈辛莊人貢生性慕義品行端方處鄉閭無間言合邑公舉善行乾隆九年知縣李成蹊書姓名登彰善坊

孫學誠監生住小章村家素饒尙義好施貧乏蒙周卹者甚衆尤加意憐才念寒家子弟課讀無資創建義學施地畝以充膏火費數十年來成就頗多子尙志克繼前芳迄今咸頌義舉云

李修實監生居南小陳村平生慕義恐寒士讀書無資即有聰明子弟每致埋沒因創義學一所講堂住室歷歷有條復捐地六十畝以爲延師之資其好善樂施類如此

王璞賢邱村人家世務農鄉人重其謹厚宗族戴其任卹順治六年與鄉飲禮知縣武憲臺給匾曰鳩杖龐然卒年一百歲

曹順舊寨村人中年喪妻誓不再娶至九十六歲耳目聰明健甚出作入息陶然自樂有

太古風

賀勝字名威武岸生性情爽直好施與授徒課弓馬於貧者率助以資斧故數十年來多所成就云

杜進字從先平生跬步不敢苟而治家一以節儉爲歸然敦尚任卹凡遇族黨艱於婚喪者莫不助其成禮知縣王天慶曾獎其門

尙朝陽辛村人太學生無子胞兄朝椿有子二長論次友朝陽遂以朝椿之次子友爲子先是兄弟久經分爨朝椿爲鄉耆論列邑岸自朝椿沒後論食指繁而產微朝陽專務農日益饒裕至是友請於朝陽願與兄論仍合產朝陽曰吾久有此心不料爾之先獲也遂許之論堅推讓弗得辭竟合爨焉識者謂較九世之同居猶多厚德云

郝懋賞字豐功歲貢生天性孝友篤嗜詩書少績學能文有聲岸序繼以屢薦未售遂課徒終身多所造就晚歲嫺睦任卹之誼愈著歿之日人多惜之

穆錫朋癸卯舉人少循謹以孝聞成童時卽以遠大自期早歲列膠岸嘗館於村塾有鄰

婦夜奔之拒弗納其他制行概可想見焉

五代同堂附

周煜原任山西沁水縣知縣周璣之父乾隆五十七年十一月初三日彙題五世同堂本月初九日奉旨依議給有匾額緞疋銀兩

郭維寧小章村人祖芳父慎行維寧皆親見之子完完之子葆光葆光之子成義成義之子綿曾時已三歲而維寧猶嬰鑠云

李思慎南小陳村人祖作相父修忠思慎皆親見之長子化龍次子乘龍長孫彥次孫雄曾孫經芳次曾孫椿芳元孫五悃

曹諤縣城內人太學生子殿臣孫秀文曾孫呈祥元孫五榮

四世同居附

趙嘉言東良馬村人家素饒裕四世同居每會食五十餘人兒孫侍祖食婦女侍祖姑食一人不至不舉筋凡遇歲時伏臘祖坐堂上子率孫曾拜畢命之坐舉觴上壽雍雍如也

心存濟物見醫方每手書之遇病者施藥輒愈居恒語子孫曰人苟存心愛物於人必有
所濟勿以善小不爲也延視病者無論請遠近貧富皆往或有酬謝則拂袖去

文苑

唐

耿漳字洪源弇之後也河東人遷於束鹿登寶應元年進士第官右拾遺工詩文清新俊
逸一時人士皆推重之與錢起盧綸司空曙諸人齊名號大歷十才子全唐詩小傳云漳
詩不深琢削而風格自勝有集三卷今編詩二卷

明

李鳳翔字伯鳳號雲冲性穎悟經書一目數行下年弱冠補博士弟子員稍長益力學窮
究奧秘諸子百家無不通尤工帖括以王唐歸胡諸大家爲宗聲名藉甚每試輒冠其曹
上谷郡守暨督學使者咸重其才以遠大期之萬歷己酉與子鳴珂同出沈中翰門以額
溢置甚爲扼腕卒以數奇不遇晚年絕意仕進愈博覽羣書授徒課子環堵蕭然後子鳴

珂孫世洽皆登科第其源蓋有自也

耿光字覲齋少負文名補邑庠生博通經史有世外志喜陶淵明詩慕其爲人嘗曰讀陶詩悠然見南山句超然物外自是羲皇以上人語然棄世逃名在五斗折腰後猶晚也又讀韓昌黎送李愿歸盤谷序云人生不得建大功立顯名垂於竹策而僅逡巡科目躑躅風塵中真如苦海與其有譽於前孰若無毀於其後旨哉斯言乃謝經生業嘯歌杯酒自甘放浪善填詞婉麗可風著有寄傲集

郭良時字靜宇諸生嘉靖丁酉科舉人朝宗曾孫讀書樂道足不履城市家故貧產讓於弟設帳教生徒借館穀以供甘旨人以盛德重之萬歷末年督學左光斗舉德行里有二惡外少鬪於巷羣排解之不息遙望見良時相謂曰郭公來矣各罷去又有夜盜禾者晝植物別良時疆界詰旦鄰禾盡刈良時禾卒無恙其爲人推重如此子如僑稱老儒束鹿舊志事實皆其所採訪也

國朝

張鵬犴字乘虛號素侯生而穎異補博士弟子員試輒高等省試每不售當故明崇禎時天下將亂乃絕仕進謝帖括肆力古文詞間以詩酒自娛闢家塾教子姪輩講解窮理盡性之學順治甲午例當歲貢鵬犴曰吾昔壯年值世亂甘老田里今老矣安能蹙蹙塵土徇博士章服乎不應讓其次者子鼎彝成進士官行人封如其官無異爲布衣時時稱爲有道云

耿邁字子行號止菴副使啟仲子髫年補郡學生資質警敏博學強記不濫交制義根據理要居然大家書法精董華亭畫本宋元諸家一時求書畫者戶外履常滿詩類何景明尤善琴所著有嚮山堂集藏於家

李世澤字克承歲貢生嗜讀書至老不倦凡諸子百家過目輒不忘學問淹博爲一邑最有問奇者必歷指其所以然然性恬退無意功名年滿選東安訓導不赴以詩酒自娛生平著作甚富雅不喜浮名多銷燬故詩文不概見云

賈曰千字億君歲貢生選柏鄉訓導友教四方老而不倦一時名士多出其門

李毓樾字蔭長博極羣書尤留心經學所著有大禮會通一書由貢生選順天訓導日與門弟子講究經書奧義及詩文之妙秘積久成帙付諸梨棗名曰京學課業康熙壬午登賢書同榜四十一人皆其弟子又有於藍闈墨之刻惜鄉薦後卽歿未獲大顯云

賈酉字噩軒幼嗜學登甲午賢書選浮山知縣清介自持一塵不染旋里後以友教爲事設學承恩寺寧冀諸郡聞風來學及歿門人爲立墓碑著有課幼清真集

耿襄城內人垂髫時卽通韻語成童列黌宮旋食廩餼爲諸生幾四十年文望日益重海內知名之士多所贈答焉著有芥軒詩稿

武功

明

耿述邑庠生副使啟之子也有勇略崇禎末叛兵寇縣鐵騎數百入城大肆焚掠闔邑不知所措述承父命與家丁楊巨鯨暨城內壯丁擊殺賊十餘人遂披靡遁去而縣賴以安

國朝

齊元輔字佐九高卜營人以武世其家元輔性穎異抱經濟才弱隨冠嗣父山西寧武衛任列名行伍由把總千總薦陞京營守備超擢漳鎮遊擊逆賊朱一貴之亂臺灣失守元輔隨南澳鎮藍公進剿奮勇先登七日奏捷克復全臺以功擢浙閩督標參將旋陞廣東香山協副將香山轄有老萬山巨盜高松香等元輔設奇用間悉擒之制府特薦入覲途次奉命調廣西潯州協陞見之日獎賚頻加給假營葬恩賜葬費六百兩蓋異數也尋擢廣西左江鎮總兵官時鄧橫寨蠻賊梗化元輔與制府議不合被劾問擬遣戍蒙恩寬免發往北路軍營効力隨大將軍進剿科不多累著軍功復以副將補用授直隸河標務關協副將調山西蒲州協副將告休回籍後十年乃卒年八十六

列女

唐

李氏妻王阿足深州鹿城人早孤無兄弟歸李氏數歲夫死無子以養姊高年無供養乃不忍嫁晝耕夜織能辦生事餘二十年姊乃亡葬送如禮鄉人服其義爭遣女妻往師其

風訓壽終於家 錄新唐書

明

劉氏回生社王居簪妻年十八夫死囑造柩寬大可容兩人衆皆疑乃給曰夫有平生衣服玩器遺囑盡納柩中衆然之夫屍未殮自縊死與夫同柩而葬鄉閭賢之

呂氏辛興社李簡妻年十九夫死遺一子孝養翁姑子年十六病死父兄勸改適氏痛哭夫墳旁自縊死

高氏年二十五適邑太守甄譚孫舅早卒事姑至孝正德六年流寇陷城掠其家氏抱嬰兒賊欲污之氏曰吾大家女豈從犬彘乎賊怒刃其子氏且哭且罵遂被害

劉氏年二十一適邑諸生王經子流寇掠其家姑被傷氏往救之曰窮生家道積無斗粟姑老願存性命賊目年少欲污之氏曰吾夫汝逐之吾姑汝傷之恨不割汝肉以飼犬敢犯我乎賊殺之

賀氏狼穴村廩生董一經妻年二十三歲隨夫避難深州城破抗不受辱死

王氏柳科村李友諒妻年二十一夫死遺子一氏誓死守節家貧織紡以奉翁姑翁姑歿
殯皆成禮年六十五宣德六年旌表

吳氏雙邱社甄六妻年二十五夫死無子奉姑李氏終其身年六十七正統間旌表

陳氏回生社賈濟妻年二十一夫死子賈倫甫四歲家貧紡織以供甘旨翁姑憐其少欲
嫁之誓不從翁姑疾每夕焚香拜祝乞以身代擇師訓子充廩膳生孀居五十五年宏治
四年知縣弋福表其門曰節操松筠後倫以歲薦爲武鄉訓導

王氏朱倫妻年十九夫死遺孤方二歲氏孝養其姑撫弱息貞志凜然宏治十九年旌表
郭氏魏伯社官生賈魯妻年方二十夫死無子孝翁姑朝夕不懈守節至七十餘歲

田氏北陳社生員李春妻年十八夫死止遺一子未週歲願從夫死夜縊於夫柩傍時氏
父母弔壻宿其家夢中聞呼救人數聲驚醒見女乃於柩傍解脫良久復甦誓不再嫁孝
奉翁姑姑歿事繼姑如初守節至六十餘歲

劉氏安國社邵齡妻年十九夫死無子守節至五十八歲

李氏在城社王寔妻年二十一夫死撫孤王棟守節至五十餘歲

薛氏魏伯社李悅妻年二十八夫死遺一子甫二歲紡織奉舅姑守節至五十九歲

張氏蔡貢妻年二十五夫死無所出氏誓死守節撫幼姪立後壽躋八十萬歷十六年旌表

何氏楊鳶妻年十九夫死遺孤孟德抱泣柩前誓以死殉妯娒以撫孤勸之氏垢面毀容以見志壽躋七十八萬歷二十一年旌表

喬氏耿虔寺村王希禮妻年十九夫死無出誓不改適姑憫其幼欲奪其志氏聞知自經死萬歷二十四年旌表

宿氏良馬村趙名英妻崇禎六年賊行劫家人驚走氏避樓上賊劈樓門將破氏墜樓死賈氏郭西社監生馬思毅妻年二十二夫死遺子鉉擇師訓子充縣學生守節五十餘歲馬氏回生社鄭孔昭妻年二十一夫死撫遺腹子萬川充縣學生守節至五十餘歲賀氏舊城人適序班李盛時年十七夫死翁姑俱無一女適人亦卒子然一身紡織自給

守節至八十歲萬歷間知縣王永壽表其門曰燕門節操

史氏范良吏妻年十八夫死無出六十二歲卒萬歷間按院倪公旌其門

劉氏試炮營孟學正妻年二十二夫死翁姑俱歿氏甘窮撫孤雲路成立萬歷間知縣旌其門曰節操堅持

傅氏劉家莊蘇守業妻年二十二夫死不再嫁天啟間知縣宋之儁旌其門曰冰操凌霜
劉氏北陳魏村楊士孟妻士孟再從兄士傑崇禎十一年爲亂兵執去妻魏氏改適遺週
歲子三就育於祖父母迨十六年士孟亦爲亂兵執去時氏年二十三歲翁姑皆歿養姪
三就爲己子氏兄曰妹家既貧又少近族子非己出守何爲哉氏不聽後士傑逃歸氏向
感泣謝曰三就非媵母撫養何以成人因讓以爲嗣焉後士傑死杭州氏令三就間關三
千里取父櫬歸葬祖塋里人皆賢之

劉氏譚自登妻崇禎九年建坊

張氏劉天叙妻年二十五夫死誓不再嫁撫孤劉可成訓教有方後可成爲太學生以孝

聞氏年八十四歲卒

薛二姐圈頭薛清女萬歷年間許字同鄉賈北安子賈七兒將嫁而七兒死北安復求爲長男婚清許之女曰以叔妻而嫁伯亂倫也不可自縊死縣丞以公事詣其鄉拘清與北安笞之聞於上臺

國朝

邱氏裴新莊生員王文美妻順治初年大盜李成文圍文美樓劫勢甚危氏墜樓死

劉氏生員張繩舜繼妻前妻王氏遺二女一子氏撫之如己出崇禎十六年繩舜死於兵子士偉七歲家盡破人爭欲奪其志氏曰夫遺囑撫孤曷敢背誓死以守伶仃孤苦以紡衽爲生垂二十餘年教子成立爲諸生家亦復知縣楊于廷旌其門曰和熊媲美

賈氏木店村魏見威妻威死於兵氏年十八無所出久之翁姑勸他適氏泣曰婦去翁姑何倚不從及翁姑相繼歿皆自營葬署事通判金士駿旌其門曰孝節並峙

鄭氏賈百戶村楊長壽妻年二十三夫死無子善事翁姑順治間知縣沈元忠旌之曰冰

霜砥操

任氏孟觀村林自勝妻夫死氏年二十三有遺腹產一女先遺男金尙在襁褓氏雙哺之終身守節

彭氏方碑村支學春妻年二十六夫死家貧矢志守節至七十餘歲

王氏舊壘頭村馮開文妻年二十二夫死無出家貧姑老紡織供養至七十餘歲

李氏鎮頭村王某妻年二十夫因亂死有遺腹後生男撫孤養姑家貧拮据歷盡辛苦

呂氏良馬村趙璿妻年二十六夫死守節至九十九歲

王氏良馬村趙治安妻夫死無出並無親族紡績自給苦節至八十一歲

鄭氏木邱村魏允修妻年十八夫死無出依姪魏武英知縣楊于廷旌之曰貞節可式

鄭氏木邱村張茂斗妻夫死誓不再嫁至七十餘歲

潘氏張岔口劉尙德妻尙德家貧性痴娶氏二年傭工歿於外氏無出並無親族紡績以供姑食人或貽以果餅專以奉姑餘則復進守節至六十餘歲

朱氏田家莊生員田時化妻舉人朱咸慶女孀居五十餘年至七十餘歲

喬氏在城張圮妻年十八夫死不再嫁事姑至孝守節至五十餘歲

馬氏張古莊郭三秋妻年十七夫死撫未週歲子孝舅姑迨舅歿事姑三十餘年守節至八十一歲

楊氏朱家莊周欽妻欽隨叔國垣官河南死於賊氏年二十三翁姑老子幼兵荒賴仍氏支持之艱苦備嘗守節至五十歲卒

高氏本縣知縣高楫之後占籍東鹿石碑村適和睦井監生鄭皇玉年十九夫死遺二女無子氏撫之守節四十餘年冰霜自持

耿氏副使啟姪女適叅政李鳴珂第六子諸生世洩洩病革時遺囑改適洩死一女尋殤繼嗣屢立屢殤氏長齋繡佛煢煢木主側朝夕祭奠無一日不在哀毀中

李氏范慶妻年二十二夫死家落撫孤辛苦備嘗

辛氏車城村石大禎妻年二十三夫貿易死於遼東撫遺孤成立又以貿易山右死焉家

在水鄉赤貧年八十歲

袁氏中石干村晉得時妻年十六于歸未及一月得時賈於外四十五年絕信息翁先故事八十三歲老姑曲盡婦道家最貧衣食皆紡織以辦

二張氏妯娌同姓杜河莊人一爲杜天起妻一爲杜天昇妻天起二十二卒無子天昇二十三歲卒遺二子長冲斗次如栢二張謀曰天起妻養冲斗繼天起嗣天昇妻留如栢承天昇嗣矢志同心俱至八十餘歲知縣馬登祥沈元忠相繼旌其門

李氏梨園村王本振妻年二十四夫死不再嫁子星燦甫五歲撫之成立子死遺未及歲孫昌基值亂家落勤紡績以養之成人昌基忽失目撫四曾孫成立孤苦五十餘年知縣馬登祥旌其門

崔氏天宮村朱士忠妻明崇禎末年盜賊蜂起士忠聚義師與賊戰死遺一子一女氏年二十一歲抱子女尋夫屍弗獲每夕焚香跪禱夜夢夫來告以其處次日尋屍果獲收葬氏食貧守節勤紡績養姑擇師教子恒入庠壽八十一歲知縣李通新表其門曰冰霜嫗

潔

鄭氏在城儒士楊天琦妻年十八歲夫故氏以死自誓舅姑泣諭曰汝死我二人誰依况有娠三月餘氏始進七箸閱七月而產遺腹子又震氏矢志守節家貧勤紡績以供甘旨舅姑疾每夜拜祝乞以身代子又震弱冠入武庠甲子領武鄉薦守節至六十歲督學朱阜旌其閭曰永矢靡他侍講王之樞表其門曰德嫺和熊康熙三十四年旌表

張氏生員尹惟廉妻邑紳張其命女年二十二夫死於亂時氏在母家聞變遂投繯衆救得甦自念曰孀姑年老且有遺腹不得死也後果得男姑至八十餘歲卒殯葬如禮撫孤至成立

李氏趙顯祖妻守節合例康熙三十四年學憲以畫荻齊徽四字給匾

董氏理順井生員薛可洋之母年二十一歲守節五十餘年康熙五十七年知縣陰紀世給匾曰節比柏舟雍正四年知縣喬倣以柏節松齡旌其門

吳氏天宮村生員張敏德之母守節三十餘年雍正三年建坊旌表

張氏在城齊永祚妻年十八孀居守節六十餘年氏素識書日誦經數千言終身茹齋甘
守淡泊雍正十二年建坊旌表

任氏三間房村喬時叙之母氏年十八叙生甫八月即失怙且多疾氏加意調護不忍絕
夫一線之脉守貞教子三十餘年如一日知縣郭如璞給匾號爲勁節可風雍正十一年
建坊旌表

鄭氏生員賈鈺妻守節三十七年始終不渝乾隆四年建坊旌表

雒氏謝宗顏妻孝慈兼盡筠柏同貞守節五十八年壽八十二歲乾隆四年建坊旌表

穆氏馬廷英妻守節三十三年乾隆四年建坊旌表

郭氏王燕妻十七歲于歸二十四齡而寡守節三十餘年乾隆四年建坊旌表

李氏靳虞鳴妻夫目瞽晨昏奉事皆氏代之及夫歿尤孝養加謹矢志靡他守節六十一年
年壽八十四歲乾隆四年建坊旌表

雒氏馬士麒繼妻十七歲于歸僅二載而夫歿氏誓不獨生繼思前室幼子無人撫育勉

留殘喘時加訓誨頗有九熊畫荻風守節四十八年乾隆四年旌表

郭氏耿虔寺監生王之繼母二十四歲守節乾隆四年建坊旌表二十七年入祠

賈氏儒童趙潛之妻三十而寡守節三十年乾隆四年建坊旌表

李氏在城儒童田育棟妻十八歲于歸越二載而夫歿守節四十年乾隆四年建坊旌表
二十年照例入祠

黃氏西良馬村范光先妻夫歿時氏方二十歲矢志守節苦歷三十餘年乾隆四年建坊旌表

楊氏魏可仲妻夫歿氏方十九歲苦節六十餘年貞徽久湮乾隆五年建坊旌表

郭氏中里廂儒童穆驊妻二十歲夫歿守節三十餘年乾隆五年建坊旌表

王氏在城生員張晟妻晟歿氏年二十五歲守節三十五年乾隆五年建坊旌表

王氏在城謝鶴鳴妻二十三歲卽失所天守節三十五年乾隆五年建坊旌表

高氏小染莊村張翰標妻于歸五載夫歿時以死自誓親族中屢慰之謂果爾誰其娛雙

親而撫二子耶氏茹蘗含冰守苦節者三十六年乾隆五年建坊旌表

趙氏位伯村孟璫之母二十六歲而寡守節合例乾隆五年建坊旌表

劉氏北台頭村張克仁妻十九歲于歸二十四歲早寡守節三十二年乾隆六年建坊旌表

焦氏北呂村李志誠妻志誠遠出歷年未歸氏與姑同居比鄰有李亮者夤夜撥門入氏室氏驚醒聽知亮聲音喝詈之亮聲言欲殺嚇其住聲其姑驚覺往救亮因逸去氏羞忿莫釋將平素所用衣衾盡行燒燬立志自盡姑恐其死終日防守至次日夜半氏因姑睡熟乘間自縊制府具題稱其守正捐軀節烈可嘉乾隆六年建坊旌表

紀氏丁則哲妻乾隆六年建坊旌表

張氏張允安妻乾隆六年建坊旌表

李氏舊壘頭村馮士奇妻十七歲于歸夫即抱病氏侍疾牀第親調藥餌嘗而後進越數月而夫歿家貧如洗地無立錫撫猶子爲嗣上事翁姑承菽水咽糟糠旣而雙親相繼見

背一切喪葬皆氏親手拮据苦節五十餘年終始不渝乾隆七年建坊旌表

郭氏在城張士元妻二十一歲夫故上奉翁姑下撫幼子子早歿教孫入泮守節六十四年如一日乾隆七年建坊旌表

張氏在城高太璞妻十七歲于歸越十年而夫歿氏矢志守貞歷盡艱辛于乾隆七年建坊旌表

王氏天宮村田生智妻夫歿氏二十六歲守節三十三年乾隆七年建坊旌表

李氏監生李曰桐妻年二十四曰桐歿守節三十三年乾隆七年建坊旌表

王氏曹家莊陶思明妻苦志守節四十六年乾隆八年建坊旌表

張氏監生吳涵遠妻二十五歲而寡子女皆無撫姪爲嗣苦節三十餘年乾隆八年建坊旌表

李氏新壘頭村生員段之弑妻二十七歲夫歿守節五十六年乾隆八年建坊旌表

張氏監生張希浚祖母守節三十餘年乾隆九年建坊旌表

郭氏張古莊焦馥蘭妻年二十八而寡守節四十餘年乾隆十年建坊旌表

尹氏胡合營村生員魏承孔之妻二十歲夫歿守節四十二年乾隆十年建坊旌表

馮氏散思台監生趙潔妻潔歿時氏年二十九歲守節三十八年乾隆十年建坊旌表

賈氏周家營周熾妻二十八歲而寡守節三十八年乾隆十一年建坊旌表

張氏大過村姚繼珍子婦守正不污或以言挑之氏羞忿自縊乾隆十一年建坊旌表

孟氏傾井村史鳳儀妻守節三十餘年乾隆十四年建坊旌表

姚氏西狼穴村董偕妻守節苦志守貞終始如一乾隆十四年建坊旌表

李氏周家營周杰妻守節乾隆十四年建坊旌表

郭氏扒營村生員楊鳴球妻二十五歲孀居守節五十餘年乾隆十七年建坊旌表

趙氏高卜營馬荊妻十七歲于歸越二年而寡子女皆無家業凋落勤紡織食糟糠苦節

三十餘年翁姑歿繼姪爲嗣乾隆十七年建坊旌表

郭氏東天官營葉璽妻貞潔自守比鄰有葉四者乘其夫他出潛入氏室欲污之氏喊拒

不從四懼逸去夫歸氏泣訴前情欲自盡夫許以稟官究治氏假言不死乘夫出投縋自縊制府具題稱氏守正不阿捐軀明志乾隆十七年建坊旌表

姚氏王莊營監生裴瑜妻二十一歲夫卒守節三十餘年乾隆十八年建坊旌表

周氏高卜營馬錫純妻二十六而寡守節三十三年乾隆十九年建坊旌表

冀氏朗口村侯玉山妻性貞烈猝遇強暴維大嘴逼污之氏誓不受辱詈不絕口大嘴恐事敗露將氏搯喉而死制府具題稱其守正捐軀節烈可嘉乾隆二十年建坊旌表

張氏百福村謝進朝妻二十四歲夫歿守節四十餘年乾隆二十四年建坊旌表

王氏生員高光英妻十五子歸二十而寡守節四十五年乾隆二十六年建坊旌表

張氏北謝村生員梁宏勳妻二十四歲夫故一子早夭以從姪爲嗣苦節五十年終始不渝乾隆二十七年知縣李文耀旌以匾額曰節嬾松筠

彭氏魏名賢妻守節三十年建坊旌表

趙氏孟績斌妻守節四十年建坊旌表

周氏石碑村儒童高大業妻年二十一歲夫歿矢志守貞家赤貧紡績以事翁姑撫三歲遺孤高氏一脉不絕如縷寡婦孤兒強宗見逼擇里而處凡三遷焉子成立孫入庠知縣李文耀給匾旌其門

賈氏杜林村王永清妻十九歲而寡家貧如洗子女皆無氏矢志靡他事翁姑以孝聞以姪繼夫嗣歷四十餘年終始不渝知縣李文耀給匾旌其門

周氏泊莊村儒童王景妻十九歲孀居苦節四十餘年子女皆無撫姪爲嗣公舉請旌劉氏在城癸酉科舉人耿溶妻十七歲于歸二十三歲夫故家素貧氏苦勤紡績撫幼子菴教養兼盡入邑庠後菴生子甫三月失恃劉鞠養成立守苦節五十餘年

魏氏辛集馬嗣叔妻子歸六載夫故氏泣不欲生姊妹以事翁姑勸乃曰紡績以資菽水深得堂上歡心且賦性賢淑內外尤無閒言守節二十六年

董氏生員郭浩妻二十七歲夫歿事祖姑王氏奉養盡禮頗得歡心性素嚴教子義方長汝霖列膠庠次汝震入成均守節四十餘年知縣王式烈旌其門曰畫荻遺範

靳氏監生王道易妻夫歿氏年二十歲誓死不嫁事祖姑與舅姑俱得歡心且教子以義讀書成名守節二十五年

王氏丁士方妻子歸二載卽失所天氏備歷諸艱四十餘年子列成均係入膠庠皆氏教養之力乾隆二十七年知縣李文耀給匾旌其門

王氏張古莊高充瑛妻守節孝親撫孤乾隆二十八年建坊旌表

田氏鎮頭村王花子妻因田章出言褻狎捐軀明志乾隆三十年旌表

王氏小王村任延慶妻年十七賦子歸四年而夫卒方是時翁姑年就衰而嗣子方在襁抱氏毅然以養親教子爲己責翁姑皆年至耄耄氏生能盡禮沒能盡哀而子已成立膝繞孫枝矣乾隆三十二年旌表

邢氏城內南街張丫頭妻因邢三同杜虎子欲圖之遂自縊死乾隆三十五年旌表

鄭氏溫朗口村王燦妻王五欲圖之氏不從用鎌致氏死乾隆三十五年旌表

魏氏張古莊郭綏妻年二十而寡事翁姑撫遺子勤苦備嘗乾隆四十年旌表

韓氏王從村儒童宿人傑妻十七歲適人傑三年而人傑死無子舅姑在堂氏事之極得歡心並擇族子爲嗣教之成名乾隆四十五年旌表

張氏南小陳李奇昌妻二十一歲夫歿守節四十餘年公舉旌表

王氏北口營梁時興妻因梁文子行強不從被勒身死乾隆四十九年旌表

馮氏郭家莊李白狼妻因被楊紳強污捐軀明志乾隆四十九年旌表

穆氏賈辛莊儒童賈名題妻穆本束邑著姓氏生而聰慧幼受學於父兄如列女傳及齒範諸書無不熟讀年十六賦于歸時名題已應童子試琴瑟之際相敬如賓名題每自塾歸必謹詢以文課何題書講何冊謂欲博二人之歡非奮志讀書不能得也故機聲佐讀每至夜分舅姑莫不以家有賢婦爲幸比名題染時疾較重自知不起謂氏曰我數促而以雙親賴汝誠我之含羞人世也然我數促而汝能事我雙親實我之瞑目九原也餘無所言而逝氏委婉如禮絕不以兒女態增堂上戚也自是倍勤績紡學課農桑甘旨娛親晨昏無間一日舅姑謂之曰似續者所以承宗祧然於我爲孫於汝爲子我兩人老矣盍

亦謀所以事汝者族中子望自擇焉氏唯唯先是葬名題時諸昆季皆欲以子爲之後氏已察其厚重者而默識之至是遂以爲嗣焉迨舅姑相繼殂謝氏盡哀盡禮如人子職後教子亦名列太學而氏已勤苦成疾矣乾隆五十二年旌表

齊氏北里廂村監生李忻妻二十二歲夫故孝親教子守節三十九載乾隆五十四年旌表

李氏止呂村馬四妮妻因趙方子欲污捐軀明志乾隆五十七年旌表

曹氏小王村曹維城女因高大胖出言褻狎自縊乾隆五十七年旌表

劉氏小章村劉儒秀女因劉黑子出言不端忿而自縊嘉慶元年旌表

張氏清官店張霞女因張立山出言近戲卽抱忿捐軀嘉慶二年旌表

李氏田家莊田野噪妻年二十而夫歿勤於織紡孝養翁姑撫一子成立終身清慎自矢學政羅源漢旌其門曰荻教光閭

張氏澤北村監生种燦妻年十九而夫歿遺孤彌月氏哀毀不欲生然以高堂故弗敢殉

也喪葬畢朝夕侍姑見氏失一指瘡痕未痊問之泣不能言蓋爍疾亟時屢以目視氏欲言而不能出口者再氏會其意斷指以自明夫見之而人不知也姑有疾日夜禱天祈以身代病愈終不以告人其素性多類此撫孤成立教養有方勤操作崇節儉家以饒裕而子孫亦漸繁衍年七十二而終三學聞於按察使黃以節惠淑範四字旌其門

李氏理順井生員薛蘭芝妻年二十歲夫死無子善事翁姑育胞姪薛英發爲嗣教養兼盡入邑庠孫士清亦武庠學憲金士松給匾曰筠心柏節

趙氏車城監生馬方掄妻二十三歲守節學院給匾亮節凝霜

張氏梨園村儒童王如岡妻二十二歲守節學院給匾冰操自勵

張氏北里廂儒童王選妻十九歲守節學院給匾冰心霜節

王氏在城王陵妻子歸五載而夫故家貧無子氏欲以死從有娉姑年五十泣曰汝死吾將誰依氏因不敢有他言勤績紡奉甘旨養其姑至八十餘忽病甚醫不效氏默祝願以身代姑死而復蘇竟康健如故越數年至九十有三而沒論者以爲孝心所感云

趙氏止呂村監生馬朝明妻娶三年而夫沒氏誓死守節壽六十餘

劉氏西呂村武生韓英傑妻三十歲夫故氏欲以死殉投繯者三以救得生矢志守節奉翁姑以孝聞撫幼子成立里人賢之

馮氏止呂村劉宗佩妻自三十歲守節撫養二子成立壽八十

謝氏西呂村韓英雄妻自二十歲守節以姪文蘭繼夫嗣家貧如洗事翁姑至孝壽七十五賴姪孝養得免饑寒云

趙氏王家莊馮善妻娶數年而夫外出貿易三十餘年不歸氏紡織自給孝事翁姑和睦妯娌並無子息僅撫幼女成人壽六十餘而善尙未歸也

賈氏西呂村韓英才妻二十六歲守節孝事翁姑撫二子文華文枝俱已成立壽七十一而卒

韓氏張古莊高淳妻二十五歲守節孝事翁姑壽七十二

張氏適呂彩營王汝清氏年二十三而夫歿家貧無子或勸氏改適氏泣曰婦人從一而

終大義也何知其他矢志毀形事翁姑盡孝衣食不足則取給於十指間翁姑歿喪葬如禮鄉里皆稱其賢

孔氏北位伯村監生韓文龍妻娶十餘年而夫歿無子守節三十餘年

王氏澤北村孫玉章妻年二十八而夫歿遺二子俱在襁褓氏貞一自守誓死不他適家故不豐時携母家貲養翁姑而自甘粗糲撫二子教養兼盡督課有方鄉里皆稱其善教云

郭氏孤馬營監生張清俊母也二十守節事翁姑以婦職而代子職撫孤子以慈母而兼嚴父子四十餘歲病故又撫諸孫成立一身三世壽七十一歲鄉間稱賢母云

齊氏雙柳樹生員韓希陞妻年二十八而寡居貧刻苦自矢守節垂三十年如一日

尙氏朱家莊儒童李武元妻年十七于歸半載而寡父母憫其幼氏矢志靡他事翁姑至孝翁姑篤愛如女撫繼子慈成立守節四十餘年里人稱其貞靜云

吳氏在城監生鄭梓妻年二十八而寡守節垂五十年

王氏邑庠生周璫繼妻性貞靜年十七于歸甫兩月夫遽遘重疾知不起語氏曰我今長逝矣汝將奈何氏泣曰我名門女爲儒家婦禮義所素聞寧有他耶語未竟哽咽不能成聲夫歿欲以死從既而思曰舅姑老矣幼子未立敢遺堂上憂乎因矢志自守事舅姑衣服必手製甘旨親調舅姑病終日侍側未嘗有惰容撫前室二子長楸次黎恩勸鞠育雖生母無以過鄉黨莫不稱焉

程氏在城王伏妻二十而寡守節至六十六歲而沒

烈女年十三邑人遺其姓氏里居乾隆三十九年春女父母携至鹿邑鬻於媒氏家媒氏故娼也利其姿容善遇之女頗聰明重廉恥嘗語人曰我本良家子誤墮身於此與其失節而生不如全節而死也越二歲年漸長度無計自免遂赴水死

喬氏杜林村王毛妻性婉順孝翁姑夫婦相敬如賓家故貧以績紡自力而藜藿之奉裕如里人共稱道之

張氏寶家莊村馮念祖妻年二十一而夫歿無子惟一女矢志柏舟孝事翁姑苦節數十

年

李氏和睦井村楊尙德妻年二十而夫歿子女俱無立志守貞誓死靡他孝養翁姑得堂上歡繼一子撫養成立稱善教云

李氏試砲營村孟百順妻年二十五而夫歿孝翁姑撫一子誠儒教訓有方早年入泮稱賢母云

楊氏王莊營李庭麒妻子歸六載而夫故家貧如洗氏欲以死從翁姑力勸之止工針指寡言笑奉翁姑無少失禮後翁謀食河南歿于途氏聞之徧求諸親串貸資以歸翁柩未幾姑亦歿一子亦相繼歿氏焚燒一身以十指自活數十年如一日貞心勁節洵堪不朽李氏童生周璵妻年二十四而夫歿家綦貧子女俱無矢死靡他事翁姑克盡婦職夫兄邑庠生璵以幼子嗣之殤繼孫焉撫養成立獲曾孫而一生勤儉尤足稱云

杜氏張古莊監生高凌霄妻生一子夫亡自二十七歲守節勤紡績以事舅姑撫養幼子成立娶妻杜氏即氏姪女甫五年子即歿止生一女應繼無人兼之家素貧姑媳二人相

依爲命姑年七十有八婦年五十有七鄉里莫不欽敬焉

楊氏在城郭濟字妻性貞婉得姑歡心年二十一夫亡人勸之改適氏曰姑依我爲命寧忍背乎守節數十年而卒

張氏西王封村郭世忠妻十七歲于歸甫二年夫歿時世忠祖父母俱存氏晨夕奉事克盡婦職及歿喪葬皆如禮氏無子繼姪元章爲嗣後元章又歿繼妻薛氏年二十四歲亦立志守貞洵稱一門雙節

呂氏東莊村石治邦妻年十九歲于歸逾月夫遠出不歸音耗亦絕氏飲水茹藥事翁姑撫弱弟五十年始終不渝繼姪祿爲夫嗣其苦志爲鄉里所重云

賈氏四七營監生劉純妻二十七歲夫歿事奉舅姑以孝聞

郭氏孤馬營張祖模妻年十八歲夫歿守節五十餘年

馮氏在城監生李家鈔妻增貢生馮文錦之女年十九夫歿冰霜勵志守節三十餘年

李氏澤北村種實妻實故貧客死時氏年二十一遺孤甫三月姑以家貧且憐氏少也諭

令改適氏泣曰娣姒四人皆甘貧兒獨不能乎且兒雖貧家女頗聞禮義決不忍覲顏爲再蘸婦勤紡績事嫠姑撫幼子成立及姑亡泣血幾喪明至六十八歲而卒

賂氏理順井蕭增彩妻性柔順寡言笑生一子未三月而夫亡時氏年二十勵志冰霜事翁姑至孝撫子成立守節四十餘年

裴氏南智邱王希聖妻自十九歲孀居事姑孝撫子書麟成立守節三十四年

傅氏四七營村劉振方妻事翁姑至孝年二十二歲而寡勤紡織撫遺腹子雲峰教養兼盡早入邑庠稱賢母云

杜氏中里廂村監生穆燦妻年二十一歲夫歿事翁姑以孝撫三歲子成立孫玉鐸金鐸俱早入泮守節四十餘年

劉氏南辛村廩膳生尙賓妻性貞靜寡言于歸後賓尙應童子試氏相夫有道機聲佐讀常至夜分不倦以故賓早列膠庠試輒高等氏年二十四賓忽遭重疾歿氏矢志冰霜奉翁姑以孝聞撫二子廷玉廷瑛成立且自孀居後家事悉以委夫兄宴盈紉置不問嘗曰

子無父吾當教之毋貽良人地下憂願足矣至外事非吾所宜知也其卓識尤閨中少云

焦氏周家營人性貞淑年十八許字同里郝氏子將嫁而夫亡女聞之容色慘變形若癡家人怪問託以疾越二日投繯而死

郝氏了河營周仕祿妻事翁姑以孝年二十而寡生一子尙襁褓未幾以痘瘍有勸之改適者氏撫姪爲嗣矢志堅不可奪

种氏杜林村童生王彭齡妻讀詩書知大義年十九歲夫歿勤績紡以事嫠姑撫姪爲嗣苦節數十年

霍氏沙河村童生高應龍妻深州舉人霍光祖女十八歲夫歿守節四十年

李氏六郎營儒童李洪八妻十七歲于歸甫二載夫故撫遺腹子晝操井日夜勤紡績守苦節六十餘年

劉氏拔貢揚燮繼妻二十一夫歿守節四十餘年冰霜自勵艱苦備嘗

孟氏牛家莊牛多學妻二十三歲而寡誓死不嫁家赤貧紡織以事翁姑守節四十餘年
謝氏四七營村李自新妻年二十二夫故無子姑雙瞽僅有田數畝氏勤紡績供甘旨三十
十餘年如一日姑歿變產治喪葬祭皆如禮里人賢之

張氏田家莊監生王利聚妻十九歲夫亡時翁姑皆老子紹勳方週歲氏事親以孝聞撫
幼子教養備至守節四十餘年

張氏沙河村高應本妻二十五歲夫故氏矢志靡他孝事翁姑繼姪青漣爲嗣守節三十
餘年

楊氏傾井村曹孔昭妻年二十二夫死無子誓死守貞家貧勤績紡以奉翁姑及歿喪葬
皆成禮繼姪爲嗣恩勤備至數十年冰霜自勵節操彌堅

蔡氏耿虔寺村王永寧妻年二十一歲夫死無子撫從姪爲嗣教以義方早入武庠翁姑
多疾氏朝夕奉養親調藥餌守節四十餘年而卒

邊氏傾井村曹壽先妻年十八歲夫死無子立志守節撫姪爲嗣事翁姑以孝稱

石氏禮璨村曹東福妻年二十六歲夫歿守節三十餘年

靳氏王家莊王盛妻年二十一歲夫歿無子守節三十餘年

耿氏北章村邢四妻夫至愚年十四不辨菽麥父母強爲娶婦人見氏聰慧而所遭非良匹知其中必愀然而氏殊安之踰歲夫卒時氏年十有八母憐其幼且無出勸令改適輒數日泣不食至於截髮毀容以死自誓母無如何也夫兄舉一子未彌月氏卽告翁姑乞爲嗣恩勤鞠養視生母猶過之迨其子年逾二十入武庠聞人言始知其爲承繼子也

房氏東莊村吳榮妻年二十二歲而寡子女皆無撫姪爲嗣苦節二十九年

杜氏棗營村王學妻年二十夫歿事親孝訓子嚴子彥興娶張氏三十歲孀居繼姪爲嗣洵稱一門雙節

身月正身示

三十一

嘉慶東鹿縣志卷九

翰林院編修沈樂善

戶部主事裴顯相全輯

東鹿縣知縣李符清

風土第九

古者太史陳詩以觀民風大司徒以土宜之瀟辨十有二土之名物所以別剛柔驗豐嗇審則宜類以施其政教也東邑古冀州域地厚水深民情樸實至於土之所產無壞奇之珍嘉穀果蔬適於日用而已然而儉者禮之本也書曰不貴異物賤用物民乃足是亦司牧者當爲加意焉爰卽風俗所尙土物所宜備爲紀之而以祥異佚事附於後志風土

風俗

節令 正月元日昧爽爆竹設庭燎茹春餅取迎新也上元張燈放花炬前後三夜十六日男女羣遊曰散百病二十五日以五穀雜灰畫地爲廩困形曰填倉二月二日糞穉爲

糜麵調之爲醋質曰醋膠以灰撒牆壁下如縷由室內達戶外曰引龍用避蝎毒又用麥豆麵合汁作煎餅謂可薰蟲三月清明士女簪柳爲鞦韆戲四月十八日傳爲碧霞元君聖誕城東關有古廟香火甚盛百貨並陳士女喧闐三日五月五日人各戴艾葉食角黍婦女多戴艾虎兒童腕繫彩絲名百歲索是日爲城隍廟會香火貿易如四月十八日六月六日造麵伏日造醬七月七夕女子設瓜果祀織女乞巧十五日立麻穀於門八月中秋親友餽瓜果餽餅賞月九月九日女家作棗糕餽婿曰追節登高賞菊釀黍爲酒十月一日剪楮爲寒衣焚墓所十二月八日以五穀雜棗栗等爲粥曰臘八粥童男髡髮童女黔耳二十三日祭竈二十四日掃舍除日易門神桃符貼宜春字及春聯爆竹撒芝麻稽於地曰跽歲親友圍爐聚飲曰守歲

冠 男子十五至二十皆冠期卜吉束髮加冠即古三加遺意

婚 男家先通媒妁女家既許婚各索男女庚帖令陰陽家推其宜否曰合婚既吉男家乃請親友數人曰冰翁往女家求婚又擇吉通以書啟女家亦擇吉答之將親迎男家先

期擇吉盛陳聘儀於女家曰行禮女家亦先親迎一二日送糴奩於男家曰鋪牀至親迎期男家擇僕婦中有夫有子及屬象無犯者二人曰娶女客從新壻黃昏往新婦家綵結肩輿導以鼓吹又以銅錫瓶注水塞其口而倒繫之使水可涓滴下曰長流水義取親戚往來不絕也又以杞柳爲圓斗飾以五色實以酒酵麥麩棗栗子糊以紅紙置肩輿內新婦至使抱而進義取發夫早立子且多男也親迎禮用雁或以蒼鵝代俗多用雞曰長命雞新壻至婦家主人設酒饌以盃箸私授從者令攜歸曰帶富婦家于女于歸前一夕親屬皆酌以酒曰送行亦擇僕婦二人如壻家曰送女客新婦出閣蒙以紅錦曰蓋頭以避凶煞由閣門至輿所皆藉以氈毯義取不踐貧地平貧音近也新婦升輿皆令陰陽家擇所向以趨吉新婦至男家以馬鞍橫于中門使跨而過義取安也入門即以織機中所云勝子者授新婦意取盛也新婦所歷亦藉以氈毯柱礎石臺皆剪紅紙貼其上曰避白虎內庭置几案設香供新婦入夫婦同詣案前再拜曰謝天地隨拜祖先拜畢婦乃入房侍女爲新婦糴曰開臉糴成乃謁見翁姑陳衣服巾履爲贊退壻乃就新婦房飲酒曰合

盞是日親戚皆餽娶婦家以食物曰饌諺曰下車飯翌日拜伯嫂及伯叔翁姑皆以巾履
贄壻乃抵新婦家拜其父母曰謝親是日新婦之外祖家賀新壻以羊酒曰啟帳隨請新
壻新婦至其家新婦歸自外祖家乃拜外戚屬亦以巾履贄伯叔翁姑外戚屬皆答以儀
物曰拜錢六日新婦家請壻及女至其家曰住六有九日請者曰住九雖貧富習傳小有
異同然大略不出此

喪 親疾危篤移牀外庭子孫兄弟俱環侍既屬續遷於中堂易衣服衾褥納金珠口中
即禮含飯義也氣絕孝子孝婦等環哭以白布作枕枕之銳其兩頭實以麥麩名鷄鳴枕
俗謂冥途不知分曉耳畔得聞雞鳴也蒙面以帛繫足以絲卽禮綴足義也命僕者環尸
揮扇防尸變也按死者歲數每歲白紙一張每紙剪爲三連其末條下垂以竿繫門外名
門旛男門左女門右孝子徒跣孝婦蓬頭夕孝子以楮錢及水漿香供至土地祠焚拜哭
而歸名倒頭紙又名還魂錢望魂之復還也俗誤曰黃昏錢如是者三日靈案燒長明蓋
晝夜不息又蒸乾飯一盂揉麥麩數條如棒置案上將大歛以麩條納死者袖中盛飯以

盜瓶俟葬納諸壙中或亦葬儀筮管簞蠶之義也死之第二日夜半紙作轎馬及僕從門外焚之俗謂送行隨焚其所樹門旛僅存少許置門樞上殯出然後焚之雞始鳴卽大歛以綿蘸水拭死者面又以金簪珥磨水畫死者目俗謂開光明闔棺以陰陽生贊禮拜哭黎明孝子以下成服設靈幃樹銘旌幃外作紙童男女各一及喪花雪柳諸物又以別案設生時衣服器玩廳外結靈棚迎門以白紙表喪旁書生死年月日時訃至戚以帖揭於門外曰開弔自始死至五七皆日三時上食哭奠孝子寢苦枕塊戒葷酒宿靈次每逢七日必豐其供饌或有延僧道爲齋懺者旣筮葬開塋穿壙亦揭於門外曰某日發引復聞於戚屬戚屬來祭奠賻祭畢留客於外舍設酒饌孝子等奉帛布拜獻及葬陰陽生跪而祝之曰請喪殯出戶孝子以陶器盛諸菓菜傾擲於石名捧獻恨不得更獻於親也俗皆以瓦碎於石昧其義久矣殯旣行孝子執旛前導書某考妣某名引魂旛期功之屬皆同孝子哭送孝婦從柩後諸戚女婦從諸戚設帳幕酒菓奠於路名路祭疎親送郊外歸餘皆抵墓隨路撒楮錢名買路錢爲明器方相旛仗等及墓祠后土題主窆旣葬奉主歸柩

廟三日復詣墓所奠哭焚喪服增封土名圓墳小祥大祥皆詣墓奠哭禫卜日而祭俗多不行但易淡色衣以示即吉之義終三月詣墓奠哭乃即吉

祭 邑多無先祠士民各於其家建神堂奉主祀之主成於臨塋之時越三年始合羣主焉元旦及生死忌日皆設供饌於神主前寒食中元十月朔則祭於墓

士 重名節尙質朴砥礪廉隅束修自好但氣多躁急憚於稽古勤讀者掇巍科如拾芥而習俗移人賢者不免每多坐老頭巾云

農 善稼穡膏沃之地歲有實獲卽沙瘠如舊城桃園梨園西古營一帶多植桃李棗梨足以易食故邑無曠土

工 邑人性勤苦百工技藝粗具而辛集一帶如織絨鬪絨等物皆能做其所產之地爲之是以地尠游民而人多恒業至於攻金攻木攻土之工亦與鄰邑無大異云

商 經商也或貿易於本土或營運於遠方何地無之而束邑爲最縣城西北辛集鎮爲天下商賈雲集之地故土人雅善持籌况旣爲百物之所叢則彼此之懋遷尤爲易易是

亦謀利於市之大驗也附近村氓多藉以資升斗云

土產

穀屬

黍 禾屬而黏者也以大暑而種故謂之黍孔子曰黍可爲酒禾入水也周禮職方氏冀州其穀宜黍稷詩緝黍有二種黏者爲秬可以釀酒不黏者爲黍如稻之有秬糯也

稷 齋也五穀之長曲禮稷曰明粢本草稷卽糝一名粢廣羣芳譜冀北謂之聚俗呼爲糝

稻 稌也曲禮稻曰嘉蔬詩幽風十月穫稻周禮地官稻人掌稼下地疏以下田種稻故云稼下地戴侗六書故稻性宜水亦有同類而陸種者謂之陸稻記曰煎醢加於陸稻上今謂之旱稜南方自六月至九月穫北方地寒十月乃穫

粟 古作麩又作風嘉穀實也李時珍曰粟即梁也禹貢四百里粟周禮地官註北方水土深厚害地而藏可數十年不壞韻會小補粟爲陸種之首米之有甲者

蜀秫 紅白二種博物志地節三年種蜀黍卽此羣芳譜蜀黍一名高粱一名蜀秫一名蘆稌一名蘆粟一名木稷一名荻梁以種來自蜀形類黍稷故有諸名蜀俗訛作藟又訛作藟六書故指此爲黍誤

麥 芒穀也廣雅云牟爲大麥來爲小麥說文牟一作藜廣羣芳譜北地燥冬多雪春少雨晝花薄皮多麵食之宜人陳者更良畿輔舊志小麥具四時之氣春種者曰春麥大麥仁可作飯生芽可作餈

蕎麥 一名烏麥南北皆種之廣羣芳譜北人作餅餌以供常食農人以爲禦冬之具菽 有五色物理論衆豆之總名儀禮註王公熬豆而食曰啜菽淮南天文訓北方其地宜菽本草豆有黑白黃褐青斑數色東邑皆有之

豇豆 有二種吳端本草紅者一名聶護穀兩前後下種者六月子便種一年可兩收四月種者七八月收江東雜志白者一名狸豆嫩時充菜老則收子李時珍曰長者二尺開花結莢兩兩並垂有習坎之義豆子微曲象人腎形所謂豆爲腎穀者宜以此當之

豌豆 本草綱目李時珍曰種出西域其苗柔弱宛宛故得豌豆名百穀中最先登者遼志名回鶻豆

菡豆 本草菡本作扁莢形扁也形象蛾眉故一名蛾眉豆

脂麻 即油麻禮月令食麻與犬黃帝素問麻麥稷黍豆爲五穀脂俗訛作芝

稗 禾別也廣韻草似穀而實細左傳若其不具用秕稗也莊子道在萑稗稗有水旱二種謝靈運詩蒲稗相因依謂水稗麻九疇詩寧知掃野稗謂旱稗

蔬屬

芹 有水芹園芹野芹爾雅疏水芹一名水英杜甫詩美芹由來知野人謂野芹也園芹即旱芹蘇軾詩泥芹有宿根邑園圃多植之

白菜 一名菘埤雅菘性隆冬不彫四時長見有松之操故其字會意南史秋末晚菘

韭 一種而久者故謂之韭象形在一之上地也曲禮韭曰豐本埤雅韭之美在黃

芥 一名辣菜內則秋用芥揚子方言薺薺趙魏之間謂之大芥其小者謂之辛芥或謂

之香芥土人間種之

茼蒿 函史物性志云茼蒿香可茹

菠菜 一名菠薐一名赤根廣羣芳譜菠菜必過月朔乃生即晦日下種與十餘日前種者同亦一異也劉禹錫嘉話錄云菠薐種自西國有僧將其子來云是頗陵國之種語訛爲菠薐耳

山藥 薯蕷也稽含草木狀一名山藟

壺蘆 一名瓠蘆亦作葫蘆可挹可食盧氏雜記鄭慶餘清儉一日召親朋會食衆凌晨詣之至日高慶餘呼左右曰爛蒸去毛莫拗折項諸人以爲必蒸鵝鴨良久就餐乃每人前下粟飯一碗蒸葫蘆一枚相國餐美諸人強進而罷

萵苣 續博物志萵菜出高國有毒百蟲不敢近

蘿蔔 蘆菔也魯人名菘菹秦人名蘿蔔爾雅釋草葵蘆菔疏今謂之蘿蔔廣羣芳譜一名萊菔一名紫花菘處處有之北土尤多狀有長圓二類根有紅白二色

莧蓬 一名素菜

藕 爾雅釋草荷芙蕖其根藕韻會凡芙蕖行根四節行鞭節生一葉一華華葉常偶故謂之藕草木蟲魚疏幽州謂之光旁爲光如斗角

黃花菜 一名金針

苜蓿 本草一名牧蓿謂其宿根自生可飼牛馬也西京雜記一名懷風時人謂之光風茂陵人謂之連枝草

茄 本草一名落蘇五代貽子錄作酪酥蓋以其味如酥酪也王褒僮約別茄披蔥拾遺記淇漳之鯉脯以青茄

葷葵 香菜也潘岳閒居賦蓼葵芬芳

蔥 本草外直中空有蔥通之象也內則春用蔥

蒜 古今注卵蒜也夏小正十有二月納卵蒜爾雅翼大蒜爲葫小蒜爲蒜離騷索胡繩之纒纒吳仁傑疏胡葷菜即今大蒜也

王瓜 月令註萆挈也學圃餘疏王瓜出燕京者最佳

菜瓜 廣羣芳譜北方名苦瓜色青質脆可生食

冬瓜 博雅冬瓜菰也其子謂之臠

倭瓜 一名北瓜

絲瓜 木草一名布瓜一名裹瓜郝經詩狂花野蔓滿疎籬恨煞絲瓜結子稀

瓠 瓠瓢埤雅長而瘦上曰匏短頸大腹曰瓠

藟香 本草註北人呼爲尙香嵇康有尙香賦

秦椒 廣羣芳譜以產秦地故名今北方秦椒另有一種

蔓菁 一名蕪菁爾雅翼蔓菁南北通有之北土種之尤多

蘭 畿輔舊志木生者如芝草生者如葢土生者如丁土人總名曰蘭茹

果屬

桃 內則桃曰膽之邑桃園一帶最高

李 陸士衡果賦中山之縹李爾雅翼李木之多子者埤雅李性難老雖枝枯子亦不細其品處桃上

杏 格物叢話杏實味香於梅而酸不及核與內自相離管子地員篇五沃之土其木宜杏文獻通考杏多實不蟲來年秋禾善

梨 陶宏景別錄梨性冷利多食損人謂之快果

棗 古作乘小爾雅棘實謂之棗埤雅大者棗小者棘于文並束爲棘重束爲棗蓋棗性重喬棘則低矣

柰 潘岳閒居賦二柰曜丹白之色

沙果 畿輔舊志綿而沙者曰沙果

石榴 博雅若榴石榴也丹實垂垂若贅瘤也崔豹古今註一名丹若

杜梨 鄭康成詩註北人謂之杜梨南人謂之棠梨

蒲陶 本草始生隴西五原燉煌山谷今河東及近京州郡皆有之其圓者名草龍珠長

者名馬乳蒲陶

羌桃 俗名核桃西陽雜俎北方多種之以殼薄仁肥者爲佳

葇 桑實也晉書張錫傳桑葇甜甘

西瓜 范石湖詩註西瓜味淡而多液本燕北種方回詩西瓜足解渴割裂青瑤膚

甜瓜 學圃餘疏甜瓜以香而小者爲第一

花屬

荷 爾雅註北方人以藕爲荷亦以蓮爲荷

菊 爾雅蘼落蘼也離騷夕餐秋菊之落英

蘭 雲谷雜記蘭非一種有馬蘭山蘭澤蘭蘭草皆見之本草中今邑之所有者馬蘭耳

萱 忘憂草也一名宜男韻會即今之鹿蔥也

薔薇 一名薔靡本草經薔薇不一有大紅粉紅黃白四色陸游詩春風一架晚薔薇

玉簪 花疏一名白鶴花紫者名紫鶴無香可刈也

木槿 槿也爾雅釋草槿木槿一名舜詩鄭風顏如舜華

紫荊 本草一名紫珠群芳譜一名滿條紅白香山詩滿砌荊花鋪紫毯

長春 學圃餘疏花之四季開者蘭桂之外有月桂有長春菊即金盞花也

石竹 一名石菊又名洛陽花叢生花色以數十種計

鳳仙 本草一名金鳳花有紅白紫碧數色自夏初至秋盡其花開謝相續不斷

玫瑰 遵生八箋有二種其一種色黃出燕中花稍小於紫玫瑰

鷄冠 有紅黃白數種矮者名壽星鷄冠

芍藥 一名婪尾春胡嵩詩曰瓶裏數枝婪尾春

海棠 羣芳譜海棠有四種貼梗垂絲西府木瓜西府中有一種名紫綿色重瓣多

秋海棠 一名八月春羣芳譜舊傳有女子懷人不至淚洒地遂生此花色如美婦面甚

媚名斷腸花

蜀葵 爾雅葍戎葵註今蜀葵也古今注一名苾菜花小名蜀葵一丈紅

丁香 瓶史海棠以蘋婆林檎丁香爲婢花小名丁香曰百結

佛指甲 即慎火草

老少年 羣芳譜一名雁來紅楊慎賦盈盈渥赭奕奕鮮穠

木屬

松 字說松百木之長猶公故字從公周禮職方氏冀州其利松栢

栢 六書精蘊栢陰木也木皆屬陽而栢向陰指西蓋木之有貞德者故字從白白西方正色也

槐 春秋說題辭槐者虛星之精藝文類聚槐季春五日而兔目十日而鼠耳更旬而始規二旬而葉成

椿 禹貢作檣左傳作檣說文作櫛皆一物也莊子逍遙遊上古有大椿者以八千歲爲春八千歲爲秋

桑 典術桑箕星之精詩幽風爰求柔桑

榆 爾雅翼江南有刺榆無大榆蓋大榆北方有之

楊 廣羣芳譜北方材木全用楊槐榆柳人多種之

柳 小楊也埤雅柔脆易生與楊同類縱橫顛倒植之皆生

柘 桑屬蠶書柘葉飼蠶爲絲中琴瑟絃清響勝凡絲

杜 甘棠也赤者爲杜白者爲棠

桐 爾雅釋木榮桐木詩鄘風椅桐梓漆爰伐琴瑟

樗 唐本草椿樗二樹形相似樗木疎椿木實虞世南詩無庸類散樗

草屬

蒿 蔽也詩食野之蒿禮月令註蒿亦蓬蕭之屬爾雅釋草藁之醜秋爲蒿陸佃詩疏蒿草之高者

莠 趙歧孟子注莠之莖葉似苗魯語馬餼不過和莠注莠草似稷而無實

茅 菅也易泰卦拔茅連茹詩白茅包之

莎 蒿侯也一名侯莎爾雅翼莖葉似三棱根周匝多毛謂之香附子

蓬 詩彼茁者蓬荀子勸學篇蓬生麻中不扶自直

蓼 辛菜本草釋名蓼類性皆飛揚故字從蓼高飛貌

馬齒 本草馬莧布地生實至微細俗呼馬齒莧又赤莧洪希文食草具詩赤莧赤如脂
又白莧孫元宴詠蔡摶詩紫茄白莧以爲珍守任清真詠更貧又人莧爾雅曰赤莧今人
莧而赤莖者又紫莧王安石光宅亭詩紅葵紫莧復滿眼又五色莧洛陽花木記穀雨栽
五色莧

藜 蒿類禮月令藜莠蓬蒿並興

馬鞭 本草穗類鞭韜故名馬鞭

藥屬

艾 蕭也詩王風彼采艾兮急就篇艾一名冰臺一名醫草博物志削冰令圓舉以向日
以艾承其影得火故號冰臺

紫蘇 桂荏也本草蘇性舒暢行氣和血故之謂蘇蘇乃荏類而味辛如桂故爾雅謂之

桂荏

薄荷 本草薄荷俗稱也陳士良作菝茀揚雄甘泉賦作菱蒔

蒼耳 本草詩人謂之卷耳爾雅謂之蒼耳幽州人呼爲爵耳皆以實得名也

車前 茅苜也本草此草好生道邊及牛馬足跡中故本經名車前幽州人謂之牛舌草

益母草 即充蔚

大薊 本草綱目薊猶髻也其花如髻也

小薊 本草俗名青刺薊北人呼爲千針草

貨屬

棉 有紫白二種演繁露唐環王傳古貝草也緝其花爲布麤曰貝精曰氈

布 釋名布布也布列衆縷爲經以緯橫成之也易說卦坤爲布

白麻 玉篇泉屬也皮績爲布子可食內則女子執麻泉學女事以共衣服

卷之五 月令 十一
四十一
榮麻 爾雅翼繅高四五尺或六七尺葉似苧而薄實如大麻子今人績爲布或作疋周禮天官典枲麻草註草葛繅也

絲 急就篇註抽引精繭出緒曰絲禹貢厥貢漆絲

棉油 膏也卽木棉子所醞釀而出者

靛 本草綱目靛質浮水面者爲靛花

禽屬

雞 知時畜也玉篇司晨鳥春秋說題辭曰雞爲積陽南方之象火陽精物炎上故陽出鷄鳴以類感也

鵝 訶鵝也長脰善鳴峨首似傲故曰鵝埤雅鵝頸如瘤今鵝江東呼訶

鴨 一作鶻亦作鶻爾雅釋鳥舒鳧鶻注鳧也禽經鴨鳴呶呶其鳴自呼鳧能高飛而鴨舒緩不能飛故曰舒鳧

鳩 鶻鶻也似山雀而小短尾青黑色禽經拙者莫如鳩不能爲巢

鴿 陸佃曰鴿性喜合凡鳥雄乘雌惟雌鴿乘雄逐月有子又名鵓鴿

鵓鴿 夏小正三月田鼠化爲鴿鴿也本草鴿大如雞雛頭細而無尾有斑點雄者足高雌者足卑

布穀 爾雅鳴鳩鴿鴿注今之布穀也後漢書襄楷傳疏曰布穀鳴於孟夏蟋蟀吟於始秋注布穀一名戴維一名戴勝杜甫詩布穀處處催春種

黃雀 周禮羅氏中春羅春鳥注春鳥蟄而始出者若今南郡黃雀之屬戰國策黃鳥因是以俯囓白粒

家雀 依人小鳥也古今注雀一名家賓

鵓 喜鵓也一名乾鵓一名鵓鵓

鴉 烏別名廣雅純黑反哺者謂之烏小而腹下白不反哺者謂之鴉

獸屬

牛 周禮職方氏冀州其畜宜牛羊

馬 春秋說題辭地精爲馬左傳冀之北土馬之所生

羸 楚詞九歎同駑羸與乘駟兮正字通羸似驢而健驢力在髀羸力在腰乘者隨其力進退之

驢 正字通驢有褐白黑三色以午及五更初而鳴協漏刻

羊 淮南天文訓北方其地多牛羊

豕 符子朔人獻燕昭王以大豚年百二十矣人謂豕仙方言燕謂之豕

犬 狗之有縣蹠者也象形孔子曰視犬之字如畫狗也曲禮大者爲犬小者爲狗故月令皆爲犬而周禮有犬人職

狐 埤雅狐性疑疑則不可以合類故從狐省易田獲三狐

狸 野猫也有數種大小似狐毛雜黃黑有斑如貓員頭大尾者爲狸爾雅釋獸狸狐菑
貉 其足蹠其跡夙

貓 狸屬郊特性迎貓爲其食田鼠也

獾 牡狼也爾雅釋獸狼牡獾廣韻野豚或作狴

鱗屬

鯉 爾雅釋魚鯉注今赤鯉本草鯉最爲魚中之主形既可愛又能神變乃至飛越山湖所以琴高乘之西陽雜俎道書以鯉多爲龍故不欲食

鯽 本草形似鯉色黑體促腹大脊隆杜甫詩鮮鯽銀絲膾

鮎 鯉也爾雅釋魚注鮎別名鯉江東通呼鮎爲鮎本草圖經鮎背青而口小者名鮎

鱧 鯉類也爾雅釋魚鱧注大魚似鱧而短鼻口在頷下體有邪行甲無鱗肉黃大者長二三尺

魴 草木蟲魚疏魴廣而薄肥恬而少力細鱗魚之美者

鱉 與鼈同千祿字書鱉通鼈易說卦離爲鱉莊子秋水篇東海之鱉

蝦 說文長箋同蝦正字通水蟲可食溪澤江海皆有之磔須鉞鼻背有斷節尾有硬鱗多足好躍腸屬腦子在腹外

蟲屬

蠶 絲蟲也詩蠶月條桑禹貢桑土既蠶酉陽雜俎食而不飲者蠶又原蠶埤雅再蠶謂之原蠶一名魏蠶又紅蠶蠶足於葉三俯三起二十七日而蠶已老則紅故謂之紅蠶又野蠶又華蠶又石蠶又雪蠶又金蠶

蟬 大戴禮蟬飲而不食酉陽雜俎蟬未脫時名復育

螳螂 禮月令仲夏螳螂生註螳螂螳螂母也揚子方言螳螂謂之髦郭註有斧蟲也江東呼爲石蜋又名齧腕

蜂 與蠶同爾雅釋蟲蠶醜螿又土蠶又木蠶爾雅翼蜂種類至多其黃色細腰者謂之穉蜂又蜜蜂人收而養之

蝎 蝎蟻也爾雅釋蟲蝎蟻蝎

蛇 酉陽雜俎蛇有水草木土四種爾雅翼蛇草居常飢每得食稍飽輒復蛻殼埤雅牛以鼻聽蛇以眼聽

蠅 蟲之大腹者陸佃云蠅交其前足有絞蠅之狀埤雅青蠅亂色蒼蠅亂聲

蚯蚓 月令孟夏蚯蚓出本草註蚓之行也引而後申其壤如丘故名蚯蚓續博物志蚯蚓

蚓長吟地中江東謂之歌女

蝮集 集韻蝮蝮蟲名玉篇蝮蝮蟲大如蜺

伊威 鼠婦也詩幽風伊威在室韓愈詩破竈伊威盈

蜥蜴 爾雅釋魚蠨螋蜥蜴說文在草曰蜥蜴在壁曰蝮蛭本草小而五色尾青碧者名

蝮蜴小而緣牆壁色黑者名蝮蛭

絡緯 帝京景物略便腹青色以股躍以短翼鳴其聲聒聒以其聲名之曰聒聒兒

蜻蛉 蟲也揚子方言蜻蛉謂之蜉蝣飲露六足四翼其翅輕薄如蟬盡取蚊蟲食之遇

雨即多好集水上欸飛一名蜻蛉

蝶 說文木作蝶蛺蝶也俗作蝶玉篇蝴蝶莊子至樂篇鳥足之根爲瘳蛸其葉爲蝴蝶

蚊 一作蟲嚙人飛蟲也續博物志地濕則生蚊

螻蛄 爾雅蝘蝘蝘蝘疏黑甲翅在甲下喜糞作丸而轉取之

祥異附

宋

熙寧九年禾間四隴同穎

嘉祐七年麥秀兩歧

明

永樂十一年夏五月野蠶成繭

成化十三年秋七月文廟產白雀

十四年夏五

月縣東北鄉蝦蟆鳴於樹八月大水灌城傾民廬舍

十九年文廟復產白雀

二

十三年五月天地昏空中有聲如雷尋有黑氣墜地掘之得黑石二一如碗一如雞卵事
載典故遺聞 嘉靖四年夏四月大雨雹 十七年有牧童望野若有人刺舟而行

即之不見是年秋大水

隆慶三年夏大水滹沱河溢

萬歷三十四年大雨滹沱

河溢夜人城水深數尺

四十六年春白鸚鵡見相傳城未建時居人在草橋西葺廬

施茶白鸚鵡集廬旁樹頭三晝夜不飛鳴衆訝之共禱曰或白衣大士欲於此興道場耶

果爾當颺去禱畢忽不見衆神之因建殿三楹名白衣菴菴前南岸古井口邊生紅蓮一朶綠葉四五枝多著靈異 四十八年西石干村劉氏一乳三男 天啟六年六月初五日丑時地震有聲鷄犬皆鳴七月大水傷禾稼 崇禎十二三年間饑饉相仍糠粃不給草子樹皮皆盡 十三年冬城西張家莊迤東地裂一縫南北長約三十餘丈闊尺許以繩測之莫竟其底鄉人醮禳之乃漸合 十五年閏十一月十七日初更後城內外黑氣閉塞高可二三丈十八日晚亦然 十七年二月流賊已陷京師四月十六日未時有風自西北來黑氣如墨移時微雨乃霽

國朝

順治三年七月飛蝗不爲災 六年八月蝗 十一年二月初三日夜半有火光斗大徐行空中自北而南落本城南大街西觀音堂前旗杆頂上略止旋徐向西北去 十五年正月初二日地震有聲是日立春二月初七日巳時晝晦雷電交作尋大雨雪是年大熟 十六年二月初十日大風雨雪是年大熟 康熙元年南小陳村民秦應

舉妻羅氏死三日屍忽舉動家人驚避之已復生矣自言至本村東嶽廟中凡先亡者多見之惟自經投井之人不敢近 三年南魏伯村大風拔木現出甘露井一眼凡抱病者飲水即愈 五年二月十二日大風三日飄瓦折樹積砂盈尺 六年六月蝗

六年李家莊李秀芳妻一產三男

七年六月六日未時天微雨城西南隅叅將蘇

應世家廳上鴟頭忽火烟從小孔中出霹靂大震火光滿城鴟頭破爲二見一龍飛去人多驚仆先是郡人高姓者館於廳偃臥恍忽見東鄰一人來就言忽不見遂驚駭移西廊坐未移時見有火光斗大墜院中霆隨大作滿院皆硫黃氣 六月十七日酉時地震

又張岔口劉民悅妻一產三男

八年五月十二日未時雨雹

九月二十一日

雨雹厚二寸餘

九年五月內新壘頭村王立基井中有龍起霆電大作井邊有二槐

各震其半烟從井出時頃方息

五十二年春大風霾白晝晦冥

雍正三年城南

廩見是年稻大熟

八年夏地震屋宇幾傾

乾隆七年秋周家營大雨雹壕塹幾

平木葉盡落飛鳥墜地死者無算

十九年壘頭村舉人董朝棟子死復生未死時營

且聾足疾不能履地及生耳聰目明步履如故忽通醫 二十三年文廟產白雀

二十四年夏蝗食麥知縣李文耀於三更時虔詣蜡廟祝之次日蝗皆滅 七月溇沱

南徙入冀與溇水會流 二十五年白龍邱村產瑞麥有兩歧九穗之異 五十年

文廟產白雀 五十三年夏文廟復產白雀 五十四年一間房村民人史寬妻一

產三男 五十八年秋蝗不爲災 五十九年三間房村民人喬作舟妻台氏一產

三男 六十年南棚村民人李曾妻一產三男 嘉慶元年北營村麥秀兩歧

二年在城民人張德妻一產三男

佚事附

漢

更始二年光武帝擊銅馬于鄴吳漢將突騎來會銅馬夜遁帝追擊大破之受降未盡而高湖重連來與其餘衆合帝復與戰悉破之

唐

天寶十五年史思明攻陷鉅鹿信都諸郡饒陽裨將邑人張興死之

建中三年正月詔朱滔張孝忠合軍討李惟岳與王武俊統衆萬餘戰於束鹿

元

太祖八年蒙古太師穆呼哩狗地至縣軍民長官司耿福以地附是年秋金恒山公武仙率衆來攻福大破之武仙遁去

明

正統十四年也先由京師縱兵南掠突至城下衆欲棄城遁知縣黃子嘉誓死守城賴以全

正德六年賊劉六劉七寇縣陷之

崇禎十四年土賊自東北來寇縣先以百騎突入城登陴據西北二門縱火剽掠致仕陝西寧夏兵備副使耿啟遣子耿述家人楊巨鰲暨城內壯丁擊殺賊十餘人賊遁去

嘉慶東鹿縣志卷十

翰林院編修沈樂善

戶部主事裴顯相仝輯

東鹿縣知縣李符清

藝文第十

自班史有藝文志而凡爲郡邑志者皆列其條考前漢書以藝文名篇其自序云六藝之文樂以和神詩以正言禮以明體書以廣聽春秋以斷事五者相須而備而易爲之原是六藝即六經也與周禮天官正會其什伍而教之道藝藝字義別然則藝文云者必枕藉六經發明義蘊勒爲完書而後克副其稱乃欲於一邑而求之誠難槩見但鴻章鉅製不必皆出自鄉人凡有關於邑之利病而爲載道之文是即六藝之支與流裔他如詩賦歌行本三百篇之遺或咏民風或徵故蹟誠不可聽其散佚弗輯也志藝文

奏疏

請罷濬河疏

明王之棟

臣唯當今之世常患無任事之臣間有一人者毅然起而任之而脂韋之徒又從旁睥睨破壞於其間此擔當者竦肩而不敢荷疾足者却步而不敢前亦臣之所日夜憤惋大有不平於衷者也顧所貴乎任事者必一人創畫人人便之一時建立世世安之而后可若上虛國儲下勞民力以興必不可成之功非完計也臣去年冬接邸報見尙寶司少卿徐貞明疏爲畿郡數遭水患懇乞勅司臣乘時勘議以恤民艱以興地利事奉旨工部知道夫貞明所稱任事之臣也前年春奉詔興西北水利沿邊瀕海之處報有成效邇者欲盧溝漕沱二大津復故道以除厥害良亦勤矣謏陋愚臣何足以佐末議况臣西北人也所興除利害即臣當尸祝而俎豆之復何忍言第以興革非常順民則便如京東水利及盧溝巨津去臣地遠不敢臆說唯漕沱一河臣生其地履其患日夜思所以除之之計詢諸父老質之士大夫僉謂此河決不可以人力治者臣謹具河狀並貞明所建議列爲十二事冒昧陳之陛下試垂察焉按河源發於代郡秦戲山下匯爲三泉循太行掠晉冀蜿蜒

而東注之海水性驕悍土疎善崩壅決不常當其泛漲則湧溢上流雖隄防亦經淤漫當其殺落則漩駛下激雖椿楸亦被摧推况河流之處多沙泥而無根基人修之難爲功水衝之易爲力也在昔東漢永平間連年治之死者不可勝算賴鄧訓請罷止至元以來至大定中舉者不下十數次咸以績用弗成止嘉靖初太僕卿何棟欲築隄以復故道后因一歲數遷又止即此觀之凡倡爲修築之說者皆徒勞罔功也今必欲議濬臣恐橫流未必能除而徵派紛出地方滋擾將以除害者而生害矣况二百年來人情安之一旦動衆寧不駭異乎此其不可者一也沱漳原無定居故道不止一所自我朝言之洪武初自正定西南抵東鹿至深州入傅家池永樂四年徙南向劉村東流出武強界十六年劉村再塞改流衡水五花營店導於漳河至成化則由正定出晉州紫城口南入寧晉泊會衛河入海至正德則紫城口淤塞淺漫分爲二股一股仍由寧晉一股東流自東鹿至深州城南已復二股會合併清水河入海至正德末年徙東鹿深州城北入武強衝破獻縣古隄遂爲深獻患至隆慶三年水大溢漂溺灘塌不可勝計乃從天宮口改決饒陽遂又爲饒

陽患凡此皆河流所經之處今云修復故道將從何者而修之乎此其不可者二也或曰修復深州故道仍存饒陽見行之道使自饒陽而下者十之七自深州而下者十之三胡不可者不知此亦非自貞明始也宏治六年知府張淑開新河於郡南分殺水勢費以萬計不再逾夏水大入復趨故道功竟不成即隆慶中井陘道臣紀誠議開天宮口饒陽深州之人稱不便者填於街衢時撫臣宋纁知其難成力止之其人見在戶曹可詔而問也況水勢漂出山下即抵城邑或南或北唯所之耳誰能別其流派而使七分之北三分之南乎此其不可者三也積水盈野堅冰彌望貞明亦親見之此猶秋秒冬成之際若夏秋水漲則正定以南幾十里許皆河身也今據深州所挑濬者闊三十步深一丈無論水勢必不入渠即入渠所容能幾何而欲以殺橫奔之勢乎且彼云可以資灌溉不知此水淤沙不能潤苗而實以害苗奈何欲假以灌田耶此其不可者四也自古議興作者必預計其所費臣聞僱役之法前議至一百二十萬今止曰一萬有奇較前所費不過百分之一耳即謂主前議者將欲避事故增其估以阻之亦不應相懸若此之甚也况人非避事則

喜事增估者爲避事安知減估者非喜事者乎苟存一喜事之心使工費不敷卽剝削多方以期竣事矣當此旱澇相因之時百姓洶洶至勤我皇上屢詔蠲租又從而賑貸之猶恐未甦而乃腴民膏脂以興此無益之舉何爲者哉此其不可者五也燕趙之民曠悍輕佻一遇饑荒易與爲盜則嘯聚之戒正今日所當嚴者臣聞京東水利之處所募有南兵數千人邊民苦之識者謂當戒其不虞况更聚此數萬易逞之徒於冀晉之間且勤且勞不得休息而又家無擔石之蓄以養父母育妻子萬一揭竿蜂起將如之何此其不可者六也運道轉輸國家之咽喉係焉積雨橫集則衛河常溢雖有守隄之夫日夜巡防猶時遭衝決而加以溥沱猛悍之水灌之可乎且三角龍堂等淀固不高於海無上犯運河之理然下通直沽衛河自南而來亦至直沽入海茲又引溥沱之水會清河以入衛至直沽入海衆派奔匯其流湍激下湍激則怒而相搏其勢必逆於上能保不泛溢乎蓋河猶注也注石者加斗則溢注斗者加升則溢此理昭昭無容疑者故引溥水以入衛其於運道妨矣運道妨則咽喉厄此其不可者七也積貯天下之大命原爲備緩急計耳况三輔根

本之地譬則人之心腹也心腹宜實不宜虛今借支庫藏以妨積貯不足則又量動倉儲
又不足則必設方搜索此端一開而不肖之徒將駕言那借以剝公廩借口勸助以潤私
囊日甚一日根本虛而心腹索然矣倘有緩急胡以應之此其不可者八也自天宮口至
清河逶迤百里河勢所占太約不減百餘頃而今止云三十頃何其少也况束鹿深州等
處去臣居甚近則地之肥瘠亦大不相遠上地一畝可易二三金次不下一金最下則五
錢極矣即河地不鹹而業開懇當與最下者等乃止以三錢易之猶曰令厚於民使無怨
言夫河流既徙民方開爲成業聯建莊圃茲舉而奪之且廉其所值有不興怨者乎此其
不可者九也成祖時衛河爲患尙書宋理以開數小河請上以農務方興令候秋成爲之
邇者三農甫舉乃以數萬之夫蟻聚蹂躪於百里之上於播種不大妨乎此其不可者十
也詢謀僉同革言三就偏聽獨任古人重戒欲爲一方除大害當與一方之臣民共籌之
聞貞明踏勘正定時撫按司臣俱有後言郡守而下有慮及於桑田廬舍者不曰避事偷
安則曰自私其民間有承風希旨即擊節歎賞曰我自出京以來未有如公之實心任事

者夫舉久歷地方洞悉利弊者置之不問而第於附己者取焉詢謀之謂何而乃偏執之若此也偏執則事必債此其不可者十有一也朝廷舉事自有大體苟計關宗社利生民所不能已者卽請之內帑或徵附近之丁夫濟之可也今事在可已而供費浩煩乃嗾一二羽士募化是賴亦羞朝廷而損國體者矣此其不可者十有二也夫以貞明之諳練老成豈慮不及此而必銳意行之者蓋奉行之人不善體任事之意或虛報其功以要譽聞或故減其費以見智略或引一勞永逸厥成晏如之語以阿順其意彼以汲汲任事之心重之以喜事者之說故不覺其入而偏信以至此也臣愚不識時務唯知王道本乎人情利之所在民爭趨之害之所在民爭避之苟可以獲利而遠害民亦何憚而不爲而猶待於上之督率而猶蹙額不願之若是乎况天下晏如以其臻厥成也未有不成而晏如者也而搜括府庫勞苦元元以圖無益斷斷乎其不可者此臣所以不容已於言也伏乞勅下該部如果臣言不謬再行本官會同撫按諸臣將漣沱河會勘詳議察地之宜從人之便務集衆以廣益毋偏執以必行庶民生獲安國計不損卽當事者亦不至壞極而不可

收拾矣民社幸甚

覆漳河分流疏

國朝 李光地

臣等欽奉皇上面諭漳河現在分流須令永久分流纔好若并而歸運則與漕道有妨并歸子牙河則民田受害爾等往詳看來奏欽此臣等遵奉諭旨查看得現在漳河分爲四支一支自直隸大名府之魏縣元城縣流至山東館陶縣地方歸衛入運一支由直隸廣平縣至山東邱縣地方復分爲二其一俗呼老漳河自邱縣東北分流經直隸之威縣南宮棗強景州武邑阜城交河等地方至青縣杜林木村與完固口之支流合至鮑家嘴歸運又其一俗呼小漳河亦自邱縣西北分流經直隸之鉅鹿廣宗平鄉至寧晉與滏河會又經束鹿冀州與滹沱河會由衡水至獻縣完固口復分爲兩支一支自完固口流至青縣會老漳河至鮑家嘴歸運一支經河間大城爲子牙河出王家口歸淀查漳河現在末流所分四支三支歸運一支歸淀然歸運三支水勢頗弱其歸淀一支水勢獨強約其水勢三支之水僅可以敵一支是則此時漳水一半歸運一半歸淀運道既無難受之虞子

牙河亦得分殺之勢誠有如聖諭所云者臣等竊觀此時水勢惟經寧晉冀州會滏河滹沱河一支最爲深通其歸館陶及青縣入運之兩支水勢頗淺或恐將來淤塞臣等議得應令所經由各地方官每年於水未發時分段挑濬臣等按季察視務令此兩支俱疏通無滯以殺小漳河之勢如遇水大時仍用挑水壩等法逼水分流庶幾北不至挾滹沱以侵田南不至合衛河以害運臣等愚陋之識未必有當伏乞皇上訓誨指示遵行

覆滹沱南徙疏

方觀承

竊照滹沱河自束鹿改流南徙由冀州寧晉入滏陽河據冀趙兩州稟陳仍應導由舊路入滏經臣奏請親往體勘審其地勢之難易權其利害之重輕定議具奏奉到硃批是但秉公爲之欽此臣於本月十五日率同清河道壯德保定府王祖庚前往該處由改流之晉州張岔口沿河五十五里至寧晉營上村入滏處所乘舟詳勘新河寬自七八十丈至二十餘丈深自七八丈至一丈五六尺已成大河勢順安流蓋此處原係康熙年間滹沱舊道改流時淤去河道非於平地另有衝齧或礙田廬須加籌畫也其張岔口迤東河身

南北二股分合共長四十餘里俱已成平陸斷非人力所能挑復且貼近束鹿城南常年頗費捍禦今改道晉州寧晉境內則皆距城三十餘里其村莊之近河者多在高阜並築埧護村以防漫水束鹿田道情形亦復如是於彼於此皆爲一水一麥之地即如束鹿以南本年濬水漫溢村莊今於消退後仰蒙聖恩借助麥種秋麥彌望全無隙地諺稱一麥抵三秋居民固習以爲常矣茲臣查勘之次住近新河士民並無以不便陳訴者而情形既明地方官亦知因勢利導之爲宜皆不復言濬復舊河矣所有臣查明緣由理合繕摺奏覆並繪圖貼說恭呈御覽伏乞皇上訓示謹奏

賦

束鹿縣賦

明賈衡

維鹿川之爲邑據中輔之要衝當畢昴之分野闢燕趙之提封曠百里兮遼邈聳雉堞兮崇隆宗恒嶽無閭之險介王畿甸服之中遠則新冀蟠其南衝武峙其東北收祁陽之秀西吞晉地之雄近則了河帶其前安平屏其後博陵襟其左深澤控其右此則束鹿之形

勝與天地爲悠久者也其山則嵒巖岑嶺翳鬱蘊葱有三邱之古洞爲一邑之奇峯其水則發源三晉起派五泉爲一方之巨浸有滹沱之名川土產則麥含真氣禾飽靈津沃野皆桑麻之場平疇惟黍稷之馨火棗交梨纍纍而結實蟠桃鼠李翳翳以成陰有邵平之瓜圃董仙之杏林水產則無腸公子巨口細鱗鵠鰾鰻滿晴沙以翔集菰蒲蘋藻依汀岸而蕭森或豺狼之叫嘯或狐兔之紛紜跳梁於林壑之區陞伏於巖穴之岑若夫春氣融和秋容栗冽嬌花寵柳灼灼以爭妍艷菊香蘭層層而競色夏則濯水之芙蓉冬則凌空之檜柏鳥韻間關蟬鳴哽咽品物咸遂其天四時不爽其節其市廛則鱗次而居星羅而處通貨財有桂楫蘭舟集珍奇有行商坐旅望河橋兮酒幔之高懸聽郢屋兮絃歌之畢舉其鄉落則竹籬茅舍樵戶柴門家不負乎官租犬不吠於花村織女機絲縑落窗間之月農人耒耜耕殘隴上之雲此則東鹿之景物俗美而風淳也至於宮室崔巍樓臺掩映取繫詞之大壯法斯千之餘咏繡衣有院揚肅肅之威太僕有寺著駟駟之政壇祠立而視事孔昭學校修而儒林增重堤堰屹乎如墉編戶鬱然而盛此則制度文爲規模已

定者也若乃忠魂已往正氣未收想英風於一旦傷苦節於千秋休光奕奕兮青吏丹心
之秘宿草芊芊兮荒臺馬鬣之幽甘泉傾瀉兮真人之異猶在石牀清冷兮洞仙之迹可
求擬時齋之逸興雲山藹藹緬滹沱之水合烟水悠悠董元亨之仗節死義耿僖伯之龔
美揚休此又東鹿勝蹟名宦揚天下播九州者也故使騷人墨客掇詞繪章撫乾坤之浩
蕩弔古今之興亡嗟乎維彼陶唐有此冀方吾不知帝力於何有孽臣姦驕爲昏爲妖又
何怪夫治亂之無常嗚呼盛衰有時隆替何妨肆我皇明數隆皇極惟此陸川更相繩繫
若靖遠之文武全才而嗣世襲封毅愍之忠誠匪懈而虞淵取日清修苦節則賈司空之
終始不渝茂譽芳聲則王宗伯之中外敷歷近時則朴菴賈道靜齋賈運兄弟繼其芳見任則
南莊喬英豫軒劉世用潘臬著其績他如佐倅黃堂令丞封邑或文鐸聲馳或諸司效職薦鄉
書者皆廟堂之才鄉舉七十餘人貢辟灘者各冰玉之質歲貢百二十餘人此則東鹿人物之盛撫其概
未究其悉也但見民樂雍熙物蕃滋植櫛比巾連鐘鳴鼎食試詢其故良由我皇上致中
致和天地位育是以斯民鼓舞於不知不識之天謳歌於無反無側之域也客有號虛無

子者進而謂予曰滄海無垠大塊無形子雖東產尙於茲而未諳子獵多方胡於茲而亟稱余曰滄海可以一葦而航大塊可以尺圭而精予之所云非壁魚之見坎蛙之明予嘗據古志考遺經借傳聞於父老酌臧否於鄉評言雖大而非夸事有實而可徵蓋將會古今於旦夕約萬里於戶庭漱九霞雲津之液逞五色琅玕之能以宣揚治世之鴻音永祈景祚於昇平也余豈侈中溢外溢紀無憑者哉客乃驟然而笑拊余而行余亦歸向平軒而兀坐若太上之忘情

辨

黍稷辨

國朝 陸隴其

良耜詩曰載筐及筥其饌伊黍鄭氏箋云筐筥所以盛黍也豐年之時雖賤者猶食黍孔疏云少牢特牲大夫士之祭禮食有黍明黍是貴也玉藻云子卯稷食菜羹爲忌曰貶而用稷是爲賤也贈者當食稷耳黍離詩孔疏云黍言離離稷言苗則是黍秀稷未秀出車詩云黍稷方華二物大時相類但以稷比黍黍差爲早朱子詩傳云稷似黍而小爾雅云

黍稷邢疏云左傳黍食不鑿黍者稷也曲禮云稷曰明黍是也郭注今江東人呼粟爲黍然則黍也稷也粟也正是一物而本草稷米在下品別有粟米在中品又似二物故先儒甚疑焉今按真定府志有粟有黍有稷而稷下注云土人咸以飯黍爲稷愚嘗合而觀之黍貴而稷賤黍早而稷晚黍大而稷小黍穗散而稷穗聚稷卽粟也今俗所謂小米者稷也所謂黃米者黍也黍有粘有不粘不粘者飯黍也粘者釀酒之黍也其辨甚明自土人以飯黍爲稷而黍稷粟之辨遂淆然本草已分稷與粟爲二種則其相沿之訛非一日矣天啟時新城王象晉作羣芳譜近時江右張自烈作正字通亦皆指飯黍爲稷甚矣俗訛之難辨也真定府志輯於雷禮雷博物多聞一言而解先儒之惑善哉小雅甫田疏又云春官肆師注黍六穀也則六穀總爲黍天官甸師注黍稷也惟以稷爲黍者以稷是穀之長爲諸穀之總名愚按稷賤而小然爲穀之長者以其多歟今土人獨指粟爲穀豈非亦以其爲穀之長而專此名歟稷之爲粟更無疑矣靈壽春秋祭至聖先師以飯黍當稷而不用粟是無穀之長也可乎又稷有別種穗如狗尾草而味最美者謂之梁詩維糜維芑

注云糜赤梁粟芑白梁粟是也朱子鵠羽詩注亦云梁粟類也明會典載祭先師用黍稷稻粱是此梁今或以高粱當之者亦非至若齊民要術云古者以粟爲黍稷梁秫之總稱而今之粟在古但稱爲梁爾雅翼曰梁者黍稷之總名皆謬論矣可疑者惟朱子詩傳謂黍苗似蘆高丈餘按黍苗無高丈餘者此似指高粱爲黍然高粱雖有蜀黍之名乃別是一種非梁亦非黍也意朱子仍先儒之說而未改歟

序

鄭烈婦詩序

國朝李世澤

鄭烈婦者邑銀工宋氏子婦也舅歿夫幼弱謹事寡姑比鄰有惡少者爲邑卒隸美鄭容欲私焉伺鄭入厠登垣而窺之鄭急走泣訴於姑姑憚其凶暴戒勿張也惡少自以爲莫敢誰何復伺鄭如厠登垣而窺且欲踰而逼之鄭復走訴於姑姑度與惡少爭恐不得直復戒勿張鄭於是痛哭不飲食者數日其姑慮婦有不測與其家人防之甚密鄭忽飲食言笑如平常其家防少疎鄭一夕自經死宋之戚屬微以其事聞於官官得其情執惡少

薄扶而遣焉邑人憫其事而高其節多有以詩弔之者雲菴張子潛齋周子間以語予予謂二子曰異哉鄭但爲惡少所窺耳非受其污也可以無死而竟甘死如飴也子謂之何二子曰慮其不免也予曰不然鄭誠慮其不免謀于其姑徙而避之何惡乎生而乃甘死如飴也蓋古之仁人志士其律已也至嚴雖纖毫之類人可代爲恕者斷焉不使加諸其身彼其心以充義之盡則非有之取亦猶乎禦人飴人之行皆同夫穿窬是故耻而不爲也今鄭之可以無死而竟甘死如飴者生於耻也以惡少之窺爲不足耻則可以無死以爲小耻亦可以無死以爲天下之至耻則不能一日覩然於人世矣斯謂充義之盡纖毫之類人能恕之而斷不使加乎其身者耶推此志也雖與日月爭光可也卽古所稱斷臂截鼻之事何以加哉

記

重修學官記

明傅珪

束鹿保定屬邑也唐大歷中已有束鹿之名歷朝皆因之邑治東有孔子廟廟之後卽爲

學歲久弗治日就荒圯春秋修祀事朝夕講學皆稱不便成化十三年泰安周侯冕來爲宰蒞政五年即加修葺於學則修明倫堂東西二齋於廟則修大成殿戟門方屬意於櫺星門侯適用薦而去十九年城武胡侯海者至繼周之跡乃督工掄材大起櫺星門既成方屬意於兩廡胡亦用薦而去矣宏治改元二年山右弋侯福至謁廟講學喟嘆曰茲不續迄無成遂嘿圖其所須逾二年凡既具乃擇日事事舊廡東西各五楹每增二楹復加高廣廡中木主香案狹小而舊亦易以新而大者殿前地形卑下每釋奠遇雨登降惟艱則培而高之覆以輒於學則築倉庾闢射圃凡門若墻及生徒肄業之所周侯之修而未備備而復壞者皆爲治之日期成其事不必功自己出也八年工告訖學司訓武定康君紹儒新城郝君鸞走書徵子記遣生員李鳳戴文信以速予束鹿予同郡地弋侯又爲同年友義不得辭惟天下事卒成於自同而敗於自異然自同者常少而自異者常多故成事難敗者易也且爲邑宰於束鹿上有州有府又有御史有都御史皆當請令而行者也苟一人之或異則見厄而不敢行下有丞有簿有尉又有民皆當合謀而成者也苟一人

之不樂從則見阻而不可行况作於前未必有繼於後繼於後未必保其終欲事之成豈不難哉是役也始於壬寅終於乙卯歷十有四年創於周侯繼於胡侯成於弋侯歷三邑宰中間所歷郡大夫御史都御史及丞簿尉之屬又不止一人而卒無爲自異豈其事之成也亦有不偶然耶弋侯以其暇又爲察院公館譙樓南壇西壇復樹名木于邑治西四達之道榜其東曰大司馬北曰太保西曰少保南曰亞卿總顏之曰賢萃蓋爲先達王公驥王公文賈公俊王公宗彝而作俾邑髦俊有所法且有所慕是又起學之餘意也脫後之人不爲異推而大之於其敝也嗣而葺之則所成尙多矣豈直廟學之成而已周侯字文中乙未進士薦爲太僕寺丞胡侯字朝宗乙酉貢士薦爲監察御史弋侯字尙潔丁未進士賢而有惠政累爲當道者所薦其秩位未可量也予特記此修建之始末及其人名氏出處庶來者有所考若孔子之道則如天焉敢輒以臆語形容之

重修護城堤記

呂 柟

東鹿保定隸邑也治在真定東薄沱河自雁門來經靈壽平山晉州深州至於直沽入海

而束鹿間於晉深漳沱故道南束鹿三十里然縣址卑而沮洳漳沱之來也西韓河自大鳴泉南入綿蔓甘陶自平山入松陽自楸山入衛自靈壽入而派潏臙脂諸水亦以次入故漳沱至束鹿滋大數瀾漫北凌束鹿城四城故有堤以障水水殺後邑民或犁堤藝穀堤漸夷西北迤邐猶如帶存正德己卯秋大水晉滄滎口決漳沱濫於束鹿沒了河潰城西北堤西北堤決徑淪四城城外積淤高於街巷公私舍半傾頽辛巳秋患愈棘城內水或尋丈高貧民逃入鄰邑富者編筏而寢食焉縣令臨穎谷鍾英障不能止乃告諸巡撫都御史江西周公儀及郡守陽武王君德輝時病臥牀聞之攬衣起謁周公而先往至則城且陷乃召束鹿士民之留者曰患若此屋產且勿言其如爾父母妻子何尚可义手嘆息待斃邪令曰三人爲囿填決壑得千人晝夜填填口愈狹水愈急德輝乃文告於河曰嗟乎漳沱欲魚蟹吾束鹿赤子乎有頃決合自始填凡五日束鹿人曰神相之也周公臨視喜曰束鹿免矣束鹿免矣謂德輝曰太守得無加病乎時歲方涸寒而德輝扶病督率反瘡抑其救人之心有所迫邪已而德輝又告周公曰不一勞不永佚如復舊堤斯束

鹿千歲之利也德輝乃興四千役作堤四城堤基皆廣十丈上廣六丈有五尺高丈有三尺長二千一百丈有奇乃以郡判劉君濩提調之谷鍾英統領之主簿于獻典史趙晟人頭二千役王官義官及羣省祭官人領二百役分堤五尺有奇堤足皆料檉柳內外盤錯而德輝旬一課焉工始正月至四月而告考於是邑人致仕教諭焦讓及義士王勳會其鄉諸耆俊曰是役也實衽席吾束鹿人於子子孫孫者也然非王公上協周公之心下作諸執事者之志今尚有束鹿乎乃請學諭南陽王璣撰狀使學生喬英李引之間記於戲神近過保定遇憲副賈會期於途其言德輝之救束鹿略亦若此夫昔日德輝之爲御史也先皇帝所諱言者建儲事耳德輝乃屢抗疏言之可殺其身而不顧及其守永平也鎮守太監誣民謀叛杖殺數命德輝平反其餘至係禁獄七月而不悔其與束鹿之陷溺也身嬰厚病觸風霜程畚鍤躬執其勞忘其病而不辭者一也嗚呼格天存乎信建功存乎仁使力存乎度敬上存乎忠慈下存乎公謂德輝庶幾乎此五者非耶嗣治保定者幸無棄其烈德輝名光同予戊辰年進士周公季鳳毛澄榜進士嘉靖元年冬十一月記

修城記

歐陽煥

國家承平日久民物阜熙郡邑設險之制備而不用嘉靖庚戌秋殘敵入寇烽火徹於內地守土者始講捍禦之策維時束鹿尹李子華魯聞報卽釋琴卷省干戈誓衆登埤以守周視百雉陋甚大懼焉詢其故乃知爲元至正間總兵八旦所築國朝賢令黃子嘉胡海周鑰薛朝雖嘗增置之然非經久計也尹曰保定爲國西門束鹿者保之上邑藩屏繫焉入聖運百八十餘年而城郭尙仍其舊可乎慨然有維新之意逮敵遁民安請於當道卽經始焉或曰難哉力出於民貧者不自給富者多免占也工資於財公帑不可移常賦無所羨也人情襲逸而憚勞郡議罔協事或終阻也尹曰有是哉天下之事無以任之則難苟任之吾見其易易也故毀譽之圖審而後靡鹽之慮搖匪躬之節勵而後振迅之謀決吾志決矣吾以身任此矣於是計徭以征役役斯均因事以輸財財斯裕紆經綸陳紀綱要其始終而定以規範令出惟行百議不淆事乃協城周圍八百九十六丈五尺根闊二丈八尺上一丈四尺高二丈八尺撤舊堞爲闌牆高三尺砌新堞於外高六尺四門各益

以重門爲敵臺八四隅大敵臺各二其餘小敵臺十有八設成舖於上隍周圍一千九十三丈五尺闊四丈深一丈五尺外繚以墻高六尺吊橋四各長一丈八尺堅緻可久規模視舊大展以二月朔首事三月三日落成何神哉邑之士夫耆庶感茲不朽之德相率詣撫軍艾公請伐石紀功公曰可其邑博張子守身乃述官僚士夫耆庶之意令四生高龍張世龍閻思賢王潭謁予請文焉予曰賢哉尹也於從政乎何有詩曰訏謨定命言猷遠而號令一也遠則其效大一則其志成是故足以扶世而建功自封建旣罷吏以敏捷速化爲能點飾文具遞相矜炫不暇經久善後之圖吏之遷轉以三年耳誰能以三年之間而慮百年之事乎安在其訏也其有志者又或移於他故而中止安在其定也賢哉尹也其振慮也深其防患也預其施規也大其垂庇也廣其赴功也敏其趨事也嚴不延弛以廢時不冒濫以靡物不蓄疑以敗計不引嫌以妨正凡此十者可謂抱貞不惑策駿絕塵矣用能振起勳功保障元元施及來世非所謂訏謨定命者歟即此則他政可知也束鹿之民其安矣乎至難得者安民之吏也使守郡守邑者皆若尹則郡邑之民舉安守邊者

皆若尹則邊境安守國守社稷者皆若尹則國家社稷安郡邑安邊境安則聖君端拱穆清之上禮樂興而帝道舉矣尹其賢哉真可與從政也哉夫計萬世者聖賢之道也謀百世者卿大夫之業也偷朝夕者小人之心也尹有百世之謀矣庶幾賢聖之道哉迺若曳綏振章食君之祿以爲斯民上而顧下同小人朝夕之計視尹亦有愧矣雖然善以繼乃成功因傳而顯以後尹茲邑者承尹之志守而勿廢謹衣衾之戒預陰雨之謀則民其永賴矣尙慎旃哉尹字季榮別號前河祥符人甲辰進士文學政事有古風遠大之器也他日守天下守國家守社稷可知矣一時仕束鹿者如縣丞張子邦祥主簿孫子挺教諭張子守身訓導張子箎高子章俱豈弟君子共贊其成而承委董役克協峻績則典史瞿子恩之勞居多恩善於其職者皆民之所庇也并及之

後思亭記

陸簡

政之繫人心也甚大蓋有要譽於一時一轉徙而棄之若芻狗者惠也非政也君子平其政而人歸之雖去之千百世不可忘固不思其人思其政也迺若今廣西參政盛公舊尹

東鹿之政庶乎去之千百世而不可忘者耶公名顥字時望常之錫山人景泰辛未進士
拜監察御史立臺侃侃思盡言時政缺失天順間石氏用事公首劾其奸忤旨左遷東鹿
公視舊政紊而不理圖維其新門胥圍皂之屬今州縣吏多用以給芻薪之直至或夤夜
敗吾政公曰毋忽其微正己之端也悉去之一日決滯獄數百人人僦呼稱平定九則之
法以役民而貧富無不均之患貧不能耕者歲時給耒耜激勸之兩賦之外不使錙銖取
於民而用之官者雖一錢尺布之出計必當然使民鰥寡者有養婚喪不給者有助受其
惠而不費暇輒臨學校與諸生問難經義詢得失周旋若師友諸事樂從之游而文教興
行雖田里小民亦知慕禮讓而日銷其悍鷙之氣四境大治縣庭晝寂無誼譁聲巡行之
使入其境一揖而去無所廉問逾年持母喪回邑人髻倪遮道欲留之泣送郊外郊外之
氓復相率攀號留之不得各解其靴一懸之邑門既去而思之日夕焚香籲天望其必復
天順庚辰公服闋而代公者適卒邑人奔走上闕以舊侯請詔可之遂起復公使往邑人
相扶携迎道上權呼如家人父子之相值舉其舊政而申令之風聲所至民從之惟恐後

田氏兄弟爭財十年訟於官公諷以古人兄弟之義曰爾曹以昔人待我今爾兄弟不能如古人則所以待我者我何敢當之二人悔悟復與同屋鄰境之民聞風而往愬者日相尋於道公慰遣之民曰吾黨不幸不得爲束鹿之民沐餘光然仁愛宜不間彼此賜一言足矣乃使自致其與愬者來爲曲直之成帖服去癸未歲大饑公境內獨賴賑恤之勤晏然無轉徙之苦向之流離遠近者日歸之初年編戶若干社旣而增九社里巷之兒歌其政者有清如水明如鏡之言頌聲載道達於朝廷褒異之擢福建邵武府太守邑人願終留之而其長則曰吾儕同望公之寵祿曰躋也今何敢以百里之地終淹之哉旣去乃相與謀築亭縣治之東題曰後思使去此千百世過此亭思公之政不忘於戲漢稱循吏若何武者爲有去後思若公之爲束鹿嚴明而不近於苛優游而不流於墮雖古稱神明之循吏豈弟之君子無以尙之何有於武哉而人思之固宜然於是可以見心之好德不遠三代今四海之大司民牧者衆矣能庶歲乎三代之治而得人之思如公者何其鮮也公之爲邵武則邵武之民思之如束鹿閩藩之臣以邵武旣治而薦公更守延平則延平之

民思之如邵武公何以得是於人人哉戶部主事王君表倫東鹿人乃道其邑老范居禮及姻婭輩甄緒之意假予言紀公歲月於庭下之石雖然公之政在邑人之心當去之千百世不能忘何俟予言然亦黽勉爲之記以風勵乎爲民牧者况公今方叅政廣西將來之用未可量因以使天下後世知國家循良之有人而黜陟之有道也不亦美乎

文峯閣碑記

王明

夫人才之盛衰豈盡由于形勝乎或者曰山川之所殫結風氣之所翕藏畜靈深則發祥顯理有固然何足異者東鹿爲中輔壯邑往昔英賢輩出代不乏人唐宋時張公董公忠義炳赫千載下猶有生氣迨明自忠毅毅愍二王公而下元臣巨卿勳業文章後先相望攷之簡冊班班可睹已邇來三十餘載衿冑日增而科第中歇夫一束邑也而乍盛乍衰若此曷故哉司風教者惕焉有爲清臺之言者曰東故大陸地曩時滹沱河環城之南其縈若帶今北徙漫流入海水瀉無情靈氣罕聚職是之由蓋于治城之巽方營閣爲填乎蓋巽爲風風宜藏不宜洩故云維時別駕陳公領之首爲之相定其地邑令許公朱公趙

公相繼來倡其役而邑人咸踴躍輸貲飭材鳩工爲層樓梯而上者二高若干尺初年始視事時工方半會兵憲四泉余公巡部至見而嘆曰偉哉是舉乎緊余有風教之責者當何如以勸相之耶爰斥俸金助之遂訖工焉旣成而命之曰文峯閣挹庚延辛巍峨截業輩如煥如自有邑治以來此稱奇觀矣余惟斯閣之建爾父老豈其以土木金碧標致輝煌而恣游觀也哉乃各爲若子弟起家計深且遠斯美意也而貲不借于官帑力不煩乎里氓越二載而告成日費亦甚矣余願爲若子弟者之體若意也今天下山川列在封疆標奇獻異者何限假令士不自奮亦徒然爾即向所稱鄉先哲固皆靈氣所鍾稽之于傳有曰博聞強記有曰精思力踐亦何嘗不由學而顯乎故形勝之說不可謂無而所由成之者人耳且也物不震不發人不振不勇使爲若子弟者誠視斯閣之巍峨繹文峯之名義悚焉思毅焉奮而益精其學業焉庶幾哉前修可企而人才之盛視前修有加矣豈亦爾諸父老建閣之初意乎故余願若子弟者之體之也爰勒之石俾有志者省焉陳公名九疇平湖人許公名恩絳州人朱公名一化鄆縣人趙公名誥淇縣人

新建滹沱河祠記

孫承宗

余郡二十州邑而半以水患鹿城滹沱之衝患更厲蓋臬守大夫日爲慮而長吏半從泥淖中顛畫舂插有年矣歲壬子余持節過城下則民廬沒廢什可三四明年則牙舍日艤舟而出且支木以步于時有遷城之議袁令君固不可曰南北不百里誰爲湯湯安流而祈寧土者既上其事于叅知解公則爲高其衛城之坊夾埤樹萬柳亡何水大浸日遣舟出諸溺者而城恃以無恐然從坊視城如盆盜河伯環坊而浸者遂至漂簿書沒民廬父老相率請令君就高阜令君復不可曰吾請命于上矣小民越在泥淖而吾高阜以居乎乃繪圖持上叅伯條次修救數事得還報次第布之于是開粥場築冬生院成梁于隘成舟于闕成水車于瀦鑿坊澌渠以達內浸于舊壑而斷西北之支河越明年三月渠且成叅知公實臨視之皓皓盱盱閭幾爲河也公駭嘆泣下詰且又引咎拜禱相其灣曰是可導而南又指其衝曰當築宮其上以祀河伯更發金爲撫濟院百廬以待諸露宿者越月而祠成又越月而河伯南徙可二里許又越月而邑士庶擊牲享河伯歡呼祠下拜河伯

之既頌叅知公之格神也于是馮孝廉冕次其事來言曰公之格神凡以爲百姓神之既公凡以公前後所賑揀俾明府請無不得殫其心而既遙厪之又躬臨之是用冥章厥績以嘉成勞耳余謂災亦何常備則馮人不備則馮神河之境南若更北也不敢知乃余所知可漸漸之可坊坊之卽蛟騁魚沸地不得寧而必躬必親以揀之使小民不馮神而馮人今天下三事而下輒攢眉于不可爲獨監司守令若可爲而間諉譴于不爲故下有災而令不以聞令有狀而上不以聽卽姑聞姑聽之議蠲議賑而死徙過半矣乃若交相圖畫至塵前矛于河干而親爲指授方略其諭慰父老綏奠溺人備極篤摯然則川靈受貺而浸宅康莊驚波方軌也豈非仁人之效哉昔漢武沉璧撻石而咎河伯不仁王弇州過郡曾曰河伯不仁長吏佐之嗟乎余不敢謂天下有不仁而吏豈其神而不仁今余郡有仁吏神終煩我長笈乎傳稱與溺人寧溺淵然則不仁甚于水也余願吏吾土者爲仁吏土卽溺不溺矣

文昌閣碑記

劉效祖

東鹿縣爲保定府脇邑土沃民醇聲聞甲三輔獨以文運不昌諸士游泮宮者不減三百餘人而十餘科未有中穀者先是解梁王文軒公尹茲邑則慨然念之詢之邑人咸莫知其故公語諸士曰國典文教所當急興天時人事迭相爲用以茲仁里而令才賢者淹滯豈獨諸士任其咎哉要以爲令者不講求而興起之耳今海內有學宮皆崇奉孔子以爲諸士進德修業之正鵠惟是梓潼帝君爲文章司命之神諸郡邑多未有尸祀者茲邑文教衰落若此是不可不借寵靈以資化導乎諸士唯唯曰幸甚公復詢往事得先年署事陳公別駕爲諸士卜吉地于東門堤可建祠宇遂捐秩入若干金爲邑人倡邑人翕然應之肇工于萬歷甲申訖事于戊子計正殿一十六楹外爲門周爲垣第礮攻未徹而公以憂去今公復令密雲東人景自安先以公委督事今來告成于公且謂不可無一言以志歲月余不佞卜舍于密嘗奉公周旋間語及東鹿前事則惓惓焉今以自安遠來屬余爲記余嗟嗟嘆之曰王政以教化爲先務人才以作養爲良圖昔魯僖公修泮宮春秋不以爲勞民蓋重作士之典非消工單賄者可例言也公以政刑修明之暇有意及此可不謂先

知務者哉向者余門人趙方麓君嗣公尹束鹿余亦以邑之文教不振略與言之不知公已先爲着鞭矣豈其神情之偶合若或有之使之耶繼自今邑諸士能不昧公嘉惠之意而爭自淬勵則文昌君神化感通豈不陰持而默相之令諸士翩翩而日振起哉信若是則天時人事公所謂相爲用者正此之謂也余成公之美故爲述其大指更囑方麓趙君礪石以載公功德于鹿人者若此俟將來文運克昌人文駿發指此石而相謂曰吾邑人幸有賢父母能興文教始作者王助成者趙而絳州許君恩四明朱君一化均與有力焉蓋後先相映可以垂百世之芳名矣王公名明庚辰進士山西解州人趙君名誥河南淇縣人

重修文廟碑記

朝國 馮聖兆

歲庚子月在辛巳朔越十日文廟災訶不敬也先是廟稍缺壞禽鳥之乘隙而巢其中者夥焉几上下積穢如鋪雖朔望灑掃草草而已若是者且數年久矣知神之靈未有安也突爾告災而識者相與斷曰訶不敬也時邑侯楊父母下車未久與事適相值侯輒身任

之而不辭越明年迺齋戒沐浴禱於神所而重新焉又先捐俸爲一邑倡侯性介而直敷政臨民一出至誠惻怛故德化所孚不賞而民勸不令而民從一旦率作興事邑之人咸樂輸焉其官於外而輸助多金者爲山東督糧道少參李君世洽浙江巡海道參政姪瑾河南汝寧府節推張君鼎彝在籍紳若士泊鄉耆或輸筋力而侯又躬行省試稽其勤惰恤其勞苦故不日而成視前巍然改觀兩廡櫺星戟門久爲風雨侵蝕并加丹雘亦煥然一新去廟西數十武舊有大悲閣在焉議者以其太高謂於文風不利故重建之曰壯其基地高其柱石積而崇之務使瓴出閣上爲一邑形勝之最雖曰術士家言不必取信然而尊奉聖德惟恐不極其至而稍有歉焉也繼自今其勤於灑掃慎於扃鍵享祀必豐齋戒必誠黍稷惟馨亦明德惟馨神之不休享也幾希是役也仲春鳩工告成於歲七月其主事者爲邑侯楊公于廷江西豐城人其捐俸襄事者爲邑廣文王君麟大名長垣人二尹劉君應科湖廣天柱人其監事者爲庠生張子繩康吳子道生李子世藻魏子時又俱本縣人余以多病故不能從事經營迄今工程告竣爰述舉事始終以志石其諸與事者

咸列姓名於陰

觀靜樓記

陳僖

東鹿劉令公西來先生誌東鹿表章新城八景其一曰遠香蓮沼蓋李少參漑林先生別墅也先生具濟世才中年抱病歸因其居之西北隅瀦水一區濬池種蓮四圍陰以垂柳中築一亭魏相國署曰遠香因蓮而得名也亭之後築樓爲藏修之地自題曰觀靜樓之室曰住心康熙十年夏陳子方應令公召同事纂修會樓成屬爲記客曰先生其逃于禪歟陳子曰子知其一未知其二也先生其理學之宗者乎天下事有名同而實異者則當究其實有實同而名亦不甚異者則不必泥其名子以爲逃于禪者豈非有見于釋氏所傳傳燈錄志誠禪師住心觀靜之說耶客曰然陳子曰子誠知其一未知其二也先生之志特寓意于禪而藏其學耳子亦聞太極之說乎太極者理也一陰一陽之謂道也陽者動也陰者靜也莫不具之于心心統性情者也心曰住者即吾儒之存養也靜曰觀者誠斯明見性地之本來也既曰觀靜而又曰住心者非住心不足以觀靜即吾儒無存養省

察之功心不在腔子裏則不能復而見性之成也由此推之易之所謂閑邪存其誠書之所謂安汝止詩之所謂不顯亦臨無射亦保禮之所謂時觀而弗語存其心也春秋所謂過人欲存天理無非此物此志也先生誠理學之宗者歟必泥其名而謂其逃于禪則固矣客笑而去余因書之以爲記

東鹿縣翔建義學記

王天慶

當今聖天子壽考作人大闡經術以惠教海內無遠弗臻矣故畿輔首郡之保陽設有蓮池書院文教宏開多士畢集鹿城雖隸保屬實處畿南士人心切嚮往跋涉維艱余承乏茲土父母斯民即不敢以興賢育才爲己任而修職業宣德意亦守土者責也爰購屋於文昌宮之旁室宇維新以爲下帷講肄之所前臨清渠復得觀水之樂萃城鄉英髦延丙辰科孝廉李君珍爲學師蓋彬彬焉邑舊有學田若干畝復設措二百金交城中典舖生息月得三金爲修脯膏火之資以圖經久鄉間一二單寒之子月助白米各三斗稍分清俸耳顧念學者之自勸與君子之勸學非始之難繼之爲難也余既謀厥始使來者可繼

計自今洩茲邑者踵事而增俾師弟子學不懈業益修若培木於山畜鱗於澤遲之歲祀當必有干霄之材興雲之鬣出乎其中以應盛朝得人之瑞將見人材蔚起爲植爲幹上資黼黻下濟黔黎或者不忘始事之用心則後起君子錫類之意更深且遠矣

護城隄記

王天慶

束鹿當滹沱下流之衝地衍土疎而水性又復亢悍奔突泥沙交流泛溢善潰有明以來常爲邑患自舊城遷移茲土有由然也城之有隄舊矣原翺始之意城以防邑隄以護城非不堅且壯也其後積年既久廢弛漸開守土者玩日以倖遷而小民嗜利覩近忘遠剝之削之侵之夷之半皆平地卽有存其形者僅一綫耳噫一邑之中廟祀壇壝在焉倉庫廨署存焉士庶室廬集焉而所恃惟一城城所恃惟一隄隄壞城湮巨浸適至其何恃以無恐非守土者之責而誰責耶丙辰秋余承乏茲邑見百務俱隳心甚懼焉爰於小民農務之暇漸次整理首城隄廟次文昌宮次義學次養濟院次劉將軍廟次倉庫衙署鳩工庀材日不暇給而戊午秋淫雨綿延十餘日河決邑南孟家莊大里寺四七營大營等村

余方偕僚佐相度沿河地形以爲守禦計而役奔來報河水逼城余乘筏歸則水與隄爭隄弱水強壕塹已盈漸與城鬪矣登時率城中四關居民闔門擁土爲權宜計而水亦漸次衰止復歸故道一邑之人獲有寧宇者亦幸也已記曰以舊坊爲無所用而壞之者必有水敗不信然乎越明年雨暘時若蝗不爲災二秋頗稔因申請上憲動帑興修各憲念切民瘼卽賜允而民亦和會咸來趨事興工於己未九月朔日訖役於庚申四月旣望計長一千餘丈高闊悉照估計分別土性層夯疊礮蜿蜒迤邐如虹之繞如虬之蟠又於頂冲之處播置荻葦無數環堤栽柳二千餘株以爲隄界而卽以護隄將來青蔥蒼翠如幕如織不居然茲城一鉅觀也哉是役也其費則朝廷公帑其修則各憲雅意其力則取諸民其成則因乎時余特藉是以謝守土之責而告無罪焉耳非敢自以爲功也爰勒諸石以告後之洎斯土者先事豫防無若予之因警後戒則又幸矣至於省勤惰則縣丞張建鎬管河主簿郝浩與有勞焉

三莊建立公館碑記

王天慶

爲政之道貴溯流以窮源在興利而去弊余洎束數載凡閭閻疾苦民生休戚悉心訪察不憚諮詢期與吾民去一弊便受一利間有難於盡除者必幾經籌畫而後見諸施行如城中南北公館二處爲憲節經臨同官來往而設此不過偶爾停驂非久爲駐筭之所在城紳士皆簪纓世第夏屋渠渠豈於公祖父母信宿居停遂有吝惜乎何至數十年來爲一公館名色派累多金貽數莊百姓世世之憂房主享不美之利官常受派累之名經臨者若知此隱弊雖露宿風餐亦弗恤也如云優免莊民雜派則當今功令嚴密久鮮累民之事余履任以來並無差票沿村呼擾我士民所共聞見即不免者猶免而奚擾之爲惟是束鹿乃保屬劇邑上憲同官來往頗多因與紳士議將每年派累南北公館之裴辛莊小馮莊孤馬營莊自戊午年起至庚申年止共得莊銀四百二十兩就文昌宮西偏購置民房二座計三十間益以廉俸咸與更新前臨清渠植藕千莖頗類蓮池書院爰作義學俾師徒講讀其內偶遇星軺經臨仍爲下榻之所從此三莊無派累之苦即大小差徭永行邀免但屋宇雖新而一切應用器具蔑如且風雨飄搖難免殘缺三莊咸樂歲修置備

今公館之費既可永免而文昌宮城隍廟每歲演劇祭供需費三十金勻之三莊並廟地三十畝仍令李紳濟衆董理其事較從前五十兩所費少而苦樂均矣時將革除派累議建始末且陳列憲深蒙嘉許後之君子其勿忘始事之用心焉則幸甚爲勒諸石以垂永久

重修南池書院文昌宮新建夢花堂碑記

李文耀

南池書院建於前邑令晉江王君君既改查君祠爲文昌宮卽於宮西立書院兼作候館以南池名者前臨城中長渠俗傳滹沱故道者也歷二十年棟宇剝落絃誦之聲無聞余蒞任謁文昌宮蠶次鼠跡砌圯櫺欹學舍荒涼不可跂足所謂南池者亦日就蕪堙余悚然曰書院之設所以廣聖天子教育之化成德達材與邑運盛衰相繫其烏可以不振且帝君握斗柄掌文教而弗潔弗虔神之不妥降祥安在急鐫清俸大加修葺宮之內外丹堊有耀豐密棟羅几筵成秩正中建龕金塑帝君神像弁冕珠章赤舄左右侍從咸肖宮後查君祠亦重葺焉後以地隘狹於宮東購里民毛氏地一區縱橫數十武建新堂三楹

旁爲廊舍繚以周垣設講席於宮中使教者學者仰止景行肅息心而發文思宮後爲師齋旁爲學舍而新堂則爲吟咏游息之所其西講院并加丹堊厚其墻閤使節至爲宿廬餘仍以處諸生延名師撥膏火月有課歲有程然後規模粗可觀焉迺濬南池而深之植蓮千莖環以桃柳池每歲夏月涸恒藉剡挹茲則源頭活水宕漾紆餘雲影天光與經厨史櫃相煥發秋初蓮吐三葩清香飄裊余偕館師及諸生坐新堂中顧而樂之賦詩紀事有彩筆生花君夢否之句因顏其堂曰夢花堂是秋年舉賢書一人武闈又獲雋二人適符花兆誠盛事也曩余在雲間上海重修申江書院在豫章上饒創建靈山書院各規模宏鉅生徒雲盛於邑兩處文運俱有振興今茲是舉未敢夸爲巨麗惟是恭承聖化仰藉神庥毓杞梓於貫城培芷蘭於潯水行見是邑之秀必有爲瓊芝爲瑤草獻諸彤延者此固余惓惓之苦心而亦欲後之君子相與振興以垂諸久遠者也其爰鐫年月於石

重修護城隄記

李文耀

案周禮職方并州山曰恒山川曰虜池師古曰虜池音呼徒卽今潯沱也自山西入直隸

境而束鹿適當其衝明天啟壬戌舊城圯於水遷邑茲土令之所以籌保障者視他邑爲尤難城舊有堤計長九百餘丈高六尺闊二丈前令之用心可謂勤已歲月既久馴至損壞每遇滹沱漲發波濤春擊直撼長堤沙石魚龍蹴踏奔轅隄視昔日以寢削去年晉州河頭村水決新河直衝至城僅賴一綫之隄以爲捍蔽余目睹焦勞僅而獲免倘不急加修築卒遇水至隄一不支害曷有極隆乾二十四年春余捐俸鳩工增高培厚昕夕省視民趨鑿鼓踴躍恐後於城西北大堤口頂冲之處加修三十餘丈城東北殘缺處加修五十餘丈統計隄長千餘丈高視昔加三之一闊視昔加四之一當蒙道憲經臨查勘慰諭諄復務歸堅實遵即續加舂鍤層疊鞏固又於東門外向未設隄處環築壕墻一道計長二百餘丈高闊悉中程度以備不虞興役於二月十五日於三月初二日工竣是役也不費公帑務絕派累悉分廉俸爲吾民圖經久之計民大和會不浹月而用底於成世之游民者動謂蚩蚩者覩近忘遠可與樂成難與慮始以余視茲土之民趨事赴功奮勉不忘俗何淳也憶余自甫下車以地處窪下土性疏而水性亢悍諭令沿村各設壕塹以捍水

患而偕出入謹守望意亦默寓於其中後邑屢被水卒不爲害民歡呼四野知壕塹之爲功甚鉅故茲者築隄之役一唱百和非所謂登高而呼勢加疾也余仰承上憲慈惠下順輿情因勢利導其何力之與有特藉手以告無罪則幸甚矣爰記其重脩之月日以諭後之君子無棄前勞而蘄有以保護之此又余與斯民所引領而望者也

重修養濟院碑記

李文耀

文王發政施仁必先鰥寡孤獨禮王制瘠聾跛躄斷者侏儒百工各以其器食之月令之恤老字孤漢詔之振窮其政一也皇上嘉惠黎元痼瘵在抱教養生息既合寰宇爲春臺猶恐匹夫匹婦未獲其所於是設養濟院給其衣食安其棲止嗚呼仁政之周詳度越萬古觀乎此者怵惕惻隱之心可以感發而興起矣邑養濟院在城內轆轤街前令晉江王君建歷年既久風雨飄搖漸就傾圮每秋霖積潦匯爲汚池蕪穢薰蒸過者掩鼻余惻然爰捐俸而重新之厚其墻墉密其椽桷堅其坊壘瀦者疏之穢者蠲之莽者刈之可以蔽風雨可以免蒸濕使孤貧之棲息者含哺鼓腹如優游爽塏中焉夫天地有沴鬱不齊之

數民得之爲札嗟天昏又其次爲些窳孤子惟在上者周其疴癢疾痛使與吾身呼吸忻感息息相關然後可以補元氣而迎和祥余嘗攷周禮恤孤惠老自出廩粟至造疔瘍委曲纖悉無不具備而善宣王之中興者亦爲之歌鴻雁焉我國家深仁愷澤上召天庥時和年豐邑無雁戶惟是二三失業之民荷蒙恤政而有司視爲具文則良法美意墮於因循其如此斃獨何此余所爲滋懼而急爲葺修者也外留養局三所一城北關外一舊城一辛集亦皆重葺加聖期堅固立標額例得附載

重修光武廟碑記

李文耀

束鹿縣西傾井村明嘉靖五年創建光武廟傾井村者以井名漢光武遺蹟也方光武馳驅河北道經此地三軍渴甚無汲具光武命衆以手扳之井忽傾欹泉水湧出歡聲四動謂有神助迄於今代遠年湮改邑不改井感歎疇昔其遺事猶恍惚遇之嗚呼跡亦異已廟與井密邇國朝順治十五年康熙四年相繼脩葺歷時既久苔蘚侵蝕殿宇漸朽壞井故覆以亭不甚軒豁又門墻頽塌俱盡無以肅觀瞻乾隆二十二年春文耀承乏茲邑諏

吉謁廟庭耆老相與頌靈貺謂近廟二十里內無水雹災心益異之即謀所以新茲廟簿書期會鹿鹿未遑二十四年秋溥沱水溢勢方張文耀日夜省田疇督舂鍾凍瀆焉懼斯民之罹於害河忽南徙自晉州張岔口至寧晉營上村入滏張岔口迤東東鹿境也濱河之地南北二支共長四十餘里俱成平陸先是廟濱河濤聲春撞洶洶不絕溥沱改徙遂爲沃壤民素力農爭先樹藝制府桐城方公勘河至境具以新河已成大浸當因勢利導及束鹿故道無事濬復情形聞於朝奉旨俞允制府因偕道憲壯公府憲王公詣斯廟憑欄四眺麥秀新疇烟樹空濛隱見杳靄清泉灑灑心神俱曠相與賦五七律二章紀時事表遺蹟樂民休而歌神社也溥沱之徙羣公咸歸德于神謂廟貌不可不新以命文耀文耀謹承命卜吉興築庀材飭工經始于是年十月朔明年五月望落成高其閤長垣繚之計廣袤七十餘丈有亭翼然覆井廟極軒翥重塑神像擇吉妥神廟之東偏築亭三楹敬鐫制府詩章暨羣公和什永垂休光于茲土西偏壘石爲山洞穴幽邃蔭以嘉樹山之後構小亭宜憩息遠含天碧邇延綠野羅勝景于履舄之下致足樂也夫光武爲漢中興

賢主躬親戎馬靈爽式憑當險阻艱難之時嘉祥畢應若溥沱冰合傾井泉溢皆是也則夫遺蹟所存即于以棲光武之神而降福黎元禦災捍患有斷然而無疑者我皇上德牟造化百靈効順周公召公化行畿甸束鹿以葺爾邑當水之衝民嗟胥溺一旦水患盡去得收地利廟成而饗神明德維馨之義實于是乎在末吏得躬際盛典辛與吾民樂休養于無窮也謹記

望麥樓記

李文耀

署北有翼然高與城際者舊曰北樓上爲睥睨之形郊原雲樹若浮几席前人所由眺咏處也余泣任以後勾稽簿牒興修廢墜未遑寧息每秋霖如注則登樓四望念令足以蔽風雨而吾民田若廬恐或爲溥河巨漲所汨徙倚不能下庚辰秋河既南徙越明年春麥大稔有雙歧有九穗余亦幸獲息肩乃稍葺茲樓公餘焚香展卷四顧封中遠吞山岱近挹原香心殊樂之昔米襄陽知無爲軍築新樓成秋稻既獲宿雨初晴見四野菁蔥問吏人曰此稻孫也公喜以名其樓余安敢妄希公而巨壑遠移新畬沃茂若會逢其適者既

以自幸而勤修其政以召天和永登吾民於衽席又自勵也爰以望麥顏其樓而紀其實於後

重修城隍廟碑記

李符清

鹿城之城隍廟有二一在舊城西街銅像鄉人建殿祠之一在今縣治西北自明天啟六年邑侯宋公創建迄國朝以來邑侯楊公沈公王公三歷增修規模稱宏敞焉余以乾隆五十三年宰是邑下車謁廟像見堂庭廊廡多爲風雨所蝕慨然曰此廟不脩且壞遂捐俸構材鳩工擇邑紳士之能者董其事於是修飾舊者添增新者廓而大之煥然壯觀比前之所修更唐哉皇哉斯真足稱宏敞矣工既竣余調任天津未遑紀之也越三年復宰是邑偕斯民之父老子弟復覩所謂煥然壯觀者而講彰瘝修悖之義於斯廟俾斯民之循循於法紀彝倫之中脩五教親九族以致其禮祀而享年豐降福之休洵非偶然也或問於余曰鬼神於人何與乎冥司之說信何如也公乃汲汲於是余曰噫子不知鬼神而不觀之人乎天地之大也人與鬼神共居之天下之人之紛紛也亦人與鬼神共治之先

王之以神道設教也非以誣民也風雲雷雨屬之天而有司之者矣山岳川瀆屬之地而有主之者矣司之於天者稱以師焉主之於地者視以公侯焉公侯稟天子之命以治於明鬼神亦稟天地之命以治於幽欲天下之無治不可得也後世守土日增政令日繁於是郡州縣之官焉即有郡州縣之神焉郡州縣之官稟天子命以治於明郡州縣之神亦稟天地之命以治於幽欲天下之無治不可得也然則城隍之神何據乎曰有其邑則有城有隍有城隍即有城隍之神亦猶有其地則有其邑有其邑則有其官鬼神因人而有者也既奉之爲官長矣而烏得不有官長乎既奉之爲城隍之神矣而烏得不有其神乎今余之新斯廟也非獨以爲鬼神之教也亦以爲宰是邑者之宜聰明正直而壹者也邑宰稟天子命以治於明城隍亦稟天地之命以治於幽欲斯邑之無治不可得也曰後世稗官異史言城隍之神有可以人爲者有補有調有署篆皆鑿鑿可據其信然乎曰此儒者不必言而傳說言之有其理則有其事信之於理即信之於事可也信之於明即信之於幽可也余不能與子觀於幽與子觀於明可乎因或之問也而并論之且書之碑俾

知余之再來於此復得與斯民之循循於法紀彝倫更講明彰瘝修悖之由有以自信而臻康和之福者則亦洵非偶然也

重修慈雲寺碑記

李符清

東鹿城市鄉鎮道釋之宮以累百數而廣福慈雲爲之冠廣福寺在縣治北三十里之王封村建於康熙三年崇閎巨麗規制恢大士女信向焉慈雲則權輿於宋直邑城南門內原名大悲寺明成化中增建大悲閣奉安大士像高六丈餘邑志所云佛閣晚鐘即此國朝乾隆二十六年前令李君文耀復捐金修葺改名慈雲其規制與廣福埒邇者三十餘年風雨剝蝕殿閣垣墉傾圮殆盡寒煙敗草瓦礫盈階栖鳥雀而牧馬牛者久矣余戊申歲履任後過其地顧而嘆息即有意修復以學宮城隍廟工未訖不遑而止甲寅再蒞茲土幸年穀屢豐河流順軌因捐俸爲邑人倡而邑人亦輸金左右之遂鳩材召匠諏日重修屬邑紳張君嗣房董其役凡像設之隆剝者榱桷之蝨敗者土石之積者泐者靡不新之又增建配殿三楹客堂六楹佗若栖禪之所演法之堂旁及齋寮厨庫之屬大細略備

修除黝塋堊金設色凡九閱月而告厥成於是煥若改觀而廣福之崇閎巨麗視此不逮矣工既竣邑紳士固請曰是不可無文以紀其事余曰是役也豈惟是惑於施報種福田祈福利云爾哉蓋有會於慈雲之說而以爲吾民也聞之如來慈心如彼大雲陰注世界揆其旨亦欲世之士女皆爲善良而已今寺雖在闐闐中市壤賈區鱗次櫛比無山水之勝如保定之靈雨正定之隆興足爲士大夫遊覽然而鐘鼓魚版梵唄悠長日在庸俗耳目間或藉以警其媮惰激發其齋心以向善不倦將如來之陰注在此而余慈惠斯民之心亦在此矣爰叙其興修本末俾刻諸石其捐貲姓氏則列於碑陰云

重修慈雲寺碑記

張鍾秀

余素不諳佛經而獨有會於因緣之說謂凡物廢興皆有大力者爲之趨負其間機緘之湊合若絲牽繩貫適然而非盡適然茲於重修大寺益信寺創於宋傳於明一修於正統辛巳繼修於成化戊午此後隨時補葺邑乘缺焉乾隆二十六年辛巳闐中李邑侯芟裳重修余先大夫實總其事九閱月葺工改號慈雲蓋取覆被衆生之意迨乾隆四十三年

溥沱水驟漲突入南門寺內外悉爲河伯所據墻垣坍塌廟貌傾欹距前修未及二十年而功程盡棄時余備員山右遙聞此耗既嘆物力之維艱又念先嚴經營之不易心竊傷之私計舉廢有時非得賢父母如閩中者未易振興也戊申秋嶺南李邑侯載園來宰斯土甫下車即雅意重修緣諸務未遑庚戌調任津門尋以艱去五十九年甲寅再蒞吾邑弊革廢舉神享民安謂慈雲古寺夙愿未償毅然倡始首捐廉俸三百金里社中樂施者復隨多寡釀金若干商諸余且欲余長子嗣房獨領之余曰恐渠不堪驅使耳以云繩武不當盡心耶於是庀材鳩工自閣殿以至山門凡五進金碧輝煌崇閣巨麗及夫客舍禪室畫壁遊廊無不曲折如意是役也經始于嘉慶丁巳之秋告成於戊午之夏亦九閱月竣工名爲重修實同創建邑侯卜日蠲潔詣寺瞻拜余隨祇肅禮佛畢向邑侯拱立而致詞曰天下大工大役惟大力者能任之此寺頽圯幾二十年必得使君重來始克移易改觀東坡爲第七尊者作頌曰我以道眼爲傳法宗爾以願力爲護法龍使君當亦佛門大弟子與因思舉廢有時前後三十餘年間興衰互異而一總理于吾父再督工於吾子余

皆目覩其事機緘之相引宛乎有待而然余固未嘗潛心內典竊信因緣之說爲可味也
爰綜始末而爲之記

碑

元中書左丞耿公先世墓碑

元張起巖

皇帝即位之三年龍集乙亥至元改元之冬閏十二月二十一日己亥制中書左丞煥先
世之碑翰林侍講學士起巖撰奎章閣承制學士師簡書御史中丞師敬篆其額臣起巖
承乏文翰紀載職也其曷敢辭謹按翰林待制偁溪斯所錄事狀爲叙銘之耿氏世爲鉅
鹿大姓漢上谷太守牟平烈侯况東郡太守東光成侯純皆鉅鹿人况子弁佐光武中興
圖像雲臺弟舒國諸子恭秉夔純弟訢宿植皆以功名自奮蟬聯圭組終漢之世爲大將
軍將軍者十三人卿十三人尙公主三人列侯二十三人關內侯三人大司馬騎都尉中
郎將護羌校尉刺史二千石數十百人東光侯純之後仍居鉅鹿宋子之龍華里趙州平
棘故宋子也有諱彥明者遷祁州東鹿縣之良馬鎮遂爲東鹿人厥後中微世以農隱至

處士巖躬勤儉至殷富生子福字伯禧沈鷲寡言有材略善騎射讀書通大義家積粟萬斛鄉鄰窮乏周繼之有執券貸乞者如數與之而焚其券太祖兵入中原金徙都汴河朔盜起郡縣守宰委印綬去民莫能相保衆推宜攝縣政保庇一方者無愈耿公父老子弟相率陳請公力辭不能得與衆約曰毋陵寡弱毋取非義毋犯非禮毋游手乘本業者等能聽我否皆曰唯公所命於是號令明信境內肅然盜不敢犯太祖八年冬太師國王穆呼哩徇地至東鹿遂以其衆降明年春遣使至冀州金節度使連恒山公武仙閉城不納使者國王怒命公討之公度用兵必多殘民不若招之果不來我興兵有辭矣乃持檄往諭節度者稔公威信然猶持兩端曰若遣所親來當奉城以歸遣妻兄董善往即開門納善以降因善執贖來見公曠懷開納握手叙歡禮遣還鎮彼懇請一人監治軍事公曰君仗義來歸豈反覆者何以監爲固請不已遣董善爲之佐冀州平謁上行在所賜金織衣一襲名馬二鞍勒具拜鎮國上將軍安定州節度使行元帥府事便宜行事佩金虎符其年秋武仙來攻公悉銳卒逆擊大小三十餘戰鋒未嘗挫仙怒以火砲攻北門火起眞武

殿傾公禱曰神血食此土土人亦唯神是依今一城之民懸之于神神其圖之言未既雷電四起雲霧晦冥反風滅火大雨如注仙恐懼然失錯爲却三十里俄聞劉便宜以兵自隨往東萊迎邱真人行次安平推牛饗士宣言於衆曰劉便宜領精兵來援期以旦日破賊士衆立功在此舉也諸軍聞之勝氣百倍夜半分兵三隊出城逐北鳴鉦伐鼓大譟並進仙倉卒不知所爲遂棄營走公以精銳三千銜枚追擊斬首數千盡獲其輜重兵甲仙僅得免自是不敢復來威名大震隣郡爭附順大帥張柔上其功加輔國上將軍癸巳二月遣疾二十五日疾革召語諸子吾起家壘畝身經百戰誓捐軀死國事不意獲歿牖下今天下平定汝等但讀書力田鄉里稱善吾死不恨矣言畢而逝時年四十有九三月二日葬良馬鎮之先塋凡三娶初董氏繼二張氏子男四曰孝祖襲束鹿軍民長官贈嘉議大夫禮部尙書上經車都尉追封高陽郡侯曰紹祖束鹿縣尉曰彧曰冲女二長適藁城王元帥善之子慶滋次適寧晉王元帥義之子楫尙書以至元元年甲子七月初七日卒年五十五卒之十六日葬元帥墓次娶崔氏追封河南郡夫人繼張氏李氏子男八人長

繼先次繼初次繼元參政也次繼明繼亨繼榮繼昌繼安女三人長適牛仁次適酒醋稅務副使李泰次適李紹先參政字舜臣幼穎悟好學博涉經史尤好春秋左傳及司馬氏通鑑年十八以質子入宿衛三年襲束鹿縣尹官制行遷尹行唐固安錦二州判官葛城大同河間三縣尹同知絳州事積階忠顯校尉所至以廉直剛敏稱錦州二劇盜據險聚衆燹民廬舍掠人妻子刼取財物無寧歲參政到官率壯士抵巢穴掩捕誅其渠魁縱其脅從者巨害滅除民德之號其山曰耿公山大同有達官得旨賜一山爲獵所山產煤炭彼因欲錮其利奪民窠洞參政反覆陳說卒歸之民宋舊臣家鉉翁寓河間暇日執弟子禮師問聽其講說無倦至元三十一年甲午九月十日卒年五十五後十五日葬先兆累贈中奉大夫河南江北等處行中書省參知政事護軍追封高陽郡公取葛氏追封高陽郡夫人繼朱氏三子長子蔚承父澤入官以束鹿縣尹致仕中子左丞也以國子伴讀貢刑部掾歷司農中書掾初命工部主事員外郎郎中至尙書歷工刑禮戶四部由都事爲郎中在中書左右二司由僉憲憲副爲使遷河東山東江西浙西四道由監察御史都事

拜治書侍御史侍御史六登中外臺爲執政在江西江浙行省中書都省累二十三遷今爲左承季子黻行宣政院都事卒女六廣宗縣尹王宗門儒士張從政季疇馮世榮駱彬順德路總管趙思恭其壻也男孫五日時中日時獻日時敏日時習日時泰女孫四長適王瑞次適保定翼千戶張宏毅次適趙咨季幼在室上世塋於邑西南鳴琴鄉良馬鎮至治元年左丞上塚見塋有積水痕知爲滹沱水所侵乃遷元帥府君而下葬邑東南八里杜林之東原禮也耿氏勳伐顯東漢名在信史休有烈光世遠而微儲厚發宏以有元帥三傳而至左丞遂相長子爲時良臣元帥以讀書力田遺訓後人詒謨遠矣尙書恪共承緒參政折節力學摧暴尙賢襟度宏偉宜膺大任終老州縣之職生不受社萃于上嗣高爵顯名卒享而有君子于此可以知德之自矣臣起巖旣論其世敢繫之以銘

銘曰耿惟邑氏鉅鹿世居族貴而疆碩大以敷有徙茂陵有留宋子風聲氣習沈雄肖似弁佐光武圖像雲臺純功戰多帝謨與諧累將重侯通籍宮壺與漢匹休貂蟬圭袞韜光蘊德豈其中微積久而彰於鑠其輝元帥巖然果毅明允深叢孤熊華嶽秋隼尙書嗣業

大參克家位不盈德贈典有華侃侃左丞剛方正直善聞孔昭先德之積急賢重士雅重曠懷粹如充如羞有自來貴而無驕勞而不伐篤恭力行是惟家法處不辟患進不隱賢蹇蹇匪躬庭訓則然慶善日增儲數十世錫羨流芳發于來裔公侯子孫必復其始在昔先民言徵於是派流之遠其源則深匪裔之前豈於斯今鹿邑東南佳城鬱鬱有封若堂有植維芳穹碑表隧詔臣撰銘焜燿世閱式勸在廷於惟帥君乃心帝室至于曾孫心期愈白宜其寵錫光昭後先煥美東都垂鴻永年

明贈靖遠侯王忠毅公墓碑

明李賢

本朝之制文職不許封爵邑惟有軍功者不在此例自洪武以來蓋將百年于茲矣在文職有軍功而封伯爵者始見一人焉靖遠伯王公是也嗚呼休哉賢於宣德中初詣京師登進士謁六卿惟公磊落倜儻光明俊偉已著于一接之間既而功名事業碎訇宇宙譬之梗楠豫章其勢必至於昂霄孰能禦之公今逝矣遺言屬予爲神道碑顧予忝居詞職敢以空疎自免按冢宰王公翔狀公諱驥字尙德系出太原先世有宦遊雲中者因家于

宣寧高祖而上多顯仕途曾祖守道篤好儒業尙志林泉祖思宗仕元爲高陽令有惠政父成好善循理適元季兵亂因徙家東鹿母程氏佐以勤儉遂立恒產公自幼警敏爲親鍾愛年十三遣入邑庠卽有行遠大志奮力進學未幾父母相繼以歿公哀毀盡禮能自樹立遂領鄉薦登永樂丙戌進士第拜兵科給事中尋出使山西見徐溝民困奏免鹽池虧課二十萬時應天府缺丞務急且冗委公署之立辦復權行在都察院持正不撓適以外臺缺人特陞山西按察司副使至任發姦擿伏憲度爲之一清洪熙改元仁廟素知公才召爲順天府尹公感激盡心革其宿弊民皆稱便畿甸大治特賜誥命以褒之宣朝卽位改元宣德之明年陞公行在兵部右侍郎時慮南京根本重地眞定定州畿內要衝秦蜀二府護衛官軍且衆兩遣公分調屯駐公皆處置得宜乙卯進陞本部尙書先是阿台朶兒只伯人馬猖獗甘涼一帶數被其擾貽朝廷西顧之憂今皇上卽位改元正統之明年特遣公往巡許以便宣行事公至見沿邊城堡不堅烽堠不備將無紀律兵無銳氣歎曰邊防如此宣乎寇至翊日大集官軍問曰往年出兵遇敵於魚海首先退縮者誰歟咸

曰都指揮安敬即命左右引出斬之一軍股慄又誓於衆曰自今遇敵有不前進者罪亦如之於是號令一新兵威大振既而把秃孛羅入寇莊浪公速遣都指揮魏榮授以方略率兵勦之遂擒其部落敵始知懼遁走公閱甘涼軍冗曰兵貴精強乃躬爲選留退其三分之一咸以爲便八月還京上親慰勞敵聞公還復來侵犯上復勅公往監總戎公至遣其將蔣貴率精騎數千出境追勦且戒曰遇敵不捷無復相見再遣偏將趙安率兵繼之公與太監魯安都督任禮統兵應援遂擒阿台俘殺醜類幾盡邊境底寧捷聞上遣中貴齎金幣勞公加兼大理寺卿明年還京先是雲南麓川宣慰使思任發爲叛累征不利辛酉春復以蔣貴爲總兵中貴監軍率兵往討之命公總督軍務賜以明鎧雕弓蟒龍緋袍以壯其行至聞賊在大候州公即遣都指揮馬讓授成籌以往斬首數百級餘賊遁去是歲多大兵既集公議分路以進會於上江夾攻賊寨因風縱火公身先士卒大敗賊衆斬獲無算賊首父子僅以身免遂盪平巢穴捷聞降勅獎勞召公北還過大理土官馬沙鳩殺巡檢其妻訴之公一訊得情沙遂服辜蠻賊韋郎羅造釁於維摩州公遣指揮萬城先聲

率土兵討之賊皆潰散郎羅逃安南公即傳檄諭之其守邊頭目斬首來獻廣南富州土官濃郎舉沈政讐殺十餘年公宣諭朝廷恩威以撫之兩讐頓釋至京上親宴於奉天門文武百僚以次設宴士林增重莫與爲比於是論功封公推誠宣力武臣特進榮祿大夫柱國靖遠伯食祿一千二百石特賜誥券追封三代曾祖考皆如其爵妣皆伯夫人未幾思任發爲緬甸所獲恐復會衆上召公曰勞卿再一行耳公即慨然奉命復爲總督軍務至金齒諸寨酋長送款公遣人促緬甸送思任發至軍前緬人佯諾不送公曰緬人黨賊須以大兵臨之乃至騰衝分爲五營公與總兵蔣貴沐昂分督以進木邦宣慰統兵萬餘駐於蠻莫江潯觀我軍容公責以忠義賞以牛酒遂感悅而退緬人擁衆大至公即密令蔣貴率兵匝江而下焚其舟數百艘大戰一晝夜賊潰遁去捷聞上召公班師至京慰勞益厚加祿米三百石壬戌秋敵寇近邊上復命公出巡仍許便宜行事乃自寧夏直抵甘肅凡塞堡烽堠悉爲修整完固設奇正方略訓練軍士事竣還京麓川遺孽思幾發思卜發復據孟養跳梁戊辰春上復命公總督軍務率兵往勦至金沙江賊於西岸立柵以拒

公乃伐竹爲梁麾兵悉渡一鼓敗之賊又於鬼哭山顛立柵公與副總兵張軌親冒矢石而拔之二孽死於鋒鏑南服遂寧景泰初總兵宮聚征勦湖貴苗賊失利乃以公爲總兵掛平蠻將軍印提兵擒殺獲賊首僞稱劃平王苗孟富檻送京師餘寨悉平公振旅而還復增祿米一百石子孫世襲伯爵尋委公往守南京壬申公以衰老乞閒還京天順改元皇上復位思用舊人召公慰諭良久賞以白金文綺顧公精力尙健復令兼兵部尙書以掌部事再閱月整頓兵政俱有次第公即辭解上念其老不可久煩遂允其請令朔望朝參以優待之復賜誥命加號奉天翊衛改守正文臣陞特進光祿大夫禮遇甚厚天順四年五月十一日以疾卒於正寢公天資通敏遇事敢爲正色立朝欲以身殉天下每陳國家利害生民休戚辭氣懇切孜孜不已襟懷開爽好賢樂善人有寸美必極口稱道見人才沉滯必拔而任用始終成就之未嘗有德色與人交不立厓岸循循和易及當官論事毅然不可犯雖位兼將相望重累朝曾無一毫驕矜之意見於顏面此其蘊藉豈尋常之見所能測哉爲人體貌清臞風儀峻整尤善談論見者懍然起敬當大事屹若砥柱之在

中流功名事業視千古爲無愧也尤達死生之理疾亟家人惶懼公曰古人以死爲歸何至是耶且對故人大理卿龔永吉叙間闊神思如常客未出門公就席而逝享年八十有三上聞訃哀悼輟視朝一日祭葬賻儀悉從典禮追封靖遠侯諡忠毅士大夫莫不茹泣相弔公娶張氏累封伯夫人生子二曰玉曰璿俱蚤卒繼室劉氏生子二曰璫公爵曰珩爲勳衛義男祥錦衣衛指揮僉事孫男二女二卜以是年七月吉日歸葬於束鹿祖塋之右爲之

銘曰天生豪傑計爲邦家大其抱負俾著才華乃若斯人世豈常有如鳳如麟生之非偶嗚呼王公間氣所鍾紛紛茅葦挺見孤松奮志邑庠早登甲第簪筆蠅頭風采獨異歷試繁劇如劍斷犀超擢憲佐名震山西召尹京府畿民安堵轉貳夏官肅清戎伍進位司馬出巡邊陲斬其怯將大振兵威號令旣伸三軍勇倍強敵成擒罔有不悔麓川叛寇敢爲跳梁公督戎事威武奮揚殲其渠兇濫其巢穴從此滇南遺患斯絕報功之典迴出尋常河山帶礪與國同長出入將相一代之望海內仰之想聞其狀盛德在躬時莫與同獨膺

異數褒示無窮慶鍾一門厚此世澤本固根深永永無斁

明贈榮祿大夫王公暨配彭氏神道碑

陳循

國家修政立事必有賢知之士以爲之股肱人臣竭忠盡職必有德善之親以爲之源本蓋本深者末必茂源潔者流必清此自然之理余于贈榮祿大夫太子太保兼吏部尚書翰林院學士東鹿王公暨其配彭夫人有子顯榮于今有足徵也公諱緒姓王氏其先世家鳳陽府壽州霍邱縣國朝有贈榮祿大夫太子太保兼吏部尚書翰林院學士諱眞者公之祖也有累贈至榮祿大夫太子太保兼吏部尚書翰林院學士諱璧者公之父也祖母李氏贈一品夫人母劉氏累贈一品夫人公之父洪武初爲北平保定府清苑縣簿卒于官母劉夫人亦死節時公始十一歲已知痛其父母邑人皆德清苑而悲公之孤幼相與爲舉柩合葬之公乃依其執友清苑儒學訓導王承烈居冀得讀書且不違先隴焉弱冠有祁州訓導彭從野先生者鄰邑東鹿名儒也以致仕歸鄉里見公不凡以女妻之公遂從彭先生家彭家莊爲東鹿人公既深于問學乃開塾以授徒于家鄉邑子弟凡經其

指授者皆嘖嘖有造詣所得束脩既富加以彭夫人躬儉勤爲助由是家門日益昌大公
又以其餘暇精究醫藥之書而窮盡其奧蘊以爲以此濟人疾疢必先探其脈理知其表
裏淺深緩急如何然後施之則無不奇中矣故其所至得效如神近自三十里以及鄰邑
他郡聞公之名而來致迎公者蓋無虛日公亦樂于濟人求輒赴之一方賴之以全活者
甚衆卒未嘗有一毫規利之心惟教其子以學曰此足以利吾家也永樂辛卯季子文以
明經領薦于鄉辛丑登進士第擢四川道監察御史宣德壬子蒙恩封公文林郎四川道
監察御史乙卯六月初十日無疾而卒上距其生元至正二十二年七月二十一日春秋
七十有四葬莊東南平峯之原正統五年贈通議大夫正治上卿本院左都御史癸酉再
加贈今官皆自其季子推恩也夫人亦以季子之恩初封太孺人進封太淑人加封太夫
人蓋太夫人平生端莊靜一相夫教子足爲宗姻母婦儀範閨門仰承其德惠者無間疏
戚其生後公二年六月二十三日以景泰癸酉五月十日卒春秋九十訃聞遣中貴齎賜
賻儀遣官致祭命有司爲塋域起公之柩而合葬焉旣而特恩再加贈公榮祿大夫太子

太保兼吏部尚書翰林院學士贈太夫人爲一品夫人云子男三長曰熙仲曰行及季文
文自監察御史遷陝西按察使歷至太子太保兼吏部尚書翰林院學士管文淵閣事實
公與夫人所從推恩者也女一適士人趙繼宗孫男九曾孫十元孫三皆秀偉而篤實日
漸騰于遠大之域孰非公與夫人深仁厚德之所啟哉

銘曰奕奕王宗肇自太原累遷而南子孫寔繁霍丘所居光務德義前啟後繼世濟其美
或隱或顯惟詩惟書代不乏賢卿族有譽誰其卓哉曰清苑簿德惠及民民視如父天欲
福之俾終于官庶其後裔處此能安公復克肖思事經史納壻里儒務求造詣匪徒責己
且以及人教誨憫念與物皆春日積月累陰隲彌厚壽集厥躬慶延乃後譬之大淵積匪
一朝源清流潔其行遙遙又如佳木久於封殖枝幹交柯干霄蔽日於惟王氏其理亦然
曷從知之子孫皆賢累封疊贈官至太保上及高曾奚啻祖考太行以東丘墳戢戢我銘
斯在千古弗磨

明太子少保工部尚書賈公墓碑

李東陽

束鹿縣賈公起鄉貢士爲監察御史歷按察司僉事副使都察院右僉都御史工部左右侍郎至尙書加太子少保致仕令馳驛歸鄉勅有司歲給米二十四石輿隸四人及卒遣官諭祭營葬事蓋其歷事三朝積官三十餘年階至二品贈及再世壽躋六十有八若公者可謂卓然不羣者矣公諱俊字廷傑世居束鹿束鹿者保定屬縣也祖諱原智不仕考諱威知河南滎陽縣治狀最著皆贈資德大夫工部尙書少從父于官邸有奇質識者以爲不凡稍長入縣學爲弟子員景泰庚午以詩舉京闈卒業國子監需次吏部天順己卯被簡爲山西道御史凡五出巡自浙江山西陝西河南至于南畿所在獎廉黜貪鋤梗植弱見稱爲能母喪服闋擢僉山西按察司事承勅協守寧武諸關軍政明肅邊徼無事尋調山東時流徙甚衆公且賑且輯民賴以寧遷副使分司臨清刑獄不撓兼督修德王府工輒就緒用大臣薦爲右僉都御史巡撫寧夏蓋異選也公至持憲度嚴軍法麾指任使惟所當數年西人不敢犯成化癸卯召入爲工部右侍郎飭材訓藝動必信度乙巳河南飢勅公往視悉力賑貸多所全活丁未遷左侍郎未幾進尙書今上卽阼益敦用舊宏治

辛亥勅修太廟夾室成加太子少保久之有足疾三上疏乞休罷賜優詔令勉就職甲寅
疏復上辭益懇上重違公志乃許之歸三年而卒公性簡約介介自持雖貴顯服食若韋
布比老不變下至胥隸皆能窺其廉隅而嘆其賢無異辭嗟夫世乃有出入矩矱動自侈
大以憤身喪節甘心焉而不悔者其于公所得何如也公生于宣德戊申卒於弘治乙卯
六月十八日葬以其年十月二十日其地曰柳科之原娶李氏封至夫人先公七年卒子
三長魯以公廕爲國子生次鈍又次愚魯及愚皆先一年卒女一適國子生馬思毅孫四
長越繼爲國子生次超次趨又次趣

銘曰畿有八郡群材萃焉盛于先朝成化之間公爲憲台馱歷中外既陟六官冬卿是拜
進加宮保位秩高陞布衣之極儒者之榮公材實優惟所歷試簡繁異宜必當其際匪惟
外馳中實自持衆口隨運誠執不移餘三十年終始一節保身益家信矣無缺帝念老臣
許其歸休歸指其山某水某丘生斯葬斯孰匪攸願公歸則全世所希□□□□□衆卿
羨之石室有口太史口之

詩

渡滹沱河

唐胡曾

光武經營業未興王郎兵革暫憑陵須知後漢功臣力不及滹沱一片冰

渡滹沱河

宋文天祥

過了長江與大河橫流數仞絕滹沱蕭王麥飯曾倉卒回首中天感慨多
風沙睢水終亡楚草木公山竟蹙秦始信滹沱水合事世間興廢不由人

早發滹沱感水合

元陳孚

征鼓連天戰血紅存亡只寄寸水中憑誰剪取麒麟碧畫作雲臺第一功

滹沱流澌行

明王惲

王郎何人著拓黃欲與赤伏爭翱翔漢炎中斷天復熾肘後頑石烟爲光蕭王揮戈指幽
薊戰血滿野風塵蒼募兵反得市人噓當時南馳亦蒼皇鳶鞬城東滹水長北風烈烈天
兩霜前驅後騎兩失色河雖流澌無可航兔肩麥飯未下咽大水橫合堅于梁古稱王者

阨不死淮陵一言殆天始赤龍已渡凌四開白魚躍舟未逾此壇宇王氣如水清妖彗邯鄲死灰耳彼蒼有意開真主固令若輩先驅處君看隴蜀最健者一旦等蛙終漢虜王郎區區安足數蒼茫此日龍華渡漠漠野烟生綠樹留在長河閱世人萬古朝宗浩東鷲

了河春漲

盛 頤

河勢縈洄燕尾分洪濤拍岸浩無垠菰蒲水暖波涵綠楊柳風微浪蹙鱗雁掠碧雲芳草渡鷗眠紅雨落花津源頭徹底清如許流得長江一漾春

前題

王 偉

春雨了河漲洪流一派長冷含芳草碧暖泛落花香浩蕩波應闊奔騰勢獨狂漁舟橫野渡扣月和滄浪

弔忠臣張公歌

畢 隆

祿山潛志窺神器拜稽後父真何意錦棚浴兒啟禍端可憐猶擲金錢戲回首漁陽動鼙鼓宮中尙作霓裳舞千里飛塵入建章九廟不守唐無主車駕西遷入馬嵬六軍不聽將

軍催玉環妖燒化塵土三郎勒馬徒增哀天下紛紛起爭戰承平不禁賊虐焰將軍獨力
守孤城外援不至斯城陷豪氣英英溢八紘眼空不見史思明正言弗屈觸賊怒慷慨就
死曾無驚身雖可解心類鐵濺血裂膚罵不絕祇知大義重如山不顧一身輕似葉遺骨
歸葬城南叱落水奔激墳塚平邇來七百有餘載賢明大尹重經營我以瓣香拜墓側感
君義氣心欲裂猿啼鶴唳起悲風長嘯一聲振林樾凌競瘦馬歸去來龍鐘兩袖啼紅血

挽貞烈婦喬氏詩

保瓦窰頭人耿虔寺
村王希禮之妻

劉生中

正氣凌千古獨鍾一婦人悲載三尺練繫此百年身孤塚楸松冷芳名宇宙新幽貞原自
許無意被褒綸

前題

李騰芳

人謂氏也死夫恩嫁夫四月聲已吞人謂氏也死夫遲白髮之姑姑且廢人不逼氏氏未
死氏不死遇事未已氏何以縊喬家樓氏何以姑意不周此時叫墓墓不開此時念姑姑
不來天以完節付一婦紅顏如新黃如故孰不鬚眉具丈夫嗟哉大義女中扶一朝決絕

誰無死六載從容上有姑展墓可餘同穴恨登樓了却未亡軀招魂欲賦魂何處萬里清
秋皎月孤

春渡瀟沱

石 珪

世路無閒日風波歲歲新東風沙上鴈落日岸頭人去國曾千里還家又一春林花應笑
客夏病往來頻

靖遠侯王忠毅公驥

吳 易

抱膝當時危懷古存匡濟英雄與世徂風烈忍衰替我思靖遠公振翮全盛世踴躍弓馬
間談笑布軍勢甘涼始出鎮肅整戎伍氣張筵斬懦將股栗衆相視一舉平阿台河西晏
亭燧麓川肆作逆公又決大計鎖甲金兜牟照耀宮中賜長驅展方略奪險扼吭背指麾
風霆奔戰象失精銳萬古金沙江不聞漢兵至江枯石碣爛羅拜帳下誓凱歌萬里入勞
使千里出不有爪牙臣何以正神器龍蛇壯士節蛙黽腐儒議嗚呼三征南丹書在苗裔

送顧聞西二尹束鹿

國朝 孫 琮

薄宦三千里風塵道路難鹿巖盤境險鴉水繞城寒政績雖分理民憂必共殫古來當大任多是起微官

春暮赴試易水感懷

耿 襄

自慚落落久蹉跎二十年來尙此過雨後苔新樵徑細春深樹密鳥聲多千尋青嶂荆卿路五里白沙太子河未遂翔秦今古恨每從燕市想悲歌

遊李芝岑園亭

耿 遷

地僻人家少林深一巷斜平臺曲映水古木密藏鴉壘石開幽徑編籬護落花羨君絕世累白首臥烟霞

草橋夜月

劉 崑

草橋木檻儘堪凭倒瀉銀河一水澄天上誰懸金鵲鏡人間如在玉壺水柳垂有影波中定花落無聲夜氣凝嘉客到來聊共坐清談從不燄官燈

前題

陳 偉

誰瀉銀河映水晶玉樓人在廣寒行滿天冰雪清涼國大地琉璃不夜城波淨柳眠雲有影風微花落鳥無聲如何一樣良宵月比到橋頭分外明

杏林春曉

劉崑

晴郊春色足徘徊文杏叢林一望開細雨但容花睡起清香未許鳥啣來赤城不借紅霞色曉日遙看紫霧堆製錦年來工不得喜今且省買花栽

前題

陳億

二月春晴鳥亂啼深林霞影滿長堤胭脂着雨霏紅雪瑤騰光豔火齊初日赤城雲冉冉曉風紫陌草萋萋我今又惹漁郎笑不是桃源路已迷

雙閣晴雲

李世洽

憑城南望晚晴初雙閣崔巍挿太虛林外鐘聲天外落空中香靄望中舒鴈堂對現金花曜鹿苑光連珠火餘咫尺諸天靈境在皈依直欲證真如

初入束鹿境

查慎行

橫水橋邊路西來小邑偏人家多瓦屋沙陸少閒田露白收棉後秋紅支棗天鄰封紛水
旱容易得豐年

八月十五夜鹿城對月用欒城中秋次東坡夜字韻示兒建

陸川城中連日雨草橋霽色宜今夜漳沱南徙故道存疑有蛟龍伏潭下

城南草橋之下
瀕水成潭相傳

為漳沱
故道

水面團團月東吐城頭灑灑河西瀉空庭置酒荇藻間古柏高槐互相亞廿年塵

坳今已欲此日清涼天所借吏曹初散不聞呼好客能來何用謝人言僻地少公事我愛
閒居似村舍不教童僕課雞豚聊與兒孫給梨蔗一杯對飲要無愧九折驅車真可怕平
生慣被醉尉噴但恨未逢劉四罵

勘河東鹿道中留題

方觀承

秋原曾記樹臨流斷岸俄看麥滿溝已任天風迴濁浪早教民氣靜新疇閣雲自繞雙城

邑

邑有雙閣晴雲之
景舊縣在今城北

陸澤遙連古冀州傳道魚龍多窟宅相携牧宰問扁舟

次宮保方公勘河東鹿元韻

朱雲駿

洪波正望砥中流俄見河成洫與溝千尺沙明臨斷岸一犁雨潤愛新疇自從滄水連滹
水真覺邢州異冀州指顧畿南勞使節濤聲隱隱泛輕舟

勘河題傾井古蹟

方觀承

白水龍初起堅冰馬盡隨孤亭猶表岸培井亦鐫碑未費征途汲寧因改邑移香烟垂幕
懸瓦色壞琉璃熊虎歸何處牛羊欲下時千秋餘麥飯野老薦馨宜

次宮保方原韻

朱陽

葵井當年過英豪幾輩隨荒村猶古殿山色老穹碑勝跡寒泉冽斜陽片石移淡堪供俎
豆潔自透琉璃用汲追前事臨河感舊時堂皇賢尹職修舉恰相宜

漢光武廟歌爲束鹿李芟裳使君賦

張九鉞

李君邀我城西原來觀漢帝傾井村豐碑猶紀舊時事頽沙歷指波濤痕滹沱劈天走黃
流奔騰橫掃幽并州平原得勢更快逞鄴縣叢爾當下游前年六月積霖溢河身北圻爭
口入濤頭肆兀頽黑山白晝晦冥鬼雨急片城斜觸蛟龍奔孤祠直踏鼉鼉立牽爺背子

羣呼號老樹飛拔村屋搖是時李使君叩陛陳牲牢須臾陰風起林坳似聞神出從戈矛
萬人伏地不敢視天吳淵客紛奔逃河流失勢駭南走百年滄澤歸其漕神兮漠漠回弓
刀千里一碧無纖毫靈旗不動蒼天高驚魂盡棲樂安宅使君更督勤播植沮洳轉眼起
膏腴九穗雙歧蔚嘉麥以茲棟宇酬神恩朱纓白馬重帷屯烹羊刲豕賽社鼓短松奇石
通泉源我來祠前肅再拜英風颯爽今如在白日茫茫大野開烟中列騎爭呼喝當時南
陽振臂揮天戈驅除六合收鯨波河北銅馬三十萬一夜請命歸藩羅滹沱之水將如何
嗚呼滹沱之水將如何爲神再奏神絃歌請神爲我天子南防河

咏束鹿瑞麥呈宮保桐城公十二韻

張鳳孫

昔有雙岐秀今兼九穗奇疏風芒競吐裊露穎交垂繡錯南東畝香聯大小枝浪紋翻疊
疊珠實實纒纒一氣金精王三冬土脉滋數同疇共衍瑞比谷先窺嘉種何年降橫流昨
歲移前一歲諱河改遷寧晉似邀天獨厚應爲吏能慈攬俗秋原日公勘河至束鹿敦耕宿隴時叱牛瞻杏
叟狎雉蔭桑兒致此良非偶歡來不可支欲持丹宸獻圖裏補幽詩

漢井神泉

穆凌烟

廟枕長流劔戟稜神泉一鏡水猶澄蹟同豆粥亭前飯奇比溲沱渡口水四壁丹青新鳳翼千年沆瀣舊龍龔憑欄試望花磚影倒瀉苔痕碧幾層

龍邱瑞麥

張鍾秀

溲沱入滄患消除種播龍邱麥滿畚翠隴連霄迷野望黃雲鋪地擁村居雙歧瑞報三年後九穗祥開四月初治比漁陽多異政公餘著得勸農書

又

馮世祿

溲滄同流水患除迴灘見處盡新畚雙歧麥兆豐年瑞百里人安化日居翠浪斜披風動裏金芒秀吐政成初永嘉編簡今重續會下赤泥擢異書

城堤柳色

李文耀

垂楊幾隊翠迷濛雉堞層層覆遠虹環繞原因民固圉菁蔥敢謂吏旌功鶯啼飛絮千村月馬拂斜陽一桁風記取五年前種處柔條初點碧烟中

學沼蓮香

一奩南沼鏡重開活水源頭汨汨來
藝圃自應嘉樹繞筆花還向瑞蓮催
薰風香入瑤琴曲濃露紅凝玉硯臺
題作科名杜家草好教珍重護根荄

佛閣晚鐘

寶閣香幢矗漢穹蒲牢靜響出花宮
佛高蒼翠溟濛裏聲在虛無縹緲中
祝梵侶閒低貝樹打包僧返下珠櫛
十年宦海勞塵夢銷向緇林一夜風

又

張鍾秀

嵯峨佛閣聳蒼穹夜靜鯨鳴出梵宮
碧落音流三界外紅塵夢破一聲中
星光點點連珠樹月色沉沉射法櫛
敲斷幾回仍續處半隨譙鼓半隨風

草橋夜月

李文耀

飛虹冷浸碧玻璃幾曲欄干月上時
珠浴波心雲澹蕩鏡涵天表樹參差
滄桑舊蹟憑誰問三五良宵正此宜
最愛帶星歸騎晚夾溪皓影暗相隨

杏林春曉

郊原蔥蒨釀晴春一望村村杏蕊新宿雨香分連墅柳朝陽紅映隔溪人嘶來金勒鶯爲友踏去銀沙錦作茵咫尺上林仙路近諸君珍取看花晨

桃塢明霞

銀桃佳植遍芳園二月晴霞廿里繁不數河陽成錦縣定知谷口有仙源綺浮霽雨迷村墅香逐斜陽繞郭門六載于斯慚管領公餘遙對一開樽

奎樓遠翠

穆凌煙

一路文星接福星奎光百里照林垆樓頭夜氣侵霄漢檻外鮮飈入杳冥北挹幽燕秋色碧東看齊魯海雲青爭誇綵筆留題處萬柳團香護翠屏

甲寅九日王翠庭太守按部鹿城即事口占

是日爲太守生辰

李符清

隼旛按部雨清塵九九欣逢嶽降辰菊葉本爲長壽酒鹿巖合駐大年人登城望麥兼酬節邑有立麥樓立馬吟詩實念民公是日詩有盤餐須念啼飢廣之句小宰趨承宣德意四郊秋氣忽如春

紅草坡懷張將軍有序

將軍名興東鹿人爲饒陽裨將祿山之變堅守彌年城破不屈死之墓在鹿城北草

獨紅

饒陽城頭夜吹角范陽賊兵如蟻薄大軍方聞出井陘彌年守此控河朔此時雖已陷常
山此時猶未失潼關直入一軍作保障威風凜凜同二顏豈知滄趙諸郡失外援俱絕臣
力竭禍福還當曉敵人丈夫寧爲刀鋸屈難將大義感賊臣猶有英魂憎賊軍烏合真如
巢幕燕可憐安史徒紛紛二十四郡遙相望幾人能與賊相抗朝廷未識顏平原那知更
有張裨將嗟乎唐家再造李郭功制賊此與睢陽同精靈炯炯依故土千秋青史標孤忠
今我重來懷往烈茫茫一片燕山雪獨看墓草露猶紅野人指是將軍血

甲寅九月四日張峯青太守招同張小宋吳樂亭小酌餘園

歸杖園門久不開飄零陶令竟重來松陰舊是論詩地池上今爲把釣臺身健且尋朋友
樂年高難得子孫才鹿巖擬繼龍山會先醉黃花酒一杯

智伯墓

晉陽宮殿已成塵終古荒墳傍水濱畢竟愛才知國士趙亡無復報仇人

杏園

遠山一角夕陽殘 面風吹徹骨寒春色不知何處是杏園村外幾回看

鴨河營

鴨綠溶溶泛鴨河春風如剪剪春波堤邊一帶煙籠樹遙聽漁人鼓柁歌

白龍邱

鳥騶嘶過白龍邱麥隴春苗沃雪柔堤樹人煙三百戶家家歡望兩歧秋

乙卯初秋登鹿城署中望麥樓感懷

院小槐陰遍樓高野色開山從雲際見秋自雨中來蕭散添詩句蹉跎任酒杯年年五斗米此是望鄉臺

傾井懷古

策馬鹿城西鬱然見深翠樹陰散日色泉石生雲氣傳是東漢初略地至此地三軍苦焦
渴攀泉紛感涕毋乃震巨鯨聳身驚虬蟲我謂感精誠神力皆相濟貳師拔佩刀耿恭肅
衣拜何況真人出川岳奔護衛冰合既有然井傾何足異小亭蔭清泉崇祠瞻古帝俯仰
寄遙情千秋稱勝概涓涓滋畝苗冷冷響林際時平鷄犬恬勸耕此遊憇

上巳日招裴宿塘農部沈秋雯編修張峰青太守過植棠院賞海棠

曉光初透鳥聲碎春陰漠漠護花睡翠袖紅綃倚薄寒沉香亭畔楊妃醉偶因銜子植東
墻鹿岩今是碧鷄坊捲簾花氣襲衣袂誰云有色恨無香嫣然一笑春風裏滿園粗俗薄
桃李砌中環繞苑花真如命婦侍羣婢殷勤手植經十年兩度相依良有緣花時便作
西川夢此生合署海棠顛香霏閣比昌州守名友相應賞名友人間富貴幾能逢莫負花
前一尊酒

舊序

東鹿爲保定首邑其分野山川人物習尙土產古蹟景致陵墓之類視他邑不同邑舊志不詳其始作之人天順初得本縣儒學訓導三山翁君賓始輯而修爲一志中間條析分明紀載周悉覽者便之越三十餘年又得訓導武定康君紹儒將前志未及載者續又增入再越將及三十年復得教諭武定夏君振又將續志未及載者與邑人閱鄉致仕教諭焦君讓重加修輯校正備載無遺雖曰續增曰重修大率俱遵翁君舊格而爲之未嘗更易也志成循舊日之規繕寫爲帙存之學宮以備士夫及上司覽閱今得賢邑宰閻君濟崇重斯文覽而悅之且曰此志之傳於四方吾有司事也遂命儒學善書弟子員李引之范銘趙豪劉奎煥魏仲弼臈眞鏤板印行囑予爲序予衰老倦於翰墨閻君意誠且吾邑事也遂不獲辭而書此以酬之閻君字惠民山西忻州名家以鄉進士先知碭山縣又知三河遂知是邑政尙嚴明兼以撫字之愛施於下令行民悅綽有嘉聲云

正德九年歲次甲戌季冬哉生明賜進士第資政大夫南京禮部尙書前都察院右都御

史侍經筵致仕邑人王宗彝序

嘗謂天下有虛文有實政有實政跡乎虛文虛文關乎實政者則郡縣之志是也志也者紀也凡其地之山川人物土地疆域貢賦創置秩官選舉以及災祥之故風俗之殊古蹟之存沒禮教之修廢忠孝節義之潛德幽光無不紀於此書也長人者挾筴求之而形勝風氣盛衰因革犂然若指諸掌然後察人性以制寬猛之宜物土利以經出入之法審俗尚以裁豐儉之中而今昔醇疵勸懲法誠亦往往在是故志非徒文具其於政事實有賴焉崑自慶遠改授今職甫下車詢及邑志闕如也爲之三歎卽欲勉圖纂輯補文獻之未備維時整煩振弛噓枯剔蠹諸未遑也任事之二載幸際大法小廉諸上臺一意與民休息牘日以清政日以簡乃博蒐事蹟臚列鱗次取其意而衷裁之事以類分類以義著編摹成書以貽來者俾千百世後因文見政課實於虛以爲張弛興革之藉不無小補異日鞞軒探風鹿巖亦可上貢風謠以進昭王會崑不肖庶幾藉手以無負茲土矣雖然縣志者縣之史也昔班孟堅論司馬子長曰其文直其事核不虛美不隱惡故謂之信史而文

直事核不虛不隱豈崑之所能任知我罪我是在後人哉

康熙十年辛亥夏五月望之吉賜進士出身文林郎知束鹿縣事南昌劉崑識

故明熹廟壬戌先王父出守徽州爲織造事侮逆璫李實被劾巡撫周忠愨公疏救禮垣封駁獎其不阿南昌劉文端公尙在政府持之詔勿問是時僖尙未生也越數年僖始生少長知讀書每侍先王父竊聞當時東林黨錮之禍暨文端公相國之賢私心嚮之既而僖蹉跎老大文端公小阮西來先生知束鹿縣事猶執舊誼顧僖于沉頓困躓中每談往事即以氣節相勉慨以嘆也先生任事之二年修邑志不棄駮淺命從事懷鉛握槧之末劄劄既竣使綴一言于末簡慙無皇甫謐巨筆何足爲先生重先生命不敢辭因忘其蕪陋附于志後今夫經世之道寧有外于經術者哉古來吏治漢爲最盛若倪寬董仲舒文翁孔安國龔少卿之屬皆所謂經生宿學也咸飭行修業卓然名家至授以民社之寄乃推其所學以任職治民吏治蒸蒸稱乂安焉後人假經術以竊科目及任職在位朝夕從事簿書期會猶恐恐焉揀過之不暇而遑問掌故既不能飭文學以致治故其道不尊其

功不顯世之人乃以儒爲詬若志也者其經術經世之一端耳韓文公有言文章言語與政相侔朱文公出守南康甫下車他務未遑首詢郡志良有以也如先生者可謂以經術經世不愧西京者矣雖然凡千古不刊之典固待其人而後行亦必得其時而後舉卽如東鹿縣志自故明正德以來中間不乏良有司乃隙駒侯鴈兩不暇給卒未聞參考編摩用襄文獻迄今越百六十餘年時異代殊先生乃諏遺人拾殘帙成其書于典籍銷沈老成凋謝之後豈非得其時歟方今聖天子雅意右文開經筵咨治道太平盛世將在目前此正其禮樂文章之先見者予小子敢曰陳師錫之無當於廬陵史而闕筆卷舌乎哉

康熙十年辛亥夏五月清苑陳僖撰

古今來長存於天地間者非特日月之光昭山川之流峙已也其間有英賢之迴卓勳業之炳耀忠孝節義之美行政績之循異上紀星辰下窮庶物於以垂一時者垂萬世而奕禩以後卽奉爲典型斯何如盛事也雖然人不自爲傳也勳業不自爲爛也忠孝節義以及庶類亦不自爲燦著也有所以載之者也則甚矣志之有關於治教也大矣東邑古安

國地舊志鹿巖爲保陽最南屬邑與恒山接壤界址聯錯漳水遶其南潯水潨於左其地
平衍其人忠義慷慨有古燕趙遺風而英賢名勝圖籍具載入其地者無不欲披覽舊章
尋求往蹟者智自己未仲冬承乏茲邑適荒旱頻仍荏苒滿目而閭閻窮困輩多移散流
離視事後尙在加意撫緝諸未遑及會值纂修大典奉文取志迨求之則有云燼於火者
有云汨於巨波者而原志不可復問矣辛亥歲前令西來劉氏諱崑者慨縣志之有失遂
旁搜遺牘採補成帙洵屬美舉究未能備極往蹟追步前徽然採取所及即以是集呈進
而操筆者果有增汰之意然自古稗官野史各任記載一經釐正立爲不易之章程今者
業蒙詳訂誠爲規度合宜典則有據用垂不朽亶如日月之光昭於天山川之流峙於地
而莫有紀極洵不誣也智故爲序以爲後日之券云東鹿縣知縣施承智序

東鹿爲禹貢大陸以東九河以西之地也禹貢稱冀州土白壤說文云壤柔土也無塊曰
壤故邑地宜稼穡果樹稱沃饒者以此而性疏力埤東衝決則西壅淤者亦以此且潯沱
挾代郡衆流破萬山建瓴而下至近邑數百里間廣陸平原無高山大谷爲障納違其怒

悍之勢奔駛四出至壞城郭蕩田廬而不可禦雖水潦既降民可作又有一麥抵三秋之
諺然城邑遷徙民居蕩析數百年來殆哉岌岌矣遑問文獻哉余自乾隆丁丑承乏茲土
時夏汛方漲登高四望浩淼無涯心竊憂之及歷查城堤學舍倉廩壇廟皆風雨剝蝕半
就頽圯而邑乘之漙滅又其餘事無暇及矣益悚然懼先其急務鑄俸鳩工築城堤以資
保障開川澮以殺水勢固壕墻以護村莊與吾民日夜相度經營不敢暇逸恭逢天子神
聖百靈効順河由故道徙寧晉入滏制府桐山公念周民瘼因勢順導環城三四十里水
患頓除民獲安枕焉則又修漢世祖古蹟關帝廟慈雲寺蜡祖祠以報神庥修南池書院
常平義倉養濟院留養局詳請估修城垣以重根本所以求寧吾民者釐然略備矣迺進
二三紳士而謀曰邑之有志所以別輿地辨土宜考民俗表士行彰善瘴惡今信傳後以
垂法守者也而自西來劉公以來將屆百年紀載缺如某竊懼文獻之是墜無以爲官師
士民鑑蒐輯之役其烏可緩僉曰然于是取舊志訛者訂之蕪者芟之缺者補之新者增
之而九十餘年國家創制之顯庸士籍民行之不懋以及河渠遷徙建置遞增燦然臚列

明如指掌無簡無遺無濫無夸視向之拾殘穿蠹者迥不侔焉夫文章之興廢與政治相爲表裏者也因地制宜順俗成化政令酌於寬猛之中文章亦合乎體要之正曩余濫竽上海手修邑乘以本因地爲政因政爲文之旨至今爲採風者之所宗茲六年來與吾民從事者不敢爲因循苟簡亦不敢爲束濕繳繞民亦共喻余之苦心凡鑿鼓之役不待期會踴躍歡呼惟恐或後余更樂撫摩而噢咻之不勞而事已集今粗載篇中者皆是也後之閱者知是邑地勢之卑土性之疏河患之劇民力之蘇未遠慨然思明作有功懋大成裕時爲隄防保護以奠於磐石之安非徒爲文章之觀美而已則余是編方將爲椎輪爲疇矢是余之願也亦邑之幸也剗成爰述其大旨於篇首

昔乾隆二十七年壬午閏五月上浣吉日文林郎知束鹿縣事加三級又軍功隨帶加一級鄞江李文耀識

束鹿令李君閩中名士也與余有世誼筮仕初補余鑲藍旗教習文章道誼日相切劘覽其著作博雅精嚴兼擅史才迨後屢宰繁劇治績種種口碑載道及蒞束又以葭葶聯戚

知更稔束邑當滹沱之衝連年被水患君蒞治之三年河忽南徙匯歸滏陽瀕河數十里沮洳之地悉成膏壤次年夏菁葱萬頃麥浪翻雲且徵兩歧九穗之異殆所謂中牟異績歟聞君公退之餘留心掌故時以遺籍缺略爲歎夫鹿城隸保郡之南鄙恆山西巨滹水南環威人文饒物產卓然爲保屬二十城冠乃邑乘獨闕將屆百年宜李君之慨然興毅然任也爰蒐斷簡於藝林探遺文於故老參以畿輔通志保定郡志復做稼書靈壽志體間益己見以補所未備閱五月而成書適李君以差務赴都持以示余余受而讀之其事寧信勿疑其詞寧嚴勿濫其序次體裁取確當而務黜雜亂凡山川人物土田疆域貢賦創置秩官選舉以及災祥之徵風俗之殊古蹟之存沒禮教之修廢忠孝節義之潛德幽光全史煥然胥備諸此觀李君自叙之言曰因地制宜順俗成化政令酌於寬猛之中文章合乎體要之正披其文章即以窺其政治河伯著靈物產呈祥特其一端也余曩以經術經世推李君夫豈虛語哉今聖天子稽古右文首重經筵蘭臺石室之秘黼藻瑣闥之選拭目而擢循良應以此志之重修爲左券

乾隆歲次壬午都察院掌院左都御史兼鑲黃旗蒙古都統仍管欽天監監正事加三級
覺羅勒爾森撰

嘉慶東鹿縣志校勘表

卷數	門類	某頁	某行	第幾字	誤字漏字衍字
卷首	序	二頁	十五	二十三字	衍羣邑如此四字
全	全	全	十七	二十五字	恬熙恬誤爲怙
全	全	全	二十一	二十二字	鄭書鄭誤爲願
全	全	三頁	七行	二十五字	採錄者採下漏一錄字
全	全	全	八行	三十字	窮源源誤爲根
全	修志 姓氏	一頁	三行	小註	兼管兼誤爲兼
卷一	地理	一頁	二十三	三十三 五字	日均誤爲日
全	全	五頁	六行	上排	孟觀莊應頂格排誤低一格

全	全	全	全	全	全	全	全	全	全
全	全	全	全	全	全	全	全	全	全
二十六	二十三	全	二十一	十六	全	十五	十四	十一	十頁
二十四	六行	二十四	四行	十九	全	四行	八行	二十二	十八
中排	二字	三十三字	二十三字	三十一字	五字	一字	三十一字	二排	上排
宮保坊宮誤爲官	胡三省胡誤爲湖	花里莊莊誤爲村	杜河莊河誤爲科	滹沱滹字下漏一沱字	桃塢桃誤爲杏	杏林杏誤爲哆	有纜路纜誤爲順	小注衍一里字	溫家村村誤爲莊

全	全	全	全	全	全	全	全	全	全
全	全	全	全	全	全	全	全	全	全
四十三	四十	三十八	三十七	三十六	全	三十四	三十三	三十一	二十七
一行	五行	二十一	十一	十六	九行	七行	四行	二行	二十三
一字	二十二字	十字	二字	十三字	十五字	五字	二十一字	二字	十一字
開首漏一興字	萬歷下漏一間字	明宏治間誤爲宏明治間	在城北在字下漏一城字	不辨辨誤爲辦	崇禎禎誤爲貞	木市街木誤爲水	爲揚威侯揚威上漏一爲字	疏字下誤空一格	五土之示原本作示疑有誤

全	全	全	全	全	全	全	全	全	全
全	全	學校	全	全	全	全	全	全	全
全	六十二	五十五	五十二	全	五十一	四十九	四十五	四十四	全
十四	十一	十二	十行	十一	七行	二十	四行	九行	九行
一字	十七字	三字	十六字	十二字	二十字	二十七字	七字	十一字	二字
開首漏之畫像祀於五字	婺源婺誤爲婺	謹案下衍一聖字	牙帖稅銀帖字下漏一稅字	遇閏誤爲閏遇	工食銀食字下漏一銀字	閏月閏誤爲閏	小章汎汎誤爲汎	萬歷上漏一明字	在城東北在字下漏一城字

全	全	全	卷八	全	全	全	全	全	全
全	全	全	人物	全	全	全	全	全	全
全	全	二頁	一頁	九十六	九十五	九十二	九十一	全	全
二十	十九	十一	二十三	十七	八行	二行	十五	全	二十二
十一字	十八字	二十三字	二十二字	上排	下排	下排	下排	下排	頭排
拜定州原本誤爲授定州	州吏原本誤爲州史	筮仕仕誤爲任	小註漏錄新唐書四字	小註戊午戊誤爲戌	小註守禦守誤爲寺	王家棋棋誤爲樸	賈希尹賈誤爲曹	賀泰泰誤爲秦	耿綱綱誤爲綱

三十一

三十一

全	全	全	全	全	全	全	全	全	全
全	全	全	全	全	全	全	全	全	全
全	十三	十二	八頁	全	七頁	六頁	全	三頁	全
全	二行	六行	十四	十二	九行	十二	全	二行	二十三
八字	三字	七字	二十字	二十五字	二十九字	三十三字	二十六字	八字	三字
無何卒於官誤為於卒何官	特薦下漏陞貴州麻四字	己不與己誤為己	侈靡誤為靡侈	已得己誤為己	大體體誤為禮	梁瑤瑤誤為瑤	崔暹暹上漏一崔字	崔暹日誤為崔日暹	願君原本誤為願君

全	全	全	全	全	全	全	全	全	全
全	全	全	全	全	全	全	全	全	全
全	十八	全	十七	全	全	十五	十四	全	全
九行	三行	三行	二行	二十四	九行	六行	一行	十五	五行
二十六字	二字	二十九字	三字	十六字	三十二字	四字	三十二字	二字	六字
日誤爲日	張吉大誤爲張大吉	綱誤爲剛	紹綱綱誤爲剛	選授誤爲授選	異己者己誤爲己	潔己己誤爲己	丙辰丙誤爲丙	無極上漏一授字	辨冤招參冤誤爲冤

全	全	全	全	全	全	全	全	全	全
全	全	全	全	全	全	全	全	全	全
二十四	三十二	三十一	三十	二十六	二十三	二十二	全	二十	十九
十三	二十一	二十四	一行	二十	一行	十四	二十二	三行	二十二
二十五字	二十八字	五字	十字	三十三字	十字	十六字	九字	十九字	六字
燦疾亟燦誤爲燦	乃日日誤爲日	天宮營宮誤爲官	丸熊丸誤爲九	向氏感泣誤爲氏向感泣	淵源淵排倒	無論論下衍一請字	度日日誤爲日	二十十誤爲士	肯繁誤爲肯繁

全	全	全	全	全	全	全	全	全	全
全	全	全	全	全	全	全	全	全	全
七十	六十八	全	六十七	全	六十六	六十五	全	全	全
十八	二行	十行	七行	十九	十六	十行	十九	十六	十一
三十二字	二十六字	二十九字	十六字	二十六字	二十七字	二十四字	一字	十八字	二十七字
重建之日日誤爲日	繫余繫誤爲繫	可以見民心見字下漏一民字	寵祿日躋日誤爲日	諸生生誤爲事	權呼權誤爲權	輸財輸誤爲輸	於柎柎原本誤爲戲	告成成原本誤爲考	沍寒沍誤爲沍

全	全	全	全	全	全	全	全	全	全
全	全	全	全	全	全	全	全	全	全
七十六	全	全	七十五	全	全	七十四	七十三	七十二	全
十六	全	全	十三	十行	九行	六行	十八	七行	二十三
二十八字	十七字	十五字	八字	二十六字	三十二字	二十字	三十三字	二十一字	三十三字
幸與吾民幸誤爲辛	孤子子誤爲子	皆窳窳誤爲窳	天昏天誤爲天	爰鐫其年月誤爲其爰鐫年月	彤廷廷誤爲延	是年秋誤爲是秋年	侯館侯誤爲候	玩日日誤爲日	時又又誤爲又

全	全	全	全	全	全	全	全	全	全
全	全	全	全	全	全	全	全	全	全
全	八十二	全	全	全	全	八十一	八十	七十九	七十八
十一	三行	十九	全	十四	九行	五行	十五	六行	九行
二字	十八字	九字	二十八字	二十二字	二十八字	五字	十三字	八字	三十字
榭楠豫章榭原本誤為榭	錫美流芳美誤為羨	遂相天子天字康乾嘉三志均誤為長字依原碑更正	李疇李原本誤為季	王宗閔閔原本誤為門	娶葛氏娶排為取古字通	燒民廬舍原碑無舍字	公椎牛響士椎上漏一公字	若干干誤為于	甲寅甲誤為申

全	全	全	全	全	全	全	全	全	全
全	全	全	全	全	全	全	全	全	全
全	九十四	九十二	九十一	八十八	八十六	八十四	八十三	全	全
十五	四行	二行	二十三	十九	十六	一行	十二	十七	十五
三十字	八字	二十二字	二十二字	十二字	十八字	三十字	三十二字	五字	十二字
瞻古地瞻誤為瞻	撲面面字上漏印一撲字	奇比誤為比奇	原日日誤為日	悲哉哉誤為載	鹿世居保定東鹿者保定誤為東	張軌軌誤為軌	萬城城誤為城	二十餘萬二十下漏一餘字	有遠大志有字下衍一行字

全	全	全	全	全	全	全	全
全	全	全	全	全	全	全	全
九十八	九十七	九十六	全	九十八	九十七	九十六	全
十六	二十一	十九	十七	十六	二十一	十九	十七
三字	三十字	十二 四字	三字	三字	三十字	十二 四字	三字
盛人盛誤爲威	信今傳後誤爲今信傳後	予小子誤爲子小子	上巳日日誤爲日				

邑人

邁度謝道安

校

砥中翟國柱

